


ETUMBA MONENE

KOLEKA OYO EBUNDÁMÁ

 Natondi yo, Ndeko Orman. Nkolo ápambola yo.

² Mbote, baninga. Ezali esengo kozala lisusu awa na ntongo oyo, pe yango elengelamaki mpenza te, nakanisi, mpo na ngai moko, pe nayebi ezali pe bongo mpo na liyangani. Pe nazalaki kotanga, pe. . . Natondi yo, ndeko mwasi. Pe emonanaki lokola Nkolo atiaki eloko moko moke na motema na ngai, ya koteya na Lingomba, pe namonaki ntango ekokaki mpo na kosala yango. Pe sikawa, oyo. . .

³ Bongo, ntango nakómaki, nayebaki te ete tokozala awa na lomingo ya lelo, nalobaki ete nazali na—na Nsango moko mpo na Lingomba. Pe, soki Nzambe alingi, nalingi koteya Nsango yango moko ya lomingo ekoya. Pe yango ekoumela mingi mpenza, bongo, mbala mosusu tokobima te liboso na midi na ndambo, na ngonga ya liboso sima na zanga, ntango mosusu, soki na ntango wana. Eumeli ntango mingi na motema na ngai, pe nakanisi esengeli na ngai kopesa bato eyano, mpo na nini nasali mosala mingi te na elanga ya mosala. Nateyaki zonga-zonga na yango, kasi nayebi solo ete naino elobami polele ndenge esengeli te. Bongo nakanisi, soki Nkolo alingi, lomingo ekoya, nalingi kozua ntango na ngai pe kotalisa polele ntina mpenza ya makambo yango, pe koyebisa bino, kokokana na Makomi, makambo nini ezali kosalema, bomoni, ntina mpenza ya makambo nyonso oyo. Mpamba te, ntango mosusu nakokende na mikili mosusu to esika mosusu, kala mingi te. Sikawa, nazali kotalela ngámbo nini Akobenga ngai ete nákende. Lobi. . .

⁴ Eleki pene na butu misato, to butu mibale, babengaki ngai na telefone pene na minwí; ezalaki mpo na kobondela mpo na mwasi moko oyo azalaki na lopitalo. Babengaki ngai, pe balobaki: “Bondela.” Pe nabosani nkombo bapesaki ngai, ete. . . Bayebisaki ngai ezalaki moninga ya Madame James Bell, ndeko na biso ya mwasi awa na losambo, ndeko mwasi ya moindo, mwasi ya boboto, ya bosembo mpenza. Nakanisi nkombo bapesaki ngai, ezalaki Shepherd. Bongo, natikaki mbeto pe nafukamaki, pe—pe nayebisaki mwasi na ngai. Ndenge telefone elelaki, elamusaki ye. Pe nalobaki: “Esengeli tobondela mpo na Madame Shepherd, ndeko mwasi oyo abengi, azali moninga ya Madame James Bell.” Bongo tobondelaki mpo na ye, pe tozongaki na mbeto.

⁵ Na sima, pene na ngonga ya zomi to zomi na moko, mokolo elandi, babengaki ngai lisusu. Ezalaki Billy. Pe alobaki ezalaki

Madame Shepherd te, alobaki ezalaki Madame Bell ye moko, moninga ya Madame Bell te. “Ezalaki Madame Bell, pe azali na lopitalo, kobela makasi mpenza.” Pe nakendeki mbangu na lopitalo, kasi asilaki kokufa. Nkolo abengaki Madame Bell, na Ndako.

⁶ Madame Bell azalaki kosangana na biso awa na losambo, mibu ebele. Mobali na ye, James, ná ngai, tozaláká kosala elongo, ná tata na ngai, eleki mibu ebele, kokotisa. . . Tozaláká kozongisa ba-wagó, longwa na Pennsylvanie kino na Colgate, awa, eleki mibu ebele, nakanisi eleki mibu ntuku misato, to koleka. Pe tolingaka Ndeko mwasi Bell. Azalaki moto moko ya malamumu mpenza.

⁷ Pe namoni ezalaki bokono ya nsongi nde ekomelaki ye na mpwasa, pe bango. . . Monganga na ye, oyo ayebaki bokono yango malamumu mpenza, azalaki na engumba te na ntango yango. Monganga ya sika nde ayaki kotala ye, pe—pe asengaki bapasola ye nokinoki, kasi abikaki na yango te. Pe—pe azalaki. . . Nakanisi ye. . . Ndenge nasosoli yango, monganga na ye ya momesano alingaki kokomela ye li—lipaso te, mpo azalaki monene pe nsongi na ye ezalaki malamumu te. Pe azalaki na bokono ya makila kokangama, nakanisi, to eloko moko ya bongo, pe—pe Nkolo ayokelaki ye mawa mingi. Mipasi yango etungisaka ye liboso, kasi Nkolo abatelaka ye na yango, mbala mingi. Kasi esalemaki ete ezala bongo. . . Ee, soki totali yango na malamumu mpenza, tokoloba boye: Nzambe abengaki Ndeko mwasi Bell, pe esengelaki kosalema lolenge wana, bomoni.

⁸ Pe ndenge elobamaki mabe, ndenge yango ekomelaki ngai, nakanisaki ezalaki Madame. . . Elenge mwasi Shepherd. Nayebaki Elenge mwasi Shepherd te. Mwasi yango akoki kozala awa, na ntongo oyo, pe nakoki koyeba ye soki namoni elongi na ye. Kasi, balobaki ezalaki Madame Shepherd. Pe soki esalemaki bongo, mpo ete soki. . . Soki nayebaki ezalaki Madame Bell nde azalaki kobela bongo, nalingaki mpenza kokende kobondela mbala moko mpo na ye. Na bongo, bomoni, yango, Nzambe alingaki te tosalala yango, ntango mosusu. Bongo: “Toyebi ete makambo nyonso oyo etambolaka elongo mpo na bolamu ya bato oyo balingaka Nzambe.”

⁹ Pe nayebi malamumu ete Ndeko mwasi Bell alingaki Nkolo na biso. Azalaki mwasi malamumu. Bongo, azali moko kati na biso. Awa, tokabolaka bato mpo na loposo te. Libota na Nzambe ekabolaka bato na loposo te. Ata tozali motane, mwa mpembe, moindo, to mosaka, ezali na ntina te, mondele. Ata ndenge nini, tozali bandeko mibali pe basi kati na Klisto. Na bongo to—tolingi ye. Pe tokozanga ye, na losambo oyo. Nakozanga mpenza “ba-amen” minene, makasi, ya Ndeko mwasi Bell, kuna na litumu. Pe ezalaki biso kozongisa ye na ndako, azalaki koloba na ntina na Nkolo Yesu.

¹⁰ Pe soki nasosoli malamú, nauti koyeba likambo yango kala mingi te, kasi nakanisi matanga na ye ekosalema awa na losambo. [Ndeko Neville alobi: “Ezali bongo.”—N.D.E.] Mokolo ya mibale ekoya na [“Ngonga ya yambo.”] ngonga ya yambo. Pe nakanisi ete ngai na yo nde tokokamba milulu [“Ezali bongo.”] ya matanga yango.

¹¹ Kasi, lokola losambo, tozali kozanga moko na biso na ntongo oyo. Mpo na limemia ya Ndeko na biso ya mwasi Bell, totelema mwa moke, wana togumbi mitó.

¹² Nzambe na bomoi, Oyo apesaka pe akamataka bomoi; ndenge Yobo alobaki kala: “Yawe apesi, pe Yawe akamati; Nkombo na Yawe esanzolama.” Eleki mibu moke, Otindaki Ndeko mwasi Bell kati na biso, ete ázala moko kati na biso, na lisangana monene ya Nzambe. Pe totondi Yo mpo na pemela nyonso oyo ye azalaki mpo na biso, ndenge alingaki koyemba pe kotatola, pe atondisamaki mpenza na Molimo kino azalaki koganga pe kosepela. Pe azalaki na nsoni te mpo na Nsango Malamú ya Yesu Klisto, mpamba te, mpo na ye, Ezalaki Nguya na Nzambe mpo na lobiko. Komona mibu na ye kobakisama, pe ntango kobelema, oyo ekosengela na biso nyonso kozongisa monoko. Pe Olongoli ye kati na biso, na ntongo oyo, mpo ázala Liboso na Yo. Mpamba te, ezali solo ete ntango tolongwaka awa, tokómaka Liboso na Nzambe.

¹³ E Nzambe, totondi Yo mpo na nyonso. Tosengi ete Ópambola mobali na ye, moninga na ngai, James; mwana na ye ya mobali, bana na ye ya basi, bango nyonso. Toyoki ete mwana na ye ya mobali azali koya na nzela ya mpepo, uta Allemagne, kati na mapinga, azali koya awa, mpo na kopesa mama na ye mawei lokumu ya suka, awa na mokili. Motema ya elenge mobali yango ezali solo kolenga na ntongo ya lelo. Nabondeli mpo na ye, Nkolo. E Nzambe, pambola ye. Pambola Jimmy, pe ndenge ye. . . Komona ye kosala mosala kuna, ba-ngonga ebele ya bolembu, mpo na koleisa libota na ye. Nabondeli ete libota monene oyo ékabwana te, kasi libota yango ézala mobimba kati na Mboka wana, na ngámbo mosusu.

¹⁴ Tika ete, Nkolo, tókanga sikawa bibundeli pe nkamba na loketo, mwa makasi koleka, pe tókende sikawa na etumba, mpo na kobunda wana moko azangi na motango na póso eleki. Tobondeli ete Ósunga biso pe Ópesa biso makasi, pe Ósalisa biso ezali biso kokende liboso, pe tika ete, mokolo moko, biso nyonso tósangana lisusu elongo na ngámbo mosusu. Mpo tosengi yango na Nkombo na Yesu. Amen.

¹⁵ Sikawa, tika molimo ya ndeko na biso mwasi mawei épema na kimia. Nalingi koloba ete—ete liteya ya matánga na ye, ekosalema awa mokolo ya lomingo, to ya mibale, pe tolingi. . . Tokoyamba moto nyonso oyo akoya. Nabanzi Ndeko Neville awa

nde azali kobongisa makambo. [Ndeko Neville andimi—N.D.E.]
Pe ozalaki na yango. Bongo, lelo, ngai . . .

¹⁶ Bomoni, bato bazali mingi mpenza te. Soki efandelo ekoki kozala esika moko, mpo na Ndeko mobali pe Ndeko mwasi Slaughter kuna na sima. Nazwaki mbela na yo, Ndeko mwasi Slaughter, pe nabandaki kobondela mpo na . . . Ndeko mwasi Slaughter mosusu, Ndeko mwasi Jean Slaughter, oyo azali na malali epesaka móto makasi, tularémie. Azali mpenza kobela makasi, kasi tozali na kondima na Nzambe ete akoyoka malamumu.

¹⁷ Sikawa tolingi kotanga Makomi. Pe nalingi mpenza kolakisa na ntongo oyo, kozua ntango na ngai, mpo ete uta nazongi, kolongwa Arizona, ee, mongonga na ngai ebebi mwa moke.

¹⁸ Pe sikawa, lomingo ekoya, bobosana te, pe nakanisi ete Billy asili kotinda ma—mayebisi yango na poste. Pe ekozala liyangani moko ya molai mpenza, tokanisi, bongo boya mpenza na ntango malamumu. Tolingi kobanda mbala moko, na ngonga ya libwa na ndambo, to, nalingi koloba, ngonga ya zomi. Pe ntango mosusu, bomikanisela, na ngonga ya yambo to yambo na . . . ntango mosusu, to na ngonga ya zomi na mibale na ndambo, na ngonga ya yambo, na lolenge wana, ngonga misato to minei, to koleka, nakolinga kozua, pe kozua bobele Makomi. Bomema ekomeli ná lokasa ya kokoma, pe bokoma yango. Soki motuna ezali, botuna—botuna yango, bomoni, pe ntango mosusu tokoki kolimbola yango, kosala oyo tokoki kosala mpo na kosungu.

¹⁹ Sikawa, totanga naino biteni ya Makomi, sikawa. Nazali na bisika misato kati na Biblia, oyo nalingi kotanga. Ya liboso, soki bolingi kokoma yango, pe soki bozali na ekomeli. Nalingi kotanga, na ntongo oyo, bisika mingi oyo nako . . . to biteni mingi ya Makomi, nde, oyo nalingi kosalela. Ya liboso ekozala Petelo ya Yambo 5:8-10, Baefese 6:10-17, pe Daniele 12:1-14. Sikawa, ezali biso kotanga, tozua ntango na biso.

²⁰ Pene na bato nyonso bafandi. Na bongo, bobele bato moke nde batelemi, kuna na sima pe na pembeni. Kasi tokomeka kosilisa nokinoki pe kotika bino kokende, na sima tokobondela mpo na babeli.

²¹ Ezali na elenge mwasi moko alali awa, na ntongo oyo, azali kobela makasi. Nasosoli ete azalaki kobela makasi, lobi eleki. Pe na—nalingaki ete áyoka, naino, na ntongo oyo, liboso nábondela mpo na ye. Pe nayebi mpasi ya elenge mwasi yango. Azali kobela makasi, kasi tozali na Tata moko monene mpenza na Lola Oyo asila kolonga koleka bokono nyonso. Pe nazali na—na mwa . . .

²² Nasengaki Madame Woods soki akokaki kotanga yango, kasi a—asepelaki mpenza ko—kosala yango te. Likambo moko, oyo ekamwisaki mpenza monganga moko. Nzokande, azalaki kotiola lobiko na nzoto uta na Nzambe pe azalaki ata kopekisa bato kolobela likambo yango na biró na ye; na ba-infirmiers na ye pe. Na bongo, esalemaki ete, ayambaki mobeli moko oyo azalaki na

bokono ya kanser, kanser monene. Alingaki na ye kotala yango te, bongo atindaki mobeli yango na lopitalo mosusu. Kuna pe balingaki kotala yango te, bongo bazongisaki ye kuna. Bongo bango. . . Oh, ezalaki likolo ya libéle, pe ezalaki kosala ye mpasi mpenza. Pe loposo yango nyonso eliamaki. Pe kanser yango, ekotaki kino na libéle, kino na mipanzi. Nakanisi bozali kososola nini nalingi koloba.

²³ Babengisaki moninga na biso, elenge monganga ya Norvège, oyo azali elongo na biso na ntongo oyo.

²⁴ Ye alengelaki bisalelo na ye nyonso, mpo alobaki ayebaki ete—ete mobeli alingaki bápasola ye pe bálóngola libéle. Pe ezalaki mosala moko ekobimisa makila mingi. Pe—pe azalaki na ba-bande na ye nyonso, nyonso wana. Infirmier alengelaki mwasi yango pe amemaki ye na ndako ya lipaso, na sima azongaki mpo na kozua pe bisalelo, oyo monganga pe mosungi na ye balingaki kosalela, mpo na kolongola libéle yango. Na bongo, batiaki bilamba ná biloko mosusu likolo na ye. Bongo, balingaki. . .

²⁵ Ntango alingaki kobanda, mobali na ye atunaki soki akokaki kokota pe kofanda na suka ya ndako mpo na kobondela. Azalaki motei ya bosantu. Pe afandaki wana pembeni ya makolo ya mbeto, pe kobondela. Na bosolo, monganga asepelaki mpenza na yango te, boyebi, ndenge ye azalaki na kati. Kasi lokola azalaki kotala te, étungisaki ye pe te, ee: “Nakanisi ezali mabe te; ako—akosenzwa te.”

²⁶ Bongo, efandaki ye wana, na mabondeli, makelele moko eyokanaki na kati ya ndako. Monganga pe abaluki mpo ákende, ná bisalelo na ye, mpo ábanda kolongola libéle yango. Alongolaki bande moko sima na mosusu. Ata nzoloko moko ezalaki likolo ya libéle yango te; ata nzoloko moko te. Alobaki: “Boye—boye yango. . . Boye yango etambolaka?” Pe abandaki. . . Pe infirmier apesaki litatoli na ye. Bango mibale babimaki pe bakómá ba-pantekotiste, oyo batondi na Molimo Mosantu, bazali kosalela Nkolo. Ata nzoloko moko te!

²⁷ Monganga Holbrook atitolaki, ye moko, alobaki: “Miniti moko liboso, mwa—mwasi yango alalaki wana, ná infirmier, ná kanser monene oyo evimbaki likolo na libéle na ye. Pe miniti moko na sima, ata nzoloko moko te etikalaki na esika oyo yango elongolamaki.” Azali moko na minganga na biso ya solosolo awa na Amerika. Alobaki ete andimisamaki mbala moko. Pe ye, ata bongo, azalaki mosungi na lingomba moko. Bomoni?

²⁸ Bomoni, bato bakanisaka ete lingomba ezali bobele esika bato bakendeke, pe ezali: “Oh, bakendeke kuna koyekola kozala malam, to eloko moko ndenge wana.” Ezali bongo te, moninga. Te. Nzambe azali Nzambe. Azali mpenza monene lelo ndenge Azaláká, ndenge Azalaka. Pe Akozala ntango nyonso ndenge moko. Pe Azali. . . Tolingaka bobele Ye.

29 Sikawa, tolingi kotanga sikawa na Petelo ya Liboso, mokapo ya 5, nzela ya 8 pe ya 10, mpo na kobanda.

Bomisenzela, bolala mpongi te; motemeli na bino, zabolo, azali kotambola. . . nkosi konguluma, kolukaka soko akolia nani:

Botemela ye ngwi. . . na kondima, boyeba ete mpasi na motindo moko mpenza ezali kokómela bandeko na bino na bipai mosusu na mokili.

Nde Nzambe na ngolu nyonso, ye oyo abiangi bino ete bokota na nkembo na ye na seko kati na Yesu Klisto, ye moko akokokisa bino, akolendisa bino, akopesa bino makasi, esili bino koyoka mpasi mwa ntango moke.

30 Oh, Nzambe asanzolama! Sikawa na Buku ya Baefese. Tolingi kotanga awa na Buku ya Baefese, mokapo ya 6, pe tolingi kotanga na nzela ya 10 kino ya 17, nakomaki yango.

Na suka, bandeko bomikembisa kati na Nkolo pe na makasi na nguya na ye.

Bolata molato mobimba na etumba na Nzambe ete boyeba kotelema liboso na mayele na zabolo.

Zambi tozali kobunda na makila pe mosuni te, kasi na bisika na lokumu pe na nguya pe na mikonzi ya mokili—na mokili oyo na molili, pe na milimo mabe kati na likolo.

Yango wana, bokamata molato mobimba na etumba na Nzambe ete boyeba kotelema na mokolo na mabe, . . . sima na kosala nyonso, kotelema naino.

Bongo botelema na loketo lokangami na sembo, . . . na kolata boyengebene lokola ebolo makasi na ntolo,

Pe koselingwa na sapato na makolo lokola bantoma na Nsango na kimia.

Pe na yango nyonso, . . . nguba na kondima, na yango bokoki kozimisa mbanzi nyonso na móto na oyo mabe.

Bokamata ekoti ya lobiko pe mopanga na Molimo, yango Liloba na Nzambe:

31 Sikawa na Buku ya Daniele, nalingi kotanga biteni mosusu. Sikawa, Daniele mokapo ya 12. Nalingi kobanda na nzela ya 1, pe nakotanga e—eteni ya molai mpenza na oyo, nzela zomi na minei.

Na ntango yango Mikaele, mokonzi monene oyo mobateli na bato na yo, akotelema; . . . ntango na bolozu ekozala, lokola ezalaki te longwa na ebandeli na mabota kino na ntango yango; nde na ntango yango bato na yo bakobikisama, moto na moto oyo akomami na mokanda.

Pe mingi na baoyo balali na kati na putulu na mokili bakolamuka, pe bamosusu mpo na kozua bomoi ya

seko, . . . bamosusu mpo na koyoka nsoni pe botiolami ya seko.

Pe baoyo bazali na mayele bakongenga lokola nkembo na likolo, pe baoyo bateyaki—bateyaki bato mingi boyengebene, bakongenga lokola minzoto seko na seko.

Nde yo, Danyele, bomba ma—bomba ma . . . mokanda, kino na eleko na suka. Bato mingi bakopota bipai na bipai, pe boyebi ekofuluka.

Na sima ngai, Danyele, natalaki pe tala, mibali mosusu mibale batelemaki, . . . moko na libongo oyo pe moko . . . na libongo yango na ebale.

Pe moko na bango alobelaki moto oyo alataki molikani, oyo atelemaki na likolo na mai na ebale, ete, Ekozala ntango molai boni kino suka na . . . bikamwiseli oyo?

Pe nayokaki oyo elobaki moto yango alataki molikani pe atelemaki na likolo na mai na ebale. Atombolaki loboko na ye ya mobali pe loboko na ye ya mwasi epai na lola pe alayi ndai na nkombo na ye oyo azali na bomoi seko na seko ete, ekozala mpo na ntango moko, ntango moko, pe ndambo na ntango, pe wana ekosila bango kobuka nguya na bato na bulee, makambo oyo . . . makosila.

³² Nakanisi nakosuka bobele wana. Nakozua motó ya liteya, soki ekobengama motó ya liteya, uta na yango, mpo na kosuka koloba boye: *Etumba Monene Koleka Oyo Ebundámá*. Yango nde nalingi kosalela lokola motó na liteya.

³³ Sikawa, ndenge nazuaki yango lokola motó na liteya ya ntongo oyo. Touti kozonga; ndambo na bayangeli na misolo, ya lingomba oyo, ná ngai moko, tozalaki na Arizona. Pe tokendeki kuna, mpenza, mpo na kosala liyangani na Phoenix, elongo na Ndeko Sharrit, na losambo na ye. Kasi ntango namonaki ete nde—ndeko moko azalaki na engumba yango, kosala mayangani na nse na hema, ee, bongo namiyokaki mwa kilo mpo na kosala liyangani. Nakanisaki ntango mosusu nakokaki kosala yango mokolo ya lomingo sima na nzanga, mpo ekoka kotungisa moto moko te, na ba-losambo na bango. Kasi, namonaki ete azalaki pe kosala mayangani mokolo ya lomingo sima na nzanga. Pe, natungisamaki mwa—mwa moke mpo na kosala liyangani.

³⁴ Bongo, biso bandeko, na esika tokoba moi mobimba, lokola tozalaki na bokila, tokendeki na engumba, pe tomilengelaki, pe tokendeki na mayangani ya Ndeko Allen. Ndeko A.A. Allen azalaki kosala mayangani. Bongo tokendeki na mayangani yango, pe Ndeko Allen ateyaki liteya moko ya nguya. Tolekisaki nta—ntango moko, ntango kitoko, koyoka Ndeko Allen, koyoka ba—bayembi, pe nyonso wana, lolenge bazalaki koyemba, pe koganga, pe ezalaki liyangani moko kitoko.

35 Na sima tomonaki, na nzela nyonso, loboko na Nkolo. Bisika nyonso tozalaki kokende, Nkolo Yesu azalaki elongo na biso. Pe ezali likambo ya ndenge mosusu kozala yo moko, kuna na zamba. Ezali na likambo moko na yango, soki ozali yo moko lolenge wana, eloko moko ekobenda yo. Ezali yango, nakanisi, ezali ntina moko nalingaka bisika ya mosika. Kokende mosika na nguya ya moyini, oyo etondi awa boye.

36 Molimo mabe ekoki kosala mpenza mabe te, soki ezui eloko ekoki kosalela te, esengeli na yango. Bomikanisela milimo mabe oyo babenganaki na Ebele, bazalaki na ye? Balingaki kosala mabe koleka, yango balingaki kokota na bangulu. Na bongo, milimo mabe esengelaka kozala na eloko ekosalela, moto ya kosalela.

37 Nzambe pe asalaka bongo. Asengeli kozala na biso. Azali kotalela biso, mpo Asala na nzela na biso.

38 Pe, na mobembo yango, bato mingi bayaki na ba-ndoto. Pe Nkolo Yesu azangaki soki moke te kopesa ndimbola na bosolo, pe ezalaki bongo, ezalaki bongo mpenza.

39 Pe lisusu, Azalaki malamu mpo na biso, kokamba biso na bokila pe kolakisa biso esika nyama ezalaki. Pe, boyebi, kozala kuna ndenge wana, ezali kitoko mingi. Kofanda, na butu, pene na móto, mosika na bato nyonso, na ba-kilometre na kilometre na kilometre, pe kotala lolenge lototo na móto ezali kosala na mabanga. Pe, oh, ezalaki kitoko mingi!

40 Ndeko moko azalaki kuna, mwasi na ye azalaki kotungisama, azalaki na . . . Eleki mibu mingi, mwasi yango atombolaki motó kati na liyangani, epai nazalaki koteya. Nayebisaki bato bagumba motó; molimo mabe moko ezalaki koboya kotika mwa—mwasi moko, na eteyelo. Pe mwasi yango, azangaki limemia, atombolaki motó ata bongo. Pe molimo yango etikaki mwasi yango, na eteyelo, pe ekendeki likolo na ye. Pe likambo yango esili koleka mbula zomi na minei, mwasi yango akóma kobela makasi; kobela mpenza, pene na liboma, akómá kosala makambo ezali mpenza na molongo te. Ndakisa, atikaki mobali na ye moko, pe abalanaki na mobali mosusu, na ntango azalaki kobika na mobali na ye; alobaki ete ayebaki te ete asalaki yango. Na bongo, ba—bamekaki kotalatala ye mpo na yango. Babengaka yango nde nini, ntango moto. . . Kobosana makambo? Yango. . . Oh, ata ezali nkombo nini. Nakanisi ezali bongo, monganga. Kasi ezalaki yango te. Ezalaki molimo moko. Pe ye. . . Pe mwasi yango azalaki moninga na ngai mpenza. Kasi uta na mpokwa wana, ayinaki ngai na nko. Na ntembe te, bokoki komona ntina yango.

41 Kasi bongo, ntango mobali na ye ayaki, pe tofukamaki na ndako mpo na kobondela, Molimo Mosantu akitaki. Likambo esilaki. Na sima, Amonanaki na mobali na ye na butu wana, na ndoto. Ayaki lisusu na ndoto, amonaki yango ndenge mosusu. Na

suka emonanaki ete ezalaki mpenza eyano mpo na kobikisama ya mwasi na ye. Oh, ezalaki lolenge ya kosala ya Molimo mosantu!

⁴² Tokendeki kino na Tucson, ná Ndeko Norman ná bamosusu, kuna pe Nkolo abandaki kosala makambo minene, ya nguya pe Amonisaki makambo.

⁴³ Na mpokwa moko, yango nde ememaki ngai kosukisa boye, nazalaki elongo na Ndeko Wood pe Ndeko Sothman. Pe tozalaki...Ezalaki pene na ngonga ya zomi ya butu, natombolaki miso likolo, na mapata, pe likambo na kokamwa ekómelaki ngai. Pe nalobaki: “Botala! Mapinga monene nyonso wana ya lola!” Pe nalobaki: “Biloko nyonso ezali na molongo mpenza.”

⁴⁴ Pe Ndeko Wood alobi: “Kotala minzoto mibale wana, lolenge ezali pene, ete, ezali komonana lokola pole moko.”

⁴⁵ Nalobaki: “Kasi, oyebi, Ndeko Wood, kokokana na mayele ya bato, na Lisanga ya minzoto, Lisanga moke ya Minzoto, Lisanga monene ya Minzoto, kotala minzoto yango okoloba ete ekabwani na ntaka ya centimetele mitano te; kasi ezali mosika moko na mosusu koleka lolenge tozali na yango. Pe soki ebandi koya na mabelé, ekosala, na mbangu ya kilometele nkoto na ngonga, ekosala mbula nkama na nkama liboso ékóma na mabelé.” Pe nalobaki: “Na kati ya lisanga mobimba pe monene oyo, na bongo bayebisaka biso ete ntango batalaka na etaleli ya minzoto, bamonaka na ntaka ya milió nkama na ntuku mibale ya mibu ya pole, mosika mpenza; pe ezali na ba-sanza pe minzoto mosusu. Pe—pe, ata bongo, Nzambe nde asalaki yango nyonso. Pe Ye afandi kati kati na yango.”

⁴⁶ Nalobaki: “Na esika moko kuna na kati, balakisaki ngai, mokolo moko na etaleli ya minzoto, zodiak; ebandaka na mongondo, eleki na eleko ya kanser, pe bongo na bongo kino na suka, ezalaki nkosi, Leo nkosi. Boyei ya liboso ya Klisto, na nzela ya mongondo; boyei ya mibale, na nzela ya Nkosi ya libota na Yuda.” Pe nalobaki: “Namekaki na makasi na ngai komona zodiak yango, kasi nakokaki te. Ata bongo, ezali wana. Baoyo bayékólá yango, bayebi ezali wana. Yobo amónáká yango. Kalakala, bato bazaláká kotala yango. Na ntango moko, ezaláká Biblia. Kasi kati na ebele ya ba-milió na ba-milió ya—ya mibu ya pole, Nzambe afandi kati kati na yango nyonso, pe Azali kotala na nse. Polo azali kuna. Mama na ngai azali kuna, esika moko, azali kotala na nse.”

⁴⁷ Pe nazalaki kokanisa molongo ya mapinga ya lola, ata moko te na yango ezali libanda na esika na yango. Moko na moko ezali na esika na yango mpenza. Mapinga monene ya Nzambe! Nakanisaki basodá; soki esalemi ete sanza ebimi na molongo, mokili ekotonda lisusu na mai, bobele na miniti moke. Mokili ekókóma mpenza lolenge ezalaki ntango Nzambe

akanaki kosalela yango, mpo Atia biso awa. “Ezalaki na lolenge te, bobele mpamba, ná molili, pe mai ezalaki likolo na etando na mokili.” Pe soki sanza elongwe na esika na yango, likambo yango moko ekosalema lisusu. Soki sanza etangwe mwa moke na mabelé, mai ekomata. Soki ekiti, mai ekolanda yango. Ezali mapinga monene ya Nzambe. Ntango nakanisaki yango . . . ete yango ezali mapinga monene ya Nzambe kuna.

⁴⁸ Bongo, tokendeki kolala. Na sima, nabandaki kokanisa ete moko te kati na yango elongwaka na esika na yango. Yango nyonso ezali na esika na yango. Pe soki moko etangwe, na esika moko, ezalaka na ntina, pe yango ekoningisa mokili. Tozali komona mbano na yango sikawa, ndenge mosusu na yango ekendeke bisika mosusu. Ekotalisa mbano yango. Ekoningisa biloko nyonso.

⁴⁹ Na bongo, nakanisaki, soki mapinga monene ya lola, ndenge wana, esengeli kotikala esika na yango, mpo nyonso ézala na molongó, ezali boni na mobulu ya mapinga ya mokili oyo? Lolenge, soki eloko moko ebimi na molongó, ekótisaka nyonso na mobulu! Mwango mobimba ya Nzambe ekokota na mobulu soki enama moko ebimi na molongó. Tosengeli ntango nyonso kosala makasi kobatela molongó ya Molimo.

⁵⁰ Pe nakosepela, mpo na Nzambe, na ntongo oyo, ete likambo oyo emema biso na liyangani ya solo ya lobiko na nzoto, ete tokoka kobatela eteni oyo . . . etonga tosangisi na ndako oyo na ntongo ya lelo, kati na boyokani mpenza, ete Molimo Mosantu átia enama moko moko ya Nzoto, oyo azali awa na ntongo oyo, kati na boyokani, kino lobiko ya molimo pe ya nzoto esalema na mpwasa, soki tokoki kotikala na bisika na biso.

⁵¹ Sikawa, ndenge nalobaki na ebandeli, mwasi oyo azalaki na kanser oyo monganga Holbrook alongolaki . . . alingaki kolongola. Sikawa, Nzambe oyo akotisaki makelele ya koningana wana na lopitalo, pe Alongolaki kanser yango kozanga kotika nzoloko, boyebi te ete Nzambe yango moko azali awa? [Losambo balobi: “Amen.”—N.D.E.] Pe eloko bobele moko Azali kozela, ezali ete mapinga na Ye—na Ye bazua bisika na bango, lokola minzoto, babatela bisika.

⁵² Sikawa, boyebi, tosila kozua bitumba ya ndenge na ndenge, pe nsango na bitumba? Pe soki mokili eumeli, tokozua bitumba mingi koleka. Kasi boyebaka ete, na bosembo, na mokili mobimba, ezali bobele na nguya mibale? Na bokesene na biso nyonso kati na bikólo, pe bokesene kati na biso, pe nyonso wana, nyonso ezali kosuka na nguya mibale. Ezali na nguya bobele mibale, pe ezali na bokonzi bobele mibale; nguya mibale, pe bokonzi mibale. Nyonso etikali, makambo mike-mike, ekangami na nguya yango moko to mosusu. Pe ba-nguya yango ezali nguya ya Nzambe pe nguya ya Satana. Yango nde . . . Bitumba nyonso, mobulu nyonso, makambo nyonso esalemaka, ekonzamaka na

nguya ya Nzambe, to na nguya ya Satana, mpo ‘te bobele yango mibale nde ba-nguya oyo ezali. Pe ezali nguya ya bomoi pe nguya ya liwa. Na bongo, ezali ba-nguya yango mibale.

⁵³ Pe Satana akoki bobele . . . Nguya na ye, azali na yango, ezali nguya ya Nzambe oyo ebebisami. Ezali nguya ya solosolo te. Ezali kobebisama ya nguya ya Nzambe, nyonso oyo Satana azali na yango. Liwa ezali bobele bomoi oyo ebebisami. Lokuta ezali bobele solo oyo elobami mabe. Bomoni? Ekobo ezali li—likambo oyo esalelami mabe, likambo ya sembo esalelami mabe. Bomoni? Nyonso Satana azali na yango ezali eloko oyo ebebisami, kasi ezali nguya.

⁵⁴ Pe, lelo, lokola tofandi awa, nguya moko to mosusu nde ezali kokonza biso. Na bongo, tobengana oyo ya mabe. Tozua esika na biso lokola minzoto ya likolo.

⁵⁵ Ndenge Biblia elobi: “Minzoto ya kotelengana,” na Buku na Yuda, “babimisaka makambo ya nsoni lokola fulufulu ya mbonge.” Kasi biso toboi kozala minzoto ya kotelengana; komituna soki likambo *oyo* ezali malamumu, komituna soki likambo *wana* ezali malamumu, komituna soki ekosalema, komituna ekosalema ndenge nini. Botelenganaka te. Bozala wana lokola minzoto ya likolo, lokola sodá ya solo esika na ye ya mosala. Botelema wana, na kondima! Bomoi pe liwa.

⁵⁶ Sikawa, mapinga, ntango mpenza mapinga, ekólo moko emilengeli mpo na kobundisa ekólo mosusu, basengeli liboso kofanda pe kotala malamumu ná mabe, pe soki bazali na makoki ya kokende kobundisa ekólo yango to te. Yesu ateyaki yango. Pe soki bato basali yango, soki bikólo ba—bafandi nye, batelemi pe bakanisi makambo yango, ngámbo nyonso mibale, tokozala lisusu na bitumba te.

⁵⁷ Sikawa, tomoni ete, soki moto asali yango te, soki bakonzi ya mapinga ya ekólo bafandi liboso te, mpo na kotala pe koyeba soki bazali sembo, soki ntina pe mposa na bango ezali sembo, pe soki bazali na makasi pe nguya ekoki ya kolonga mapinga mosusu, soki te, na bosolo bakolonga te.

⁵⁸ Wana nde esika Général Custer asalaki libunga na ye monene. Général Custer, na ndenge nasosoli, azuaki mitindo ya léta, ete ákota na mboka ya ba-Sioux te, mpo ezalaki eleko na bango ya kosambela. Ezalaki eleko ya mabondeli. Bazalaki na feti. Kasi Custer alangwaki, pe akanisaki ete, ata bongo, akosala yango. Akatisaki ndelo, mitindo épesama to épesama te. Na bongo, babetaki bato bayebaki likambo te masasi, babetaki bango masasi. Nakanisi ezuaki bamosusu na bango. Bazalaki banongi, oyo bakendeki koluka bilei, mpo na koleisa ba—bato na bango ntango bazalaki kosambela. Pe Custer, ntango akatisaki, amonaki bango, pe akanisaki bazalaki kolanda bango, bongo babetaki banongi yango masasi. Pe banongi yango bakimaki, bazongaki. Basalaki nini? Bazuaki bibundeli, pe

bango bazongelaki bango. Pe ezalaki suka ya Général Custer, mpo ete afandaki na nse te mpo na kokanisa, liboso.

⁵⁹ Azalaki na likambo ya kosala kuna te. Azalaki na ndingisa ya kozala kuna te. Ata bongo, asilaki kobengana ba-Indien, longwa na Ngámbo ya Estí kino na Westí. Pe basalaki boyokani, kasi abukaki boyokani. Pe ntango abukaki boyokani, wana akweyaki na etumba.

⁶⁰ Na bongo, mapinga, na liboso, ezali bango komilengela mpo na etumba, na liboso, esengeli kopona, ba-sodá. Esengeli na bango kolatisama molato ya etumba. Esengeli na bango koyekolisama mpo na etumba.

⁶¹ Pe nandimi ete etumba monene koleka oyo ebundámá, elingi sikawa kobanda. Nandimi ete Nzambe azali kopona ba-sodá na Ye. Nandimi ete Azali kolatisa bango, koyekolisa bango. Pe libanda na etumba esili kobongisama, bamilengeli mpo na kobanda.

⁶² Etumba monene oyo, ya liboso oyo ebundámá, ebandaki na Lola, ntango Mikaele ná Banje na Ye babundaki na Lusifele ná banje na ye. Ebandaki liboso, etumba ya liboso ebandaki na Lola. Bongo, lisumu ebandaki na mokili te, ebandaki na Lola.

⁶³ Na sima ekitaki longwa na Lola, ebwakamaki longwa na Lola, kino na mokili, pe ekweyaki likolo na bato. Bongo, etumba yango, longwa na banje, ekómaki etumba ya bato. Pe Satana ayaki mpo na kobebisa bokeli ya Nzambe, oyo Nzambe akelaki mpo na Ye moko. Ye, Satana, ayaki mpo na kobebisa yango. Yango nde mposa azalaki na yango, ezalaki kobebisa yango. Na bongo etumba ebandaki awa na mokili, pe ebandaki kati na biso, pe ezalaki konginda uta ntango wana.

⁶⁴ Sikawa, liboso etumba nyonso ebanda kosalema, esengelaka liboso kopona esika ya kokutana, to esika oyo etumba yango esengeli kosalema, esika oyo eponami.

⁶⁵ Na Etumba ya Liboso ya Mokili Mobimba, yango etiamaki bongo, na esika ya moto moko te, pe bisika bazalaki kobunda. Basengeli kozala na esika baponi.

⁶⁶ Ndakisa, ntango Yisalaele bakendeke kobunda na Bafilistia, ezalaki na ngo—ngo—ngomba ngámbo na ngámbo na esika bayanganaki. Na esika wana nde Goliata abimaki pe abengaki mapinga ya Yisalaele. Wana nde Dawidi akutanaki na ye, na lobwaku, ntango akatisaki mai moke oyo ezalaki kotiola katikati ya ngomba yango mibale, alokotaki mabanga.

⁶⁷ Esengeli na esika oyo eponami. Pe kuna, ezali e—esika mpo na ngámbo nyonso, esika ya moto moko te, pe bakobunda *wana*, na esika yango. Ekozala te, etumba moko *awa*, pe etumba mosusu *kuna*, pe moko akimi ngámbo *oyo*. Ezali na libanda ya etumba moko, epai bakokutana pe bakomeka nguya na bango, epai mapinga moko na moko ekomeka makasi na yango

kotelemela mapinga mosusu, esika ya bokutani bobele moko. Sikawa, (bósosola) bózanga likambo oyo te.

⁶⁸ Ntango etumba monene oyo ebandaki na mokili, esengelaki na esika ya bokutani bobele moko. Esengelaki na esika moko éponami mpo etumba ébanda, pe etumba énginda. Pe esika ya etumba yango ebandaki na makanisi ya moto. Wana nde esika etumba ebandaka. Makanisi ya moto eponamaki lokola esika ya etumba, epai ebandaki, pe ezali mpo ete mikano ezuamaka uta na makanisi, motó. Sikawa, babandaki yango na ebongiseli moko te. Babandaki yango na likambo ya mekanike moko te. Ebandaki na bisika wana te. Yango wana, ebongiseli ekoki soki moke te, soki moke te kosala mosala ya Nzambe, mpo ete esika ya etumba, oyo osengeli kokutana na monguna na yo, ezali na makanisi. Esengeli na yo kopona. Ekokutana na yo.

⁶⁹ Nalingi ete elenge mwasi oyo, oyo azali kobela makasi, ázanga koyoka likambo oyo te, na bokebi mpenza.

⁷⁰ Mikano ezuamaka na makanisi, na motó. Kuna nde esika Satana akutanaka na yo, pe esika mikano ezuamaka, mpo ete Nzambe asálá moto lolenge wana.

⁷¹ Sikawa, ngai (soki botalaki makambo nakomaki awa) nayemaki kalati moke. Nazalaki na yango awa, kala mingi te, na . . . tosalelaki yango na etánda. Moto asálémá mpenza lokola mbuma ya lisangu. Ezali momboto. Pe moto azali momboto. Na nzoto, ozali momboto ya tata pe mama na yo; pe bomoi eutaka na tata, mosuni eutaka na mama. Na bongo, yango mibale, elongo, líki ná ma—makila, ekosangana. Pe na kati ya makila, bomoi ezali. Pe kati na yango, ekobanda kokóla, mpo na kosala mwa—mwana. Bongo, momboto nyonso ezalaka na mposo na libanda; na kati ezali mosuni; pe na kati ya mosuni, nkona ya bomoi ezali. Ee, tosálémá nde bongo. Tozali nzoto, bomoto ya kati, pe molimo. Na libanda, nzoto, mposo; na kati na yango, lisosoli pe bongo na bongo, ezali bomoto ya kati; pe kati na bomoto ya kati, ezali molimo. Pe molimo ekonzaka mosusu nyonso wana.

⁷² Sikawa, soki bofandi, ntango bokokóma na ndako, pe boyemi mabungutulu mike misato. Bokomona ete nzoto ya libanda ezali na ba-nzela mitano, mpo na kokota na boyokani na yango, ezali komona, koyoka elengi, komama, koyoka nsolo, koyoka. Yango nde biyokeli mitano oyo ezali kokonza nzoto ya moto.

⁷³ Na kati ya nzoto, bomoto ya kati ezali, pe bomoto ya kati yango ekonzami na makanisi, lisosoli, kokundola makambo, mayele, pe bolingo. Yango nde ekonzaka bomoto ya kati.

⁷⁴ Kasi, molimo ezali bobele na nzela moko. Molimo . . . Oh, tózua yango. Molimo ezali na nzela moko, pe nzela yango ezali, oyo ekonzaka yango, ezali kondima, to ntembe. Ezali mpenza yango. Pe ezali bobele na balabala moko mpo na yango, ezali bonsomi ya kopona. Okoki koyamba ntembe to okoki koyamba kondima, moko to mosusu, oyo olingi kosalela. Yango wana,

Satana abandaka na eteni ya motuya, komema molimo na moto kobeta ntembe na Liloba na Nzambe. Nzambe abandaka na eteni ya motuya, kotia Liloba na Ye kati na molimo yango. Yango wana. Yango nde esalaka mosala.

⁷⁵ Soki lingomba oyo, bobele sikawa, ekoki kosangisama pe kotiyama elongo na lolenge ete bato nyonso bákóma na boyokani moko, na ntembe ata moke te esika moko, ekozala na moto ata moko te na bolembu kati na biso, sima na miniti mitano. Ekozala na moto moko te awa na mposa ya Molimo Mosantu, kozanga ete ázua Yango, soki bokoki bobele kobongisa likambo yango. Na bongo, ezali wana nde etumba ebandaka, na kati ya makanisi na yo, soki olingi.

⁷⁶ Sikawa, bomikanisela, ezali likambo ya Science Chretienne te, makanisi likolo ya eloko moko. Ezali te na...Makanisi eyambaka Bomoi, oyo ezali Liloba na Nzambe, pe ezali komema Bomoi. Makanisi na yo nde esalaka yango te. Kasi, Liloba na Nzambe, ekotaka na nzela ya makanisi na yo. Bomoni? Ezali makanisi te, ndenge bato ya Science Chretienne balobaka, makanisi likolo na eloko moko. Te. Ezali yango te.

⁷⁷ Kasi, makanisi na yo eyambaka Yango. Ekangaka Yango. Eloko nini ekonzaka makanisi na yo? Molimo na yo. Pe molimo na yo ekoyamba Liloba na Nzambe, pe yango nde ezali na Bomoi kati na Yango. Ekomema Bomoi kati na yo. Oh, ndeko! Ntango yango esalemi, ntango Bomoi eleki na nzela yango, kino kati na yo, Liloba na Nzambe ekomonisama kati na yo. “Soko bokoumela kati na Ngai, pe Maloba na Ngai kati na bino, na bongo bósenga oyo bolingi pe ekopesamela bino.”

⁷⁸ Bongo yango ekosala nini? Uta na kati ya motema, yango nde bomoto ya kati, longwa wana ekokoba, koleisa banzela nyonso. Kokoso ezali ete, tozali kotelema *awa* na ntembe mingi, komeka kondima oyo ezali *kuna* libanda. Osengeli kosukisa yango; pe kolanda nzela yango ná Liloba na Nzambe ya solo, na sima ekobima, yango moko, na ndenge na yango. Ezali eloko oyo ezali na kati. Yango nde ezali na motuya, oyo ezali na kati.

Satana abandaka kosala uta na kati.

⁷⁹ Sikawa, okoloba: “Nayibaka te. Namelaka te. Nasalaka makambo oyo te.” Yango ekosala eloko moko te.

⁸⁰ Bomoni, ezali likambo ya kati. Ata ozali malamau ndenge nini, ata ozali na bokóndé ndenge nini, ata ozali na bosembo ndenge nini, nyonso wana ezali malamau. Kasi Yesu alobaki: “Soki moto abotami mbala ya mibale te.” Bomoni? Esengeli eloko moko esalema na kati. Soki bongo te, ezali eloko bato babongisi, mpo na nse ya motema na yo, ozali na mposa ya kosala yango ata bongo. Ekoki kozala eloko bato basali te. Esengeli kozala eloko ya solo.

⁸¹ Pe balabala ezali bobele moko, oyo yango ekoki koleka, ezali nzela ya bonsomi ya kopona, kino kati ya bomoto ya kati,

na nzela ya makanisi na yo. “Moto azali ndenge makanisi ya motema na ye ezali.” “Soki olobi na ngomba oyo ete: ‘Longwa wana,’ pe soki otii ntembe na motema na yo te, kasi ondimi ete oyo olobi ekosalema, eloko oyo olobi ekopesamela yo.” Bososoli? [Losambo balobi: “Amen.”—N.D.E.] Yango wana. Bomoni? Wana nde esika ya etumba. Soki bokoki bobele kobanda wana, liboso.

⁸² Tozalaka na mposa makasi komona makambo kosalema. Tozalaka na mposa makasi kosala eloko moko mpo na Nzambe. Elenge mwasi oyo azali na . . . mposa makasi, na ntembe te, mposa makasi ya kobika. Azali na mposa ya kozala malamumu. Bamosusu bazali awa, bazali na mposa ya kozala malamumu. Pe ntango toyokaka nsango ya boye, lokola monganga, lisekwa ya bakufi, makambo minene ya nguya oyo Nzambe na biso asalaki, na bongo tokómaka na mposa makasi. Kasi likambo ezali ete, tomekaka, na ba-nzela yango, kokóma kokangama na eloko mosusu awa; lokola, lisosoli.

⁸³ Bato mingi mpenza, mbala mingi, balimbolaka Liloba mabe. Pe bato basosolaki ngai mabe na likambo yango, ya kobenga bato na etumbelo. Nalobaki: “Nandimaka mpenza te likambo ya kobenga bato na etumbelo,” elingi koloba te ete bosengeli kobenga bato na etumbelo te.

⁸⁴ Kasi moto moko akosimba moninga na loboko, koloba: “Oh, Ndeko John, oyebi? Ngai na yo tozali bazalani ntango molai. Yaka awa na etumbelo, fukama.” Azali kosala nini? Soki nazalaki na etánda awa, nakokaki kolakisa bino eloko azali kosala. Azali komeka kosalela bomoto na ye ya kati, kolingama. Ekosimba te. Ezali balabala yango te. Ya solo, yango te.

⁸⁵ Ntango mosusu azali kosalela (nini?) kokundola makambo, na nzela ya bomoto na ye ya kati. “Oh, Ndeko John, ozalaki na mama moko ya malamumu. Akúfá kala.” Kokundola makambo! Bomoni? Bokoki kosala bongo te.

⁸⁶ Esengeli kolanda nzela ya bonsomi ya kopona. Yo, yo moko, tika Liloba na Nzambe. . . Okoya te mpo mama na yo azáláká mwasi malamumu. Okoya te mpo ozali mozalani malamumu. Okoya mpo Nzambe abengi yo koyá, pe ondimele Ye mpo na Liloba na Ye. Liloba yango nde ezali na motuya nyonso. Liloba yango! Soki okoki kolongola makambo nyonso na nzela, lisosoli nyonso, biyokeli nyonso, pe otiki Liloba ékota, Liloba yango ekobota mpenza mbuma na yango.

⁸⁷ Awa, bomoni Yango ezipami na nini? Bokoloba: “Ee, sikawa,” bokoloba, “ee, makambo oyo, lisosoli ná biyokeli, pe nyonso wana, ezali na ntina moko te, Ndeko Branham?” Ya solo, ezali na ntina. Kasi soki otiki Liloba ékota, pe ozipi Yango na lisosoli, na ntango wana Ekokola te; ekokóma liloba ebebisami.

⁸⁸ Bosila komona mbuma malamumu ya lisangu kolonama na mabelé, pe eteni ya nzete kokwea likolo na yango? Ekobima na

kotengama. Ezala mowiti, eloko nyonso ekokóla, ekozala bongo, mpo eloko moko ekangi yango nzela.

⁸⁹ Ee, yango nde likambo ya Kondima ya ba-Pantekotiste na biso lelo. Totiki ebele na makambo mingi kokanga nzela na Yango, Kondima bateyaki biso, Molimo Mosantu oyo azali kobika kati na biso. Totiki ebele na makambo mingi, tozali kotala moto mosusu.

⁹⁰ Pe Zabolo alukaka ntango nyonso kolakisa yo ekweli ya moto moko, kasi akoluka komema yo mosika na litatoli ya solo, oyo ezali mpenza solo. Akolakisa yo, ntango mosusu, mokosi, oyo azali komekola makambo. Asalaki yango te, mpo azalaki komekola. Kasi soki euti na liziba ya solo ya Liloba na Nzambe: “Likolo pe nse ekoleka, kasi Liloba na Ngai ekoki koleka te,” Esengeli kotikala wana.

Omoni yango, elenge mwasi?

⁹¹ Esengeli koyambama na makanisi, na sima Endimami na motema. Na bongo Liloba na Nzambe ekokóma likambo ya solo, bongo nde biyokeli nyonso ya bomoto ya kati pe ya nzoto ekopetolama mobimba na Molimo Mosantu. Bongo eyokeli na yo ya Nzambe, lisosoli na yo ya Nzambe, nyonso ya bonzambe, ekotiola kati na yo. Ntembe ata moke te ekozala wana. Eloko moko te ekobima wana.

⁹² Eloko moko te ekoki koya kokundola makambo, mpo na koloba: “Ee, namikaniseli ete elenge Mwasi Jones amekaki komipesa na Nzambe, ná elenge Mwasi *Songolo*. Elenge Mwasi Doe amekaki komipesa na Nzambe mpo na lobiko na nzoto, mbala moko, kasi alongaki te.” Bomoni?

⁹³ Kasi soki nzela yango esukolamaki pe epetolamaki, pe etondisamaki na kati, na Molimo Mosantu, yango ekoki kozonga lisusu na makanisi te, ezala Madame Jones ná likambo nini asalaki. Ezali likambo na yo ná Nzambe, elongo, pe moto mosusu te, bobele bino mibale. Yango wana. Etumba na yo yango wana. Boma ye na ebandeli. Sukisa ye mbala moko. Etali te ntango boni etumba yango ekoumela. Ezali ete ósukisa yango mbala moko!

⁹⁴ Soki oyei, pe obombi makambo eleká ná lisosoli, pe nyonso wana, kokanisaka: “Ee, nakoki kokwea. Ekoki kozala solo te.” Bósala bongo te, ata moke te.

⁹⁵ Bwaka nyonso mpembeni, fungola nzela polele, pe loba: “E Nzambe, Liloba na Yo ezali Seko na Seko solo, pe Ezali mpo na ngai. Soki lingomba mobimba ekwei, soki mokili mobimba ekwei, kasi ngai nakokweya te, mpo nasimbi Liloba na Yo.” Etumba yango wana. Yango nde likambo.

⁹⁶ Mpo na nini Nzambe na Nguya Nyonso álongolaki kanser na libéle ya mwasi, kozanga ata nzoloko, pe Átika mwana moke kokufa? Te, misie.

⁹⁷ Elenge mwasi moko ayaki awa, kala mingi te, ya école secondaire. Mama na ye abengaki ngai, alobaki: “Ndeko Branham, mwana na ngai ya mwasi azali na bokono ya Hodgkin.” Ezali kanser esalemaka na matútú. Minganga bakamataki eteni ya mpota na mongongo na ye, batalisaki yango, pe ezalaki mpenza bokono ya Hodgkin.

⁹⁸ Bongo alobaki: “Oyo ekolanda, ekoki kokoma na motema na ye. Ntango ekosalema, ekosila mpo na ye.” Alobaki: “Azali te na . . . Ndenge yango ezali kosalema, atikali ntango mosusu na sanza misato, ya bomoi.”

⁹⁹ Mama yango alobaki: “Nakosala nini? Názungisa ye na kelasi?”

¹⁰⁰ Alobaki: “Botika ye ákende, mpo akoki kokufa na mpwasa.” Pe alobaki: “Botika ye ákende, pe abika lokola moto nyonso, ndenge alingi. Boyebisa ye eloko moko te mpo na yango.”

Na bongo mwasi yango ayebisaki ngai: “Násala nini?”

¹⁰¹ Nalobaki: “Yaka na ye awa pe lekisa ye na molongo ya mabondeli.” Pe nalobaki: “Yaka elongo na ye.” Namiyokaki moke ndenge mosusu.

¹⁰² Pe ntango elenge mwasi yango ayaki, na ntongo wana, ná mbebo nyonso ekómi bulé, na bipakola-pakola, ndenge esalemaka na biteyelo. Pe—pe elenge mwasi yango ayaki. Nayebaki te soki ekozala nani, oyo abengaki ngai na telefone. Nasimbaki ye na loboko. Nalobaki: “Mbote, ndeko mwasi.” Ezalaki ye. Ezalaki ye. Sima na ntango moke, nabwakaki miso epai ya mama na ye pe namonaki ete bango mibale bazalaki na Nzambe te, bazangaki Klisto. Nalobaki: “Ndenge nini bokoki kozwa kobikisama na lolenge oyo? Bolingi koyamba Yesu Klisto lokola Mobikisi na bino moko?” Nalobaki: “Bolingi koya na liziba oyo pe kobatisama na Nkombo na Yesu Klisto mpo na bolimbisi ya masumu na bino?”

Balobaki: “Tokosala yango.”

¹⁰³ Oh, boyebi likambo esalemaki. Mwasi yango akoki kozala awa na ntongo oyo. Mingi kati na bino bayebi likambo yango. Ndeko Mike Egan, moko na bayangeli awa, alandelaki likambo yango. Esili koleka mbula minei to mitano. Bazongaki na elenge yango epai na monganga, pe bamonaki ata elembo moke te ya bokono ya Hodgkin kati na ye.

¹⁰⁴ Ezalaki nini? Esengelaki liboso kofungola nzela. Esengeli kotia na esika ya etumba Sodá, Molimo Mosantu, oyo amemaka Liloba na Nzambe. Azali Liloba. Pe esika Ye ateleme, bongo eloko moko te ekopekisa Ye. Eloko moko te. Ba-nzela mosusu nyonso epetolami. Ezali lokola mombonda ya kala oyo ba-nzela na yango ekangami; soki opelisi móto, ekopanzana. Tala likambo ya Baklisto ebele oyo bapanzani, ezali mpo bapetolaka ba-nzela malamute, bakomaka kino na kati te. Bosengeli kosukola yango,

lisosoli, kokundola makambo, makanisi, kotia yango nyonso pembeni, longwa na kati kino libanda, ná Liloba na Nzambe oyo esangisami te, yango nde Ezali Solo.

¹⁰⁵ Ata bato nkoto zomi, bamipesaki, bakufi na ngámbo *oyo*, lelo; bato nkoto zomi, bamipesaki, bakufi na ngámbo *oyo kuna*, lobi; ezali na ntina te mpo na ngai. Ezali likambo na ngai. Ngai nde nazali komipesa. Ngai nde nandimi yango. Pe tokomona kuna, soki tolingi kofungola ba-nzela na biso ntango wana, soki ekokoka, mpo tomona. Tokomona moto *oyo* ná moto *wana*, pe moto *oyo* ná moto *wana*, bato nkoto na nkoto, bazali kotatola.

¹⁰⁶ Kasi Zabolo akomeka lisusu kozonga. Bomoni, soki akoki kozua nzela ya kokota, akopalanganisa mampinga na bino na ntango wana.

¹⁰⁷ Soki bozali na biyokeli na bino, komona, koleta, komama, koyoka nsolo, pe koyoka, ezali malamumu, kasi bomipesa na yango te soki ekokani na Liloba te. Ezali malamumu, kasi, soki ekokani na Liloba te, boyoka yango te. Sikawa, makanisi, lisosoli, kokundola makambo, kokanisa, ná kolinga, ezali malamumu soki ekokani na Liloba. Kasi soki kolinga na yo ekokani na Liloba te, bwaka yango. Okopanza mombonda mbala moko. Omoni? Soki kokanisa na yo ekokani na Liloba te, kabwana na yango. Ya solo. Masini. . . Soki kokundola makambo na yo, soki makanisi na yo, soki lisosoli na yo, eloko nyonso, oyo ekeseni na Eloko ezali kati na yo, kabwana na yango.

¹⁰⁸ Na ntango wana ozali na nini? Ozali na molongo ya moi. Aleluya! Ezali bongo, Nzambe atelemisa minzoto na molongo, pe alobaki: “Bótelema wana kino Nákobenga bino!” Batelema wana. Eloko moko ekonngisa bango te. Soki Nzambe akamati moto na maboko na Ye, kino kopetola biyokeli na ye, lisosoli, pe nyonso wana, pe atelema na Nzambe sima na ye, kati na molimo; molimo mabe ata moko te na mokili ekoki kokotisa ntembe kati na ye. Ya solo.

Akoya wana pe akoloba: “Ozali na yo koyoka malamumu te.”

¹⁰⁹ Ozali lisusu ata na lisosoli na yango te. Mombonda epetolami mpenza, ekoganga: “Aleluya!” Suka ya mombonda ezali kobeta piólóló: “Nkembo na Nzambe!” Ekongenga, na ntembe te, ekómi mpenza peto, mpo Liloba na Nzambe é sala na nzela yango, Nguya na Nzambe. Bomoni? Yango nde ezali na motuya.

¹¹⁰ Wana nde esika ya etumba na yo. Esika ya etumba na yo ezali awa, na ebandeli, awa kati na bomoto ya kati, na kati ya makanisi na yo, oyo efungwami. Ma—makanisi ezali ekuke ya bomoto ya kati, ekuke, nde, ya molimo. Makanisi na yo ekofungwama pe ekoyamba molimo, to ekoboya molimo. Okoki kozala na lisosoli moke, ba-mposa moke, koningana moke, pe nyonso wana. Yango ezali ata na ntina te. Ezali bobele koningana moke, pe nyonso. Kasi mpo na makambo ya bosolo, makanisi na

yo ekofungwama. Makanisi na yo, ekoyamba yango, to ekoboya yango. Ezali bongo, baninga.

E Nzambe, kotika te moko na bango ázanga yango.

¹¹¹ Omoni, makanisi na yo nde efungolaka ekuke; to ekangaka ekuke, pe eyokaka lisosoli na yo, eyokaka kokundola makambo na yo, eyokaka kolinga na yo. Kasi soki makanisi na yo emikangi na makambo oyo, pe etiki Nzambe, Molimo ya Liloba na Ye, kokota, Ekobwaka biloko mosusu nyonso libanda. Ntembe nyonso esili. Kobanga nyonso esili. Koningana nyonso ya ntembe esili. Mposa nyonso esili. Bobele eloko moko ekotikala wana ezali Liloba na Nzambe, pe Satana akoki kobunda na Yango te. Te, misie. Akoki kobunda na Yango te. Bongo, toyebi ezali solo.

¹¹² Bitumba oyo engindaki longwa na ntango ya elanga na Edene, etumba kati na makanisi ya moto. Satana nde abandaki yango. Asalaki nini ntango akutanaki na Ewa? Awanganaki Liloba na Nzambe te, kasi apakolaki Yango langi ya pembe. Akangaki ba-nzela mike mike awa, esika moko. Alobaki: “Bongo Nzambe na bosolo . . .” Genese 3:1. Bomoni? “Na bosolo, Nzambe, makambo nyonso oyo Ye—Ye—Ye alakaki . . .” Ayebaki ete Liloba ezalaki solo. Kasi ayebaki ete akokaki koya kobundisa Yango mbala moko na polele te, na makelele ndenge wana, kasi a—a—abakisaki maloba ya sukali likolo na Yango.

¹¹³ Ndenge mama azaláká komelisa biso kisi, azaláká komeka kotia mai ya malala na mafuta ya ricin. Oh, ezalaki malamumu komela mafuta ya ricin kozanga mai ya malala! Ezali eloko ya bilongi mibale! Bomoni? Ye. . . Esengelaki tólamuka na butu, pe azalaki kopesa biso pitoló, mpo na kosalisa bokono ya mongóngó. Azalaki kotia pitoló, pe kobakisa sukali; bomoni, eloko ya bilongi mibale. Kasi ezalaki kozikisa mongóngó, tóloba, ntango ezalaki kokita, soki sukali esili.

¹¹⁴ Ee, ezalaka nde bongo, moninga. Satana amekaka ko—kozala na bilongi mibale mpo na yango. Amekaka kolakisa yo eloko ya malamumu koleka, nzela ya pete koleka, mwango ya malamumu koleka. Kasi mwango ya malamumu koleka ezali te, bobele oyo Nzambe apesaki na ebandeli, Liloba na Ye. Simba Liloba yango makasi. Kangama na Yango. Tika Yango ékanga yo. Tikala wana na Yango. Yango nde—yango nde esengeli.

¹¹⁵ Etumba engalaki ntango Ewa afungolaki makanisi na ye, mpo na koyoka mabanzo na ye. Yango nde nzela ye akotelaki. Yango nde nze—nzela ye alandaki, mabanzo na ye. Ye, na bomoto na ye ya kati, abanzaki.

¹¹⁶ Miso na ye ezalaki mpo na komona. Amonaki nyoka. Azalaki kitoko, na bonzenga, kitoko mpenza koleka mobali na ye moko. Azalaki nyama oyo alekaki banyama nyonso ya elanga na mayele, pe mbala mosusu azalaki kitoko koleka mobali na ye. Azalaki lokola nyama oyo azalaki mobali mpenza, atelemaki

wana. Azalaki mpenza engambe! Pe azalaki komeka koyebisa mwasi ndenge likambo yango ezalaki na motuya.

¹¹⁷ Pe likambo ya liboso oyo asalaki, afungolaki makanisi na ye. Pe na ntango yango, mabanzo ya bomoto esimbaki yango. “Olala, ekozala mpenza malamau, boye te?”

¹¹⁸ Ezali likambo asalaka na mwasi lelo. Mwasi oyo azali na mobali na ye ya malamau, amoni engambe mobali moko, oyo azali mobali mpenza. Mobali yango akoluka kofungola nzela ya mabanzo. Bobosana te, ezali Satana. Ezali Zabolo. Na ngámbo moko to mosusu, mobali mpo na mwasi, to mwasi mpo na mobali, moko to mosusu. Akosala nini? Akosalela nguya ya mabanzo, lisosoli to eloko mosusu, akobanda kosala na nzela yango.

¹¹⁹ Kasi pesa esika ya liboso na Liloba na Nzambe. Moto akoki kokóma ata moke te na . . . Akoki kosala lisumu te . . . Aleluya! Yango oyo. Euti koyela ngai, bobele sikawa. Moto akoki kosala lisumu te kino ábwaka liboso Liloba na Nzambe pembeni. Akoki ata kosala lisumu te, elingi koloba, kozanga kondima. Soki naino atii Liloba na Nzambe pembeni te, Bozali na Nzambe, akoki kosala lisumu te.

¹²⁰ Ewa akokaki kosala lisumu te, kino atiaki Liloba na Nzambe pembeni, wana afungolaki nzela ya makanisi na ye, na bomoto na ye ya kati, pe abandaki kobanza-banza. “Kasi, ezali solo. Mobali na ngai naino ayebisa ngai makambo oyo te, kasi nandimi ete yo . . . Ayebisaki ngai, nasengeli kosala boye te, kasi, oyebi, ndenge olakisi yango, ezali solo pe polele mpenza. Na—nandimi ete ekozala kitoko mingi, mpo ndenge otalisi ngai yango, ezali polele mpenza.” Bomoni, etumba ya liboso ezalaki kuna. Pe etumba yango nde ebotaki bitumba nyonso mosusu. Pe makila nyonso oyo esila kosopana, ebandaki nde kuna na Edene. Azangaki kondima Liloba na Nzambe.

¹²¹ Pe soki kozanga kondima eteni moke ya Liloba na Nzambe, ebotaki mobulu nyonso oyo, tokozonga ndenge nini, wana tozangi kondima Liloba? Tokoki te. Esengeli kokanga nzela na makambo nyonso mosusu wana, lisosoli, kokundola makambo, pe koloba . . . mabanzo, pe makambo nyonso mosusu wana. “Tozali kokweisa mabanzo.” Tozali kobanza na ntina na yango ata moke te, soki moke te.

¹²² Tondimaka Liloba na moboko ya “Nzambe alobi bongo,” pe ezali kotia boyokani kati na yo ná Nzambe. Banzela nyonso efungwami kati na yo ná Nzambe, ntango yango.

¹²³ Etumba yango wana, ya liboso mpenza, ndelo ya etumba. Tósalela bondóki ya calibre ntuku mibale na mibale te; tokamata bo—bombe atomike. Tosala mosala ndenge esengeli. Tókamata bombe atomike ya Nzambe. “Ezali nini, Ndeko Branham?” K-o-n-d-i-m-a na Liloba na Ye. Yango nde bombe atomike ya Nzambe. Epanzaka maláli pe milimo mabe, ngámbo na ngámbo. E—esilisaka yango nye. Epanzaka . . . Oh, ezali . . . Ebebisaka

yango. Ebukaka nyonso ya bonzambe te. Soki bombe yango ya kondima ekwei na kati, ná Liloba na Nzambe sima na yango, epanzaka milimo mabe nyonso, bokono nyonso, malali nyonso.

¹²⁴ Okoloba: “Ezali ya solo, Ndeko Branham? Bongo mpo na nini esalaka epai na bamoko, kasi na bamosusu te?”

¹²⁵ Ezali nde likambo ya nzela. Okoki kobwaka miso libanda pe okomona yango. Kasi osengeli kozala na yango *awa* na kati, kotala ngámbo *oyo*. Libanda *kuna* te, tala na kati; esengeli ete ózala na kati, kotala libanda. Omoni? Okoki kolanda nzela ya mabanzo te. Okoki kolanda nzela ya makambo mosusu wana te. Osengeli kolanda mpenza nzela ya Nzambe mpo na yango, mbala moko kino na bomoto ya kati. Pe basalaka yango ndenge nini? Nzela ya suka ezali nini?

¹²⁶ Ekoban- . . .kino wana. Okoloba, biyokeli: “Oh, na—nazali koyoka yango. Iyo, ezali wana. Iyo. Oh, na—nazali koyoka nsolo na yango, to bongo na bongo. Biloko yango ezali wana. Iyo.” Eloko elandi, okobanza: “Ee, emonani lokola asengeli koyeba oyo azali koloba. Monganga alobi ete nakoki kobika te. Esengeli kozala bongo.” Omoni, na esika yango mpenza nde ozali—ozali na libunga. Zabolo nde azali wana. Zabolo nde azali kokotisa makambo yango kati na yo. Komeka kondima yango te.

¹²⁷ “Aleluya! Liloba na Nzambe elobi ete ngai. . . ‘Na makambo nyonso, Nalingi ete ozala na nzoto kolongonu.’ Ya solo.” Okoki kozala sodá ya solo ndenge nini kuna? Omoni: “‘Nalingi ete ózala na nzoto kolongonu.’”

¹²⁸ Ezali yango, wana mpenza, ba-nzela yango. Ofungola yango mpenza. Koleka pembeni na yango te.

¹²⁹ Bongo soki Satana akoki kolekela wana, koleka na nzela ya lisosoli pe makambo mosusu nyonso oyo, na sima akokita kino awa, kati na bomoto ya kati, na makanisi. Bongo, soki akoki komema yo . . . Okotala soki moke te—okotala soki moke te moko na makambo wana, esengeli liboso ópesa ye nzela ya kokota *awa*. Esengeli kopesa ye nzela ya kokota. Na sima, soki akoti, azui bokonzi. Na sima akosala nini? Akobanda kosalela lisosoli. Akobanda kosalela eloko *oyo*, akobanda kosalela mombonda *oyo*. Ezali nini? Komona, koleta, komama, koyoka nsolo, koyoka; makanisi, lisosoli, kokundola makambo, mabanzo, kolinga. Akobanda kosalela ba-nzela mike mike nyonso wana, soki azui makoki ya kokota, likolo na *oyo* awa. Asengeli liboso kokota na makanisi na yo, pe yo osengeli koyamba yango. Ekoki. . . Yoka. Ekoki kobundisa yo, kasi ekoki kokómela yo te soki yo oyambi yango te.

¹³⁰ Ntango Satana akendeki epai na Ewa, pe alobaki: “Oyebi, mbuma yango ezali elengi.” Ye atelemaki mwa moke. Oh, ezali ntango wana nde asalaki libunga, ntango atelemaki mwa moke.

¹³¹ Kotelema mpo na likambo moko te. Ozali na Nsango. Yesu azali na bomoi. Nzambe azali Mobikisi ya bokono. Nsango yango

wana. Kotelema mpo na likambo moko te, mpo na mabanzo te, mpo na eloko mosusu te.

¹³² Kasi ye atelemaki mwa moke. Ezali na ntango wana nde Satana akotaki mbala moko na makanisi na ye. Alobaki: “Ee, ezali koyokana malamumu.” Oh, bosala bongo te. Bosimba bobele oyo Nzambe alobaki.

¹³³ Abalayama, elingaki kozala boni soki atelemaka mpo na kobanza-banza, ntango Ayebisaki ye ete akobota mwana na nzela ya Sala, wana azalaki na mibu ntuku motoba na mitano? Pe ye azalaki na mibu ntuku nsambo na mitano? Pe ntango akómaki na mibu mokama, pe ye akómaki—akómaki na mibu ntuku libwa; ye, a—a—akobaki kotatola ete Liloba na Nzambe ezali solo. Pe azalaki kobenga biloko oyo ezalaki te lokola ezalaki. Bomoni? Ye . . . Ata elikia, elikia ezalaki lisusu? Asalelaki na ye ata elikia te.

¹³⁴ “Ee,” okoloba, “nazali na elikia nakoyoka malamumu. Nazali na elikia nakokóma malamumu. Nazali na elikia nakozua Molimo Mosantu. Nazali na elikia nazali Moklisto. Nazali na elikia nakosala *boye*.” Ozali na bosenga na yango te.

¹³⁵ Abalayama atalaki yango ata moke te. Amen. “Kozanga elikia, akobaki kondima Liloba na Nzambe.” Kondima ezali mosika koleka elikia. Kondima eutaka *awa*, na kati. Kondima eutaka *awa*.

¹³⁶ Ekotaka ndenge nini? Na nzela ya makanisi oyo, e—ekuke oyo, libanda ya etumba ezali nde wana.

¹³⁷ Sikawa, ntango yango nde okoti na molongo mpo na etumba! Sikawa, zabolo afandi pembeni ya motema moko na moko, na ntongo oyo. Afandi pembeni ya motema ya elenge mwasi oyo. Afandi pembeni na mitema na bino. Afandi zinga-zinga wana. Azaki koloba: “Oh, namonaki yo komeka yango liboso. Nayokaki nsango yango liboso.”

¹³⁸ Bengana ye. Esili. Bengana ye. Biblia elobi nini awa, makomi na biso? “Bobengana ye.” Ya solo. “Bobengana ye.” Tosili kolakisama.

¹³⁹ Nakanisaka: “Likambo nini na biso batei?” Namitunaka soki tolakisamaki ndenge nini.

¹⁴⁰ Nzambe azali kolakisa bato malamumu mpo na etumba monene oyo. Elobami kuna, na Matai 24, ná Danye 12, elobi: “Ntango na bolozi ekozala, lokola naino ezalaki te longwa na ebandeli na mokili.” Pe tozali kobika na ntango yango, ntango oyo boyebi makambo, kotanga mokanda, pe nyonso wana, ekómi kozipa Liloba na Nzambe, pe ekoti kino kati na mabanzo pe nyonso wana. Etumba ezali sikawa. Nani akolonga? Aléluya! Etumba elingi kobanda. Esili kolengelama. Bótala boni kotemelana na biso ezali monene koleka.

¹⁴¹ Nani akozala lokola Dawidi? Alobaki: “Bozali wana pe botiki esute ya Mofilistia oyo ábeta ntembe na mapinga ya Nzambe na bomoi? Ngai, nakokende kobunda na ye.” Amen. Nzambe azali na bosenga ya mibali pe basi, na ntongo ya lelo, baoyo bakoki kotelema pe koloba: “Nakozua Nkolo na Maloba na Ye.” Amen. Ata boni bakwei, likambo *boye* na *boye*, pe moto *songolo* asalaki nini. Ezali na ntina moko te. Bino, ba-Saulo, pe bamosusu, soki bozali kobanga ye, bózonga bisika na bino. Kasi, mapinga ya Nzambe bakokende liboso, amen; bato na mpiko, bato na—na—na kondima, bato na nguya, bato na lisosoli. Basengeli kozala bato na mayele mingi te. Basengeli kozala bato batángá te. Basengeli kozala ba-nzela. Nzambe asalelaka ba-nzela ya mike yango.

¹⁴² Ye atelemaki mpo na ntango moke, na kobanza-banza, alobaki: “Ee, sikawa, totala naino.” Ee, lokola, nini ekokaki. . .

¹⁴³ Elenge mwasi oyo, na ntongo ya lelo, na ntembe te monganga ayebisaki ye ete akómi pene na suka ya mobembo: “Eloko ya kosala ezali te.” Ee, sikawa, wana etali monganga yango. Nakweisi ye te. Moto yango azali moto ayekoli. Amoni ete bokono yango esili kolonga nzoto ya mwana. Elekeli ye. Azali na nkisi ekoki kotelemisa yango te.

¹⁴⁴ Ndenge moko pe na kanser oyo elongaki mwasi wana; na bosolo, liwa elongaki bébé wana; kasi Kapiténí Mokonzi na biso, aleluya, ya mapinga monene oyo, Azali lisekwa pe Bomoi. Eloko moko te ekoki kolonga Ye. Aleluya!

¹⁴⁵ Bongó ya mapinga ezalaka ba-kapiténí na yango, mayele. Rommel, na Allemagne, azalaki bongó ya Allemagne; Hitler te. Rommel! Ya solo. Eisenhower! Basodá mibali! Patton! Mibali yango oyo bazalaki na ndelo ya etumba, etalaka mitindo oyo bango bapesaka. Bólanda kapiténí na bino, soki azali général oyo alongobani. Soki azali oyo alongobani, soki azali général na minzoto minei, soki amonisa makoki na ye, soki andimama ete alongobani, bólanda ye. Ata ekoki komonana malamau te, mpo na bino, bókende na etumba. Bósala lolenge ayebisi bino.

¹⁴⁶ Aleluya! Tozali na General ya minzoto mitano, ekomamaka Y-e-s-u [Na Ngelesa: J-e-s-u-s—N.D.T.], etiameli biso minzoto mitano, k-o-n-d-i-m-a [f-a-i-t-h]. Alongama na etumba ata moko te. Aleluya! Alóngá liwa, lifelo pe kunda. Bólóngola milimo mabe na nzela. Ye azali Kapiténí Mokonzi monene. Bongo, zabolo azali ata na ntina te.

¹⁴⁷ Etumba monene koleka oyo ebundamá, ezali kolengelema sikawa. Ezali mpenza bongo. Oh! Aleluya!

¹⁴⁸ Ezali ngai kokanisa yango! Ntango natelemaki wana kotala Ye kosala makambo, komona Ye komonisa makambo, kofungola makambo, koloba: “Ekozala *boye* na *boye*,” pe esalemi! Oh, kotala *awa* na sima, pe koloba: “Kapiténí monene oyo nde nani?” Oh, natalaka na sima te mpo na komona soki ezali Monganga

Songolo. Namonaka yango elobi Kapiténi. “Azali Kapiténi ya lobiko na biso.” Aleluya! Lobiko ezali nini? Kosikolama! Nkembo! “Azali Kapiténi ya kosikolama na biso.”

¹⁴⁹ Ngonga mpenza ya kobanda etumba ebelemi. Aleluya! Sodá, ná bibundeli oyo ezali kongenga, bendele ezali kopepa! Kondima ná ntembe ebelemi mpo na etumba, kati na losambo oyo, na ntongo ya lelo; ntembe na ngámbo moko, kondima na ngámbo mosusu. Basodá, bótelema na esika na bino ya mosala. Aleluya! Kapiténi na biso, Monzoto ya Ntongo, azali kokamba biso. Azongaka sima te. Ye ayebi (soki moke te) liloba kokima etumba. Ye azali na ntina ya kokima etumba te. Amen. Ya solo.

¹⁵⁰ Etumba monene koleka oyo ebundámá, ezali kobundama awa sika sikawa, iyo, misie, kati na bomoi pe liwa, kati na bokono pe bokolongonu ya nzoto, kati na kondima pe ntembe, hólalá, kati na bonsomi pe boómbo. Etumba ezali kokoba! Bóngengisa makongá na bino, basodá. Bopelisa bibundeli. Nzambe azali kolengela basodá na Ye. Amen. Nzambe azali kotia epakweli likolo ya mapinga na Ye.

¹⁵¹ Amerika alatisaka basodá na ye sokoto ya kitoko koleka, oyo akoki kopesa bango, bikoti ya bibende, pe bibundeli, ná nyonso oyo bazali na yango, makalo ya bibende, nyonso oyo batambolaka na yango.

¹⁵² Nzambe alatisaka mapinga na Ye. Aleluya! Tosalelaka bibundeli ya ndenge nini? Molimo ya Mopanga, Liloba na Nzambe! Amen! “Liloba na Nzambe ezali na mopotu koleka mopanga mopeli bipai mibale,” Baebele 4, “ezali kokota kino na mikuwa, kino na ma—mafuta ya mikuwa, Esosolaka ata makambo oyo ezali na kati na makanisi.” Liloba na Nzambe! Kondima Liloba na Ye, Nzambe alatisaka nde bongo.

¹⁵³ Yango nde ebundeli oyo Apesáká Ewa mpo ásalela yango. Pe abebisaki ebundeli na ye. Asalaki yango ndenge nini? Ntango afungolaki molimo na ye mpo na kokotisa makanisi. Bakotisaka makanisi na Liloba na Nzambe te. Bakotisaka makanisi na yango te. Bino. . . Ezali mpenza Liloba na Nzambe. Ezali na—ezali na ntembe ata moke te na Yango. Ezali na makanisi ya kokotisa na Yango te. Ezali Liloba na Nzambe. Ekati likambo. Ezali se bongo. Ekati likambo mpo na libela.

¹⁵⁴ Omoni eloko nalingi koloba, molingami? [Ndeko mwasi ya bokono alobi: “Amen.”—N.D.E.] Ezali Liloba na Nzambe. Nzambe alakaki yango. Nzambe alobi bongo.

¹⁵⁵ Balobaki na Abalayama: “Ndenge nini oyebi ete okobota mwana yango?”

“Nzambe alobaki bongo.” Ekataki likambo.

“Kasi, mpo na nini ozui ye te?”

¹⁵⁶ “Nayebi ntango nini nakozua ye te, kasi nakozua ye. Nzambe alobaki bongo. Yango ekopekisa ngai ata moke te.” Abenga- . . .

157 “Mpo na nini ozongi na yo epai na bino te, esika óutaki?”

158 “Nasengeli kozala moleki nzela pe mopaya na mboka oyo.” Amen! . . .? . . . “Nzambe apesaki elaka. Nzambe akopesa mwana yango bobele na mboka oyo Atindaki ngai.” Aleluya!

159 Nzambe akobikisa yo bobele na lolenge malamú oyo ya Molimo Mosantu, esika Atindaki yo. Nzambe akopesa yo yango. Ndimba bobele yango. Amen. Fungola ba-nzela ya bomoto ya kati pe ya nzoto, biyokeli, ná lisosoli, pe tika Maloba na Nzambe ékota liboso, ékonza makanisi. Yango nde libanda ya etumba.

160 Koloba te: “Ee, soki nakoki koyoka yango, soki nakoki koyoka nkembo na Nzambe kokita! Oh!” Ezali na ntina moko te; eloko moko te.

161 Fungola makanisi yango. Yango nde libanda ya etumba. Kuna nde bakotaka na molongo ya etumba, awa, na ndelo ya etumba, makanisi na yo. Fungola yango, pe loba: “Ngai. . . Ntembe nyonso, nabeti ntembe na ntembe na ngai.” Amen. “Nazali sikawa kobeta ntembe na ba-ntembe na ngai. Ngai nandimi Liloba na Nzambe. Satana, ngai oyo.” Eloko moko ekosalema. Ya solo, ekosalema. Iyo, misie.

162 Apakolaka basali na Ye na Molimo na Ye. Atindelaka bango banje. Bato batiolaka yango, ntango mosusu, “banje.” Ná—nákamata naino likambo moko awa elongo na bino, mpo na ntango moke. Tókamata naino awa, na Baebele mpo na ntango moke. Baebele mokapo ya 4, mokapo ya 4, pe tó. . . nalingaki koloba, mokapo ya 1 ya Baebele, pe tókamata eteni ya 14.

Bango nyonso oyo bazali milimo na mosala bakotindamaka uta na. . . bakotindamaka mpo na kosalela baoyo balingi kozua libula na lobiko, boye te?

Alobaki. . . na moko na banje nani. . . Fanda na loboko na ngai na mobali. . . ?

. . . banje nyonso ya Nzambe. . .

163 Sikawa, awa Biblia eyei lisusu koyebisa biso awa, ete Nzambe atindaka banje. Nkembo! Bazali banani? “Milimo na mosala.” Nkembo! Milimo na mosala, bakotindamaka (wapi?) uta na Bozali na Nzambe. Mpo na kosala nini? Koteya Liloba na Ye. Amen! Basengeli te koteya makambo ya likindo ya etonga ya ebongiseli moko, kasi koteya Liloba na Ye. Ezali yango. “Milimo na mosala, bakotindamaka.”

164 Ndenge nini tokoyeba ete batindami? Biblia elobaki, ete “Liloba na Yawe eyaki na basakoli.” Ezali solo? Banje yango bateyaka Liloba na Ye, na nzela ya Molimo na Ye; bateyaka Liloba, na nzela ya Molimo Mosantu. Pe Molimo ná Liloba eyaki na basakoli, pe basakoli bazalaki na Liloba na Nzambe. Yango wana bakokaki kosala bikamwiseli oyo basalaki. Ezalaki moto te; ezalaki Molimo na Nzambe kati na moto. Molimo na

Klisto kati na moto, mpo na Liloba na Nzambe. Asalaki nini? Apetolaki ba-nzela nyonso. Nzambe aponaki ye, pe apakolamaki na Molimo Mosantu. Pe ezalaki ye te. Ye azalaki kosala eloko moko te soki amoni yango na emononeli te. Eliya alobaki, na ngomba Karmel: “Nyonso oyo, nasalaki yango na kotindama na Yo. Sikawa, Yawe, tika bato bayeba ete Yo ozali Nzambe.” Oh, nkembo na Nzambe!

¹⁶⁵ Namóná yango mbala mingi, ntango omoni Molimo na Nzambe kokita na esika moko, pe esika yango ekomi na nse na epakweli! Soki etonga moke oyo na ntongo ya lelo, bakoki mpenza kozua likanisi oyo, kolongola ntembe nyonso na nzela! Ndenge nini bokoki lisusu kotia ntembe, ntango bozali komona bakufi—bakufi kosekwa, batengumi kotambola, bakufi miso komona, bakufi matoi koyoka?

¹⁶⁶ Mwanje na Nkolo, ata fotó na Ye ezali awa na etutú, bipai nyonso, bato na mayele bazangi eyano mpo na yango. Azali kosala nini? Botelema ngwi na Liloba. Amen! Ekataka milimo mabe nyonso. Iyo, Ya solo. Yango ezali nini? “Milimo na mosala, bakotindamaka uta na Bozali na Nzambe,” mpo na kopakola batei ya Liloba, oyo batelemi ngwi na Liloba. Pe Azali kotatola Liloba na bilembo bizali kolanda Yango, kotalisa Yesu, motindo moko lobi, lelo, pe libela. Ye wana.

¹⁶⁷ Ndenge nini tokoki kobeta ntembe, ntango oyo, liboso na bato ya mayele, na komonana polele, na nzela ya molimo, Atatolami na lolenge nyonso ekoki, Atatolami polele *awa*?

¹⁶⁸ Ezali nini? Ezali na makanisi na biso. Tokotisaka makambo na makanisi na biso, kolobaka: “Ee, bongo, nayebi te soki ekoki kosalema to te. Ntango mosusu, soki namiyoki malamumu lobi.” Oh, ezali ata na ntina te.

¹⁶⁹ Ndenge nalobaka mbala mingi, ntango mosusu Abalayama alobaki na Sala . . . Alekisasi mbula ya—ya kozala mwasi. Boyebi eloko nalingi koloba; eleko na ye ya bomoi, mikolo na ye ntuku mibale na mwambe. Bomoni, azalaki na mibu ntuku motoba na mitano. Ntango mosusu asilaki kolekisa yango, na mibu zomi na mitano, ntuku mibale. Pe mobali alobaki na ye, ntango mosusu, na mikolo oyo elandaki, alobaki: “Ozali koyoka bokeseni te, molingami?”

“Bokeseni ata moke te.”

¹⁷⁰ “Yango ezali ata na ntina moko te. Tokoba kokende liboso ata bongo. Ee, sikawa, soki ozongi lisusu e—elenge mwasi, toyebi, na nzela ya makila ya bomoi, ee, na ntango wana, tokomona wana ete ekobatela bébé na makámá, pe makambo nyonso ekozala malamumu. Sikawa, oyoki bokeseni moke lelo? Eleki sanza mobimba uta Apesaki ngai elaka. Oyoki bokeseni moke, molingami?”

171 “Ata moke te, Abalayama. Elembo ata moko ezali te, eloko te. Na—nazali kaka lolenge na—nazalaka mibu oyo eleki. Ata bokeseni moke ezali te.”

“Nkembo na Nzambe! Tokozua ye, ata bongo.”

172 “Olingi koloba, Abalayama, ete likolo. . . Tala, soki Apesaki yo elaka, na ntembe te Akopesa biso elembo *boye*. Na ntembe te Akopesa biso elembo.” Hum! Aleluya!

173 “Libota ya bolembu pe ya ekobo elukaka bilembo.” Ya solo. Azalaki na elembo. Ezalaki nini? Liloba na Nzambe. Yango nde ezalaki elembo.

174 Ndenge nini Nzambe akoki kobikisa mwana oyo? Liloba na Nzambe elobaki bongo; náyoka koningana, to koningana te. Soki ngai. . . Ata likambo nini esalemi, Nzambe alobaki bongo. Ekati likambo.

175 Abalayama alobaki: “Kamata bikoti na yo pe biloko nyonso, tozali kokende na mboka yango.”

“Ozali kokende wapi?”

176 “Nayebi te.” Amen. “Kasi, tokokende ata bongo. Tokei!” Bakangi bisaka pe bakei. Aleluya! Tala Liloba na Nzambe ya solo. Eloko nini ezalaki liboso na ye, oyo asimbaki? Elaka ya Nzambe, Liloba na Nzambe. “Tokozua ye.”

177 “Bima kati na libota na yo, Abalayama. Bango, likambo ezali ete, bazali bato na ntembe pe bazangi kondima. Bakokotisa yo na likambo na bango. Bima kuna. Kabwana na bango, pe bika mpo na Ngai.” Ezali nini? “Tika lisosoli na yo pe biyokeli na yo nyonso, sima na yo, ndenge wana. Fungola makanisi na yo, pe ómikanisela, ezali Ngai. Yaka kobika elongo na Ngai.” Amen.

178 Nzambe azali kobenga Momboto nyonso ya Abalayama, na ntongo ya lelo, na bomoi ya lolenge wana. Etumba monene ezali kobundama, sikawa, na mokili mobimba. Nzambe alingi ete bana na Ye bákabwana na nini? Na komona, koleta, komama, koyoka nsolo, koyoka na matoi; na makanisi, lisosoli, kokundola makambo, mabanzo, kolinga; na nyonso. Báfungola makanisi na bango pe batika Liloba ékota, pe bátambola elongo na Liloba. Yango nde sodá ya solosolo.

179 Lolenge wana nde minzoto etelemaka. Lisanga ya moi ná minzoto ebongwanaka te; zodiak. Monzoto ya ntongo etelemaka esika na yango, ntongo nyonso, bobele ndenge ezalaki ntango mokili ezalisamaki. Monzoto ya mpokwa ezalaka esika na yango; minzoto nyonso. Lisanga moke ya Minzoto, na eleko na yango mpenza, ezalaka mpenza esika esengeli kozala. Monzoto ya Nórdi etelemaka bobele wana, pe eninganaka ata moke te. Aleluya! Nyonso ebalukaka zongazonga na Monzoto ya Nórdi, nyonso mosusu, mpo ete yango ezali mpenza na katikati ya mokili.

¹⁸⁰ Oyo wana nde Klisto. Amen. Atelemi wana, Azali kopesa mitindo na mapinga na Ye lokola Kapiténí mokonzi.

¹⁸¹ Lokola Mose na ngomba, maboko likolo, pe Yisalaele bazalaki kobunda, kofungola nzela, pe ye atelemaki wana, maboko likolo. Atelemaki wana, maboko likolo kino ntango moi elalaki. Basengelaki kosimba maboko na ye ekita te. Ezalaki nde Mose.

¹⁸² Azalaki etaliseli ya Klisto. Mpo maboko na Ye ekita te, babakaki Ye na ekulusu. Aleluya! Pe Amataki bitutu ya Nkembo, lelo, ná bilamba na Ye oyo etondi na Makila, liboso na Nzambe, kuna na loboko na Ye ya mobali na Nkembo. Pe etumba yango, sodá nyonso, akopasola nzela na ye. Ata likambo nini esalemi; ná Liloba na Nzambe, akomipasolela nzela kino na bonsomi. Amen.

¹⁸³ Lokola mwana ya soso kati ya líkei, nini ekosalema soki abangi kobwaka miso libanda? Nini ekosalema soki abangi kodóda líkei? Nini ekosalema soki mwana ya soso kati ya líkei, ndeke ya moke, abangi kodóda mposo ya líkei yango? Nini ekosalema soki ayoki mongongo moko libanda, koloba: “Kodóda mposo wana te, okomizokisa”? Kasi, lolenge ndeke asálémá, kati na ye, ekoyebisa ye: “Dódá yango! Tobola lidusu na kati.”

¹⁸⁴ Ata bibongiseli nyonso ya kala elobi: “Ntango ya bikamwa esila koleka. Bokomisala mabe. Bokokota na bilanda-landa.”

¹⁸⁵ Dódá kaka mposo yango, na makasi na yo nyonso. Aleluya! “Satana, longwa na nzela! Nakobima awa.” Ndenge wana. “Nakolala lisusu awa te. Nakofanda lisusu awa te. Nazali lisusu na esika ya kala oyo ya Zabolo te. Nazali komifungola nzela mpo nabima, na ntongo oyo. Amen. Nazali mpongo.” Amen! Aleluya!

¹⁸⁶ Kasi, mpongo moke wana ya kala, kingo na ye lokola martó, akokoba kodóda mposo yango. Ata mposo yango ezali makasi ndenge nini, akokoba kodóda yango kino ábima. Na mbala moko, nde, akobeta mapapu na ye moke. Nyonso ezali malamumu mpo na ye.

¹⁸⁷ Dódá yango mpo óbima. Ya solo. Basalaka ndenge nini? Bétá yango na “YANGO ELOBI NKOLO. YANGO ELOBI NKOLO. YANGO ELOBI NKOLO.” Na suka, okobanda koyoka mopepe moke ya malili. “YANGO ELOBI NKOLO.” Motó na yo ebimi libanda. “YANGO ELOBI NKOLO.” Pusa makasi sikawa, okobima!

¹⁸⁸ Akozonga lisusu na kati ya mposo ata moke te. Amen. Akómi nsomi. Hólalá! Soki Liloba oyo ezui esika, eleki biyokeli pe lisosoli pe nyonso wana, pe efandi *awa*, pe makanisi efungwami pe etikeli Yango nzela. E Nzambe, yokela biso mawa! Eloko ata moko te ekozongisa yango lisusu na boómbo. Okómi nsomi. Moto oyo Mwana asikoli ye, abimi na mposo. Ebongiseli na bino ekoki lisusu kozongisa yo kuna te. Zabolo akoki lisusu kosala yo eloko moko te. Na ntango wana, akoki kobeta piólóló pe koganga.

189 Kasi osili kokota na Nzela monene, ozali kopota mbangu mpenza, hólalá, ozali kotambola na Nzela ya Mokonzi, sodá mopakolami ya ekulusu. Pe ezali mpo na bino nyonso bampongo, na kondima, bósakola Yesu, Pole na mokili, bómata na Nzela ya Mokonzi. Ya solo. Iyo, misie!

190 Ezali “milimo na mosala”, bakotindamaka uta na Bozali na Nzambe, mpo na kozala batei, mpo na koteya (nini?) Liloba na Ye; malakisi ya likindo te, kasi Liloba na Nzambe. Bazali milimo na mosala, bakotindamaka uta na Nzambe, mpo na kosala mosala. Milimo na mosala! Oh! Pe, bobosana te, soki etei eloko mosusu libanda na Liloba, euti na Nzambe te. Mpamba te, “Liloba na Yo etatolamaka ntango nyonso na Likolo.” Ntango nyonso, na Likolo, Liloba, Nzambe asenzelaka na Yango. Pe ata mokolo moko te Akotinda molimo moko koteya eloko moko libanda na Liloba.

191 Mokolo ata moko te Akotinda molimo oyo ezali na lipolome monene ya Bonzambe, na doctorat ya Philosophie, ná elamba na ye oyo nkingo ebaluki na sima, pe makambo ya ndenge wana, kolobaka: “Ee, na ntembe te, ntango na bikamwa esila koleka. Bisu nyonso toyebi yango.” Te, te. Oyo wana euti na Nzambe te. Ekeseni na Liloba. Amen.

192 Atindaka baoyo bateyaka Molimo ya Liloba. Amen.

193 Oh, nazalaki na makambo minei to mitano lisusu, kasi nakotika yango naino mpo na mbala oyo, nakozongela yango lomingo ekoya. Malamu.

Satana ná milimo na ye ya mabe bazali na epakolami.

194 Soki milimo ya banje oyo epakolami mpo na koteya bino Liloba, mpo na kondimisa bino Liloba, na bongo, bokoki komona esika boyoka mosakoli moko, mosakoli ya solo ya Nzambe, kowangana Liloba na Nzambe? [Losambo balobi: “Te.”—N.D.E.] Te, misie. Likambo nini esalemaki ntango bibongiseli ya eleko na bango bazalaki kotelema pe koloba: “Tala, azali na libunga?” Azalaki wana ye moko, pe azalaki bobele ye moko. Alobaki: “Ezali solo.”

195 Bótala Mikaya, mokolo wana, motúntuki moke wana, bomoni, mwana na Yimila. Bazalaki nkama minei oyo bapakolamaki, ndenge esengelaki kozala, basakoli oyo bapakolamaki bazalaki wana, nyonso baleisami malamumu, pe babongisami malamumu, pe bazalaki na mapolome ya minene, pe bazalaki bato batangi mingi pe na mayele mingi. Balobaki: “Kenda, mokonzi na biso ya lokumu. Yawe ázala na yo. Yango ezali ya biso. Yosua nde apesaki biso yango. Na bongo, kende kokamata yango. Ezali mpenza solo. Kende kokamata yango. Nini. . .” Alobaki: “Ee, Yosua- . . .”

196 Boyebi, Yosafata alobaki: “Moto mosusu azali te, esika moko?” Ee, bazalaki na bango nkama minei. Mpo na nini

kondimela nkama minei wana te? Alobaki: “Kasi, na ntembe te, ozali na moto mosusu, esika moko.”

¹⁹⁷ Alobaki: “Ngai—ngai. . . Ee, tozali na moto mosusu. Moto mosusu azali, kasi, oh, nalingaka ye te.” Hum! Bomoni?

¹⁹⁸ “Tala—tala, wana nde moto nalingaka koyoka, omoni.” Alobaki: “Bokende kozua ye. Toyoka likambo nini akoloba.”

¹⁹⁹ Bongo bakendeki koyebisa ye, balobaki: “Sikawa, yoka. Bongisa liteya na yo malamau, na ntongo ya lelo, mpo okoteya mokonzi. Okoteya na . . . li—lisanga mobimba ya batei ya *boye na boye*, bomoni, ya Palestina. Lisanga mobimba ya batei. Sikawa, kobosana te, bango balobaki boye. Yo loba bobele bongo. Yo ndima bobele bongo.” Likambo moke. . .

²⁰⁰ A—azalaki na moto ya lolenge wana te. Moto yango asilaki kokabwana na makanisi ya kala wana. Asilaki kosukola bantzela malamau mpenza, bomoni, lisosoli na ye.

²⁰¹ “Pe, ee, kasi, oyebi eloko bakosala? Soki olobi ndenge moko, nakanisi bakokómisa yo mpaka ya etuka. Bakosala yango mpenza. Bako—bakokómisa yo moyangeli mokonzi ya etuka oyo, soki o—olobi bobele lokola bango.” Oyo wana azalaki mpenza moto ya Nzambe te.

²⁰² Kasi, ba-nzela na ye esukolamaki mpenza, lisosoli na ye mobimba pe nyonso epetolamaki. Makanisi na ye efungwamaki mpo na Liloba na Nzambe. Pe ye azalaki kondima bobele Liloba na Nzambe. Yango nde milimo na mosala. Wana nde molimo na mosala.

²⁰³ Alobaki: “Nayebi te likambo ya koloba sikawa. Kasi, nakoyebisa bino likambo moko, nakoloba bobele maloba Nzambe akoyebisa ngai koloba.”

Bongo bazelaki butu wana. Azuaki emononeli.

²⁰⁴ Na ntongo elandaki, nakoki kokanisa boni Mikaya alukaki kati na Makomi pe alobaki: “Sikawa, totala naino. Emononeli yango. . . Bongo, bato nyonso wana, mbeba moko ezali esika moko, mpo Ekeseni na oyo elobamaki. Ee, Yango elobaki nini? Totala likambo Eliya alobaki kalakala, mosakoli, mpo toyebi ete azalaki mosakoli. Totala likambo. . . Liloba na Yawe eyaki na Eliya. Iyo. Bongo Elobaki nini? ‘Pe ba-mbwa bakoleta makila na yo. Yezabele, ba-mbwa bakolia ye. Na ntina na moyengebeni Akaba. . . moyengebeni Nabota.’” Bongo alobaki. . . Ntango amonaki yango, na bongo, amonaki ete emononeli na ye ekokanaki mpenza na Liloba na Nzambe, ete likambo yango esengelaki kokómela mobange Akaba.

²⁰⁵ Akendeki kuna mbala moko, alobaki: “Kende na yo, kasi namonaki Yisalaele. . .” Bomoni, azalaki na nsoni te ya koloba emononeli na ye, na ntango wana, mpo ezalaki Liloba na Nkolo. Ayebaki ete akokaki kotalisa likambo yango malamau mpenza. Ezali nini? Asilaki kofungola motema na ye, makanisi na ye, na

Liloba na Nzambe, pe Liloba na Nzambe emonisamelaki ye, na bongo ayebaki ete ezalaki mpenza Liloba na Nzambe.

²⁰⁶ Sikawa, bokoloba: “Oh, soki nakokaki bobele kozala Mikaya!” Okoki pe. Ozali ye. Yo pe, molingami. [Ndeko Branham asololi lisusu na ndeko mwasi mobeli—N.D.E.] Ozali Mikaya moko, mosakoli. Okoki kosala nini? Fungola makanisi na yo. Eloko nini nazali koluka koyebisa bino na ntongo oyo? Liloba na Nkolo. Bomoni? Bófungola makanisi na bino, boloba: “Sikawa, oyebi, nandimi ete nakoki kobika.” Ee, na bongo Ezali nini? Ezali Liloba ya Nkolo? Ya solo, Ezali Liloba ya Nkolo.

²⁰⁷ Pe moto *oyo* alobi awa: “Ntango ya bikamwa esili koleka. Bokoki kosala *boye* te. Pe bino...” Bobosana yango. Botia Nzambe liboso.

²⁰⁸ Liloba na Nkolo eyaki wana, pe alobaki Yango, pe Esalemaki bongo.

²⁰⁹ Bongo, Satana asalaki nini? Satana apakolaki bamosusu. Bongo, Satana apakolaka basali na ye. Oh, ya solo. Eh-eh. Ya solo. Apakolaka basali na ye. Apakolaka bango na nini? Na kozanga kondima. Satana ná milimo mabe na ye bapakolaka bato mpo bándima Liloba na Nzambe te.

²¹⁰ Sikawa, soki bolingi kondimisama na yango, bókamata Genese 3:4. Tókamata yango pe toyoka yango, na miniti moke, pe tótala soki ezali te mayele mabe na ye ya liboso. Yango nde likambo ya liboso oyo asalaki. Atikaka ata moke te mayele mabe na ye wana. Asalaka bongo ntango nyonso. Sikawa, bótala soki eza—ezali mpenza yango. Sikawa, aboyaki Liloba te. Amemaki bobele mwasi kolimbola Yango mabe mwa moke, boyebi, koyokisa Yango mwa moke ndenge ye alingaki Eyokana, kozanga kozua Liloba na mobimba. Sikawa, Genese, nazali na yango awa, Genese 3:4. Tótala soki yango nde elobamaki sikawa. Malamu.

Nyoka alobaki na mwasi ete, Bino bokokufa solo te:

²¹¹ “Bokokufa solo te.” Bomoni ndenge alobaki yango ndenge mosusu? “Oh, tondimi ete ntango ya bikamwa esila koleka. Tondimaka te ete bato bakoki kozua Molimo Mosantu lokola na Pantekote. Oh, ata obatisami ndenge nini, bokeseni ezali te.” Bomoni Zabolo? Bomoni mayele mabe na ye? “Ee, soki monganga ayebisi yo ete okobika te, likambo esili.”

²¹² Bongo, ezali te mpo na kotia ntembe, na koboya kondimela monganga. Monganga azali kosala na ngámbo ya mayele ya bato. Pe monganga akosala nyonso akoki, mpo na kobikisa bomoi ya moto. Kasi ekoki kobikisa te, mpo mayele na ye esuki wana. Akómi na suka ya makoki na ye. Moto yango azali sembo. Kasi, sikawa, nzete ya boyebi ezali mabe te, kasi soki okómi na esika yango esuki, na ntango wana, leka na ngambo ya Nzete na Bomoi, pe koba kokende liboso. Amen. Ezali bongo. Ekosala mosala koleka wana. Iyo.

213 Sikawa, mayele mabe ya Satana ezali nini? Alobaki nini awa? Sikawa bótala eteni ya 1 pe ya—ya 2. Sikawa, na—nakotanga eteni oyo ya 1, kino ya 3.

Nyoka alekaki nyama nyonso na mokili na mayele mabe, oyo Yawe Nzambe asilaki kozalisa. Alobaki na mwasi ete, Nzambe alobaki solo ete bino bokoki kolia mbuma . . .nzete nyonso na elanga te?

214 Boyoka ye, sikawa, ndenge akómi lolenge mabe, pe ndenge a—ndenge azali kobongola Liloba yango. Bomoni? Ye. . . Azali koluka kosala nini? Kokota na makanisi na ye. Bomoni? Azali kosolola na ye, sima na kobatelama ngwi ya Liloba wana.

215 Sikawa, botika ata moke te ete Satana ábatela eloko moko. Bomoni? Bokoba kobatela ngwi Liloba na Nzambe na motema na bino. Bomoni? Bosala bongo. Sikawa botala malamú, bino ba-Mikaya.

. . .mwasi azongiseli nyoka ete, Tokoki kolia mbuma na nzete na elanga: Kasi. . .

Kasi mpo na mbuma na nzete oyo ezali na katikati (na kati, bomoni) na elanga, Nzambe. . .alobaki ete, Bino bokolia yango te, pe bokomama yango te ete bókufa.

216 Bomoni, sikawa, oyo wana nde Liloba. Azalaki kotangela ye Yango. Sikawa bótala.

Nyoka alobaki na mwasi ete, Bino bokokufa solo te:

217 Bomoni mayele mabe na ye? Bomoni? Azali koluka kosala nini? Moto ya liboso wana, ye azali koluka kopakola mwasi ya motuya wana, mwana mwasi na Nzambe, na kozanga kondima Liloba na Nzambe. Ezali mpenza yango nde azali koluka ye ásula.

218 Yango nde eloko azali koluka yo ósala, molingami. [Ndeko Branham asololi lisusu na ndeko mwasi mobeli—N.D.E.] Yango nde eloko azali koluka moko na moko na bino ásula, kuna, kopakola bino. Pe eloko bobele moko osengeli kosala sikawa. . . Ozali na bonsomi ya kopona. Sikawa, okoki kondima yango soki olingi. Kasi bwaka yango libanda. Soki Ewa atelemaka na ye ata moke te, mpo na koyoka! Kotelema mpo na likambo moko te. Kotelema te.

219 Ntango—ntango Eliya ayebisaki Gehazi, alobaki: “Kamata língénda na ngai, kende kotia yango likolo na mwana oyo akufi. Pe ata moto moko alobisi yo, koyanola te. Soki moto moko ameki kotelemisa yo, koba na yo kokende.”

220 Botala mwasi yango, ntango abengaki mosali na ye. Alobaki: “Bongisa mpunda pe kende, pe komeka kotelema te soki nalobi na yo te.” Ezali bongo.

221 Soki ozali na Nsango, koba kokende liboso. Amen. Loba: “Nakoki lisusu kotambola te. Te, nakomi na bolembu.” Koba na

yo kokende liboso. Kotelema te. Bwaka nyonso pembeni, koba na yo kopasola nzela. Ndeko, ozali na Mopanga na loboko na yo, koba na yo kofungola nzela.

222 Nakendeki na libanda ya masano ya ndembo, mokolo moko, pe nalingaki koteya. Natelemaki na ekuke pe natombolaki miso, kuna. Ekomamaki: “Ezali likambo ya monene ya mbwa kati na etumba te. Ezali likambo ya monene ya etumba kati na mbwa.” Na bongo, yango nde elonga na etumba. Bomoni?

223 Okoloba: “Ee, tala. Tala mangomba nyonso ya minene bazali kotelemela Yango.”

224 Monene na yango ezali na ntina te. Ezali etumba oyo ezali kati na mbwa, yango nde ezali na motuya. Etali kondima oyo ezali kati na moto. Soki ozali bibángábanga, zonga komibomba na lidusu na yo. Kasi, ndeko, soki ozali sodá, telema wana. Wana nde etumba ezali kosalema. Malamu ná mabe ezali kobunda. Tóbunda.

225 Lokola Peter Cartwright, akendeki na engumba moko, alobaki: “Nkolo ayebisi ngai ete—ete náyá kosala mayangani ya kolamuka awa.” Afutelaki ebombelo biloko moko ya kala, akotaki pe abandaki kobongisa yango.

226 Pe elombe ya engumba yango, ná bondóki na ye na loketo, ayaki wana. Akomaki na ekuke. . . Bato bazalaki, alobaki: “Moto wana, azali kosala nini kuna?”

227 Balobaki: “Azali motei. Alobaki ete akosala mayangani.”

228 “Ee,” elobaki ye, “nabanzi esengeli na ngai kokende kuna pe kobwaka ye na balabala, pe kobengana ye awa. Esili. Tozali na mposa ya mayangani awa te.”

229 Bongo akendeki kuna, abetaki ekuke makasi. Pe Peter Cartwright azalaki na monkoto na ye, boyebi, pe aakobaki na ye kosukola maninisa pe bitutu. Azalaki moto moko mokuse, boyebi.

230 Mobange motei azalaki koseka ye, boyebi, mpo azalaki kolia soso na maboko; yango ekómi ndakisa ya bato lelo, boyebi.

231 Bongo, akobaki kosukola maninisa pe kobongisa yango. Elombe yango abelemaki, afungolaki monkoto na ye, bondóki ezalaki na loketo na ye, alobaki: “Ozali kosala nini?”

232 “Oh,” alobaki, “nazali kosukola maninisa.” Pe akobaki kosukola maninisa yango, bomoni. Azalaki kolanda ntina moko. Nzambe ayebisaki ye ete ásala mayangani ya kolamuka. Akobaki na ye kosukola maninisa yango.

Alobaki: “Tosepelaka mayangani ya kolamuka awa te.”

233 Alobaki: “Oh, kasi Nkolo ayebisaki ngai ete—ete násala mayangani ya kolamuka yango.” Bomoni? Akobaki na ye, kosala mosala na ye. Bomoni? Bomoni?

234 “Ee,” alobaki, “ezali na likambo moko o—osengeli kososola.” Alobaki: “Ngai nde nakonzaka engumba oyo awa.”

235 Alobaki: “Oh, ezali bongo?” Pe akobaki kosukola maninisa yango, boyebi.

236 Alobaki: “Liboso ósala kolamukisa, osengeli kobeta ngai liboso.”

Alobaki: “Oh, nde boye? Ee, na bongo, yango nde nakosala na sima.”

237 Alongolaki monkoto na ye. Abelemaki na ye, asimlaki ye na kingo ya elamba, pe abambaki ye na nse, pe apumbwaki likolo na ye. Alobaki: “Esengeli na ngai kobunda, soki nasengeli kokonza. Bakisela ngai mpiko, Nkolo.” Abetaki ye bibotu mpenza.

Alobaki: “Oyo ozui ekoki?”

238 Alobaki: “Iyo.” Atelemaki pe apesaki ye mbote ya loboko. Abikisamaki na mpokwa wana, na losambo.

239 Yango wana. Bomoni? Ezali, kamata Liloba na Nzambe pe mipasolela nzela kati na ntembe nyonso. Bomoni yango? Ya solo, ezali bongo. Yango nde mosala ekolanda, tósala yango. Ya solo. Likambo ya sima nasengeli kosala ezali kokabwana na ba-ntembe na ngai, kokweisa yango nye. Yango nde mosala ekolanda, ezali kolongola bipekiseli na ngai nyonso. Soki biyokeli na ngai eyebisi ngai: “Ee, ozali komiyoka mabe,” likambo ya kosala sima na yango ezali kolongola likambo yango na nzela. Ya solo.

240 Okoloba: “Ee, bino . . . Bayebisaka ngai ete . . . Oyebi, lisosoli na ngai eyebisaka ngai, Ndeko Branham, ete ngai . . .” Ee, ekozala malamú ete ólongola likambo yango na nzela. Okokóma na yango mosika te. Koba kosala mosala oyo elandi. Longola monkoto na yo, bimisa mopanga pe kende na mpiko nyonso. Koba kokende liboso. Nsuka na likambo se moko: “Nakolonga.” Amen. “Nakokweisama te. Nakolonga.” Amen.

241 Satana apakolaka. Bomoni? Mayele mabe na ye ya liboso ezali nini? Esika ya liboso asalelaki ezali nini? Makanisi. Ye atelemaki ntango moke, mpo na koyoka likambo ye alobaki. “Oh, olobi mpenza yango?”

242 Wana nde esika bilenge basi mingi basalaki libunga, pe bilenge mibali mingi basalaki libunga; ya solo, batelemaki ntango moke, batelemaki bobele ntango moke. Mbala boni nasila komona mabala kokufa pe makambo ndenge na ndenge, ya lolenge wana.

243 “Ee, nayebisi yo, Ndeko Branham, abetaki piólóló boye: ‘húîît-húîîou’, omoni, pe natelemaki, pe na bosembo, e—ezalaki mposa na ngai te.” Ah-ha. Yango wana.

244 “Oh, ye, ngai nafandaki na ngámbo moko ya mesa liboso na ye. A—azalaki na miso kitoko mpenza!” Omoni? Ah-ha. Omoni yango? Ezali yango.

²⁴⁵ Zabolo asalaka motindo moko. “Oh, monganga ayebisaki ngai ete nakobika te, na bongo ngai. . .” Yango wana, motindo moko, bomoni, etumba monene koleka oyo ebundámá.

²⁴⁶ “Ee, bayebisaka ngai. . . Namonaki *Moto Songolo* koloba ete azali na Molimo Mosantu.” Iyo, otalaki nde mokosi moko ya kala. Kasi olobi nini mpo na baoyo bazali na Yango na bosolo? Ah-ha. Iyo. Zabolo akolakisa yo mpambo ya biyanganga ya kala, kasi akolakisa yo ebenga ya solo te. Ah-ha. Ezali solo. Akolakisa yo yango te, akozipa miso na yo ete ómona yango te.

²⁴⁷ Oh, ye pe azali mobundi, bobosana te. Kasi azali monene, ya biso. . . “Ye oyo Azali kati na bino, aleki oyo azali kati na mokili.” Kasi bókangama na Liloba na Nzambe; bóndima Yango, bino bakapiténi ya mapinga awa. Bobatela ebombelo na bino, bandeko. Ezali solo, botikala na esika na bino ya mosala.

²⁴⁸ Bongo, nazalaki na elenge mwasi moko awa, mokolo moko. Mbala mosusu mwasi yango azali awa, sikawa. Nkombo na ye Nellie Sanders. Ezali moko na mbala na ngai ya liboso komona molimo mabe kobima na moto. Tozalaki kofanda, ee, soki nakoki kososolisa bino esika yango; ezalaki na ntaka ya ba ndako misato na awa, na ngambo koleka malita. Nabandaki mosala ya koteya, pe nazalaki koteya awa, na litumu oyo, mayangani na nse ya hema.

²⁴⁹ Pe elenge mwasi yango azalaki moko na babini ya malamau koleka. Azalaki kotanga na eteyelo ya secondeaire awa, ye ná Lee Horn. Pe mingi kati na bino awa na engumba, boyebi Lee Horn, awa, azalaki kokamba ndako ya masano ya billard. Bongo bango, ye ná Lee Horn, bazalaki babini malamau koleka kati na etuka. Lee azalaki Mokatoliko, ye moko. Na ntembe te, mpo na bango, kosambela ezalaki na ntina moko te, na bongo. . . Nellie ná bamosusu. Na bongo, azalaki mobini monene, ná ye pe lokola. Pe bazalaki na mabina moko bazalaki kobenga “nse ya molili,” pe “jitterbugs,” ná makambo nyonso wana. Pe mwasi yango azalaki. . . Bango mibale bazalaki ya malamau koleka na etuka.

²⁵⁰ Mokolo moko na mpokwa, akotaki awa na kotengatenga, na liyangani. Akweyaki awa, na etumbelo, elenge Nellie. Ápambolama. Amipesaki wana na etumbelo. Atombolaki motó na ye. Azalaki kolela, pe mpisoli ezalaki kokita na matama na ye. Alobaki: “Billy. . .” Ayebaki ngai. Alobaki: “Nalingi kobikisama.”

²⁵¹ Pe nalobaki: “Nellie, okoki kobikisama. Yesu asila kobikisa yo, elenge mwasi. Osengeli koyamba yango sikawa, na moboko ya Liloba na Ye.”

²⁵² Ye azalaki bobele wana. Azalaki kolela, pe kobondela, pe ayebisaki Nzambe ete akoyoka lisusu makambo ya mokili te. Na mbala moko, kimia kitoko ya bopolo ekitaki na bomoto na ye ya kati. Atelemaki, abandaki koganga pe kosanzola Nzambe, kokumisa Nzambe.

253 Pene na sanza motoba to mwambe sima na yango, azalaki koleka na Balabala Spring, na mpokwa moko.

254 Sikawa, bobele elenge mwasi, azalaki mpenza na bolenge na ye, pene na mibu zomi na mwambe. Ayaki epai na ngai, pe alobaki: “Hope. . .” Ye azalaki mwasi na ngai, oyo asila kokufa. Alobaki: “Esengelaki na ngai kozala lokola Hope ná Irene.” Alobaki: “Oyebi, bango babikaki bomoi ya mokili ata moke te.” Alobaki: “Mokili etikaka elemba likolo na moto.” Alobaki: “Lolenge na ngai ebeba mingi.” Alobaki: “Sikawa, natíki bipakolapakola pe nyonso, kasi lolenge na ngai ebeba. Ata ba-nzela ya elongi na ngai,” alobaki “lolenge na ngai ebeba.” Alobaki: “Bango bazali komonana ete bayebi likambo te pe bazali na bopolo.” Alobaki: “Esengelaki na ngai kosala makambo wana ata moke te.”

255 Nalobaki: “Nellie, Makila na Yesu Klisto epetolaka masumu nyonso, molingami. Kende liboso, ndima yango.”

256 Wayne Bledsoe, mingi kati na bino awa bayebi ye, moninga na ngai ya motema, eleki mibu na mibu. Azalaki momeli masanga. Pe ayaki awa ná ndeko na ngai ya mobali, Edward. Alangwaki awa na balabala, pe nakamataki ye, mpo bapolisi balingaki kokanga ye. Pe namemaki ye awa. Nazalaki motei pe nazalaki kofanda awa, epai ya mama ná papa na ngai, ntango molai liboso nábala. Pe nazuaki ye, natiaki ye na mbeto kuna. Nalalaki, nazalaki kolala na kanapé. Ba-Branham bazalaki ebele kuna, boyebi, tozalaki zomi. Bongo, tozalaki na biteni ya ndako minei, pe tosengelaki moke kokabola biteni yango kati na biso. Boye, ngai nazalaki na kanapé moko ya kala nazalaki kolalela. Nabendaki yango *boye*, pe—pe natiaki Wayne na mbeto elongo na ngai. Alangwaki, esengelaki na ngai komema ye na ndako pe kolalisa ye.

257 Pe nalalaki wana. Nalobaki: “Wayne, ozali na nsoni na yo moko te, na lolenge yango?”

258 Alobaki: “Ah, Billy, kolobela ngai bongo te.” Na sima natielaki ye loboko. Nalobaki: “Nalingi kobondela mpo na yo, Wayne. Nzambe ápambola yo.” Nautaki kobikisama eleki, oh, nakanisi eleki, ntango mosusu mobu moko.

259 Pe na bongo, mbala moko, mo—motuka moko, bakangaki makasi ekuke na libanda, pe moto moko azalaki kobeta makasi na ekuke ya ndako. “Ndeko Bill! Ndeko Bill!” [Ndeko Branham abeti likolo na eteyelo.—N.D.E.]

260 Nakanisaki: “Hólalá, esengeli kozala moto moko azali kobunda na liwa.” Natelemaki kokende mbala moko, na ekuke; nakamataki eloko na ngai moko ya kala, nazingaki yango na pyjama na ngai, *boye*; pe nazipaki Wayne. Nabelemaki noki na ekuke.

261 Ezalaki lokola mongongo ya mwasi. Nafungolaki ekuke, pe elenge mwasi yango atelemaki na ekuke. Alobaki: “Oh, nakoki kokota?”

Nalobaki: “Kota.” Pe napelisaki mwinda.

262 Bongo, azalaki kolela ndenge wana, pe alobaki: “Oh, Ndeko Billy, e—e—esili mpo na ngai! Esili mpo na ngai!”

263 Nalobaki: “Likambo nini, Nellie? Mpasi ya mo—ya motema ebeti yo?”

264 Alobaki: “Te.” Alobaki: “Ndeko Bill, nazalaki koleka na nzela Spring.” Alobaki: “Na bosembo, Ndeko Bill! Na bosembo, Ndeko Bill, nakanaki kosala mabe te. Nakanaki kosala mabe te.”

265 Nalobaki: “Likambo nini?” Nakanisaki: “Nakosala na ye nini sikawa?” Nayebi likambo ya kosala te. Ngai, nazalaki elenge mpenza. Pe ngai. . .

266 Alobaki: “Oh, Ndeko Bill,” alobaki, “nayebi—nayebi—nayebi lisusu te esika nakómi.”

Nalobaki: “Ee, leki na ngai, kitisa motema. Yebisa ngai likambo yango mobimba.”

267 Pe alobaki: “Ee,” alobaki, “Nazalaki koleka na balabala, pe na Ndako Redman. . .” Kalakala, bazalaki na momesano ya kokende kobina kuna, na mpokwa ya mokolo ya Póso. Pe alobaki: “Nazalaki na biloko, oyo nazalaki kozonga na ndako mpo na kotongisa elamba.” Pe alobaki: “Nayokaki miziki wana.” Pe alobaki: “Oyebi,” alobaki, “natelemaki bobele ntango moke.” Pe alobaki: “Ebandaki kokóma kitoko moke-moke. Bongo nakanisaki: ‘Oyebi, mabe ezali te soki natelemi bobele awa.’”

268 Wana nde esika asalaki libunga na ye, atelemaki ntango moke. Ayokaki bobele koyoka.

269 Alobaki: “Ee, nakanisa naino.” Alobaki: “E Nkolo, Oyebi ete nalingaka Yo, ata bongo.” Alobaki: “Oyebi ete nalingaka Yo, Nkolo. Kasi nakoki kobosana te eleko oyo Lee ná ngai tozaláká kolonga mi—mitole nyonso, pe biloko nyonso.” Alobaki: “Oh, nabosani te ete miziki ya kala wana ezaláká kosepelisa ngai. Sikawa, lisusu te.”

270 Oh-ho, oh-ho! Yo nde okanisi ete ezali lisusu te. Esili kozua yo, bobele wana. Yango mpenza nde eloko ye alingi, bobele wana. Omoni?

271 Bato boni bayebaki Nellie Sanders? Ee, nabanzi mingi kati na bino. Iyo. Ya solo. Na bongo, ba—bazalaki—bazalaki. . .

272 Alobaki, alobaki: “Ee, oyebi nini?” Alobaki: “Ntango mosusu soki namati kuna likolo,” alobaki, “ntango mosusu nakoki kotatola na bamosusu na bango.”

273 Oh! Omoni, ozali mpenza na mabele ya Zabolo. Tikala libanda na yango. “Kima mpenza mabe na ndenge nyonso.”

274 Kasi amataki, na likolo, pe atelemaki wana bobele ntango moke. Na mbala moko, akómaki na maboko ya mobali moko, kobina elongo na ye.

275 Na sima, bomoto na ye ezongaki. Atelemaki wana, azalaki kolela pe nyonso wana, alobaki: “Oh, sikawa, nabungi libela.”

276 Nakanisaki: “Ee, nayebi Biblia malamú mingi te, kasi nandimi ete Yesu alobaki boye: ‘Na Nkombo na Ngai bakobengana milimo mabe.’” Ngai. . .

277 Pe Wayne, molangwa na ye esilaki, mwa moke, pe afandaki wana, azalaki kotala. Bomoni? Bongo nalobaki: “Sikawa, molimo mabe, nayebi yo te, kasi nazali koyebisa yo sikawa, oyo azali ndeko na ngai ya mwasi, pe yo ozali na ntina ya kokanga ye te. Akanaki kosala yango te. Atelemaki bobele ntango moke.” Bongo, wana nde esika asalaki libunga na ye. Nalobaki: “Kasi oosengeli kobima kati na ye. Oyoki ngai?”

278 Na bongo sunga ngai, Nzambe, na Kiti ya Kosambisama. Ekuke wana ya bibendé ebandaki kofungwama pe kokangama, yango moko. “Mba-mbu, mba-mbu,” kuna na ekuke. “Mba, mbu, mbu.” Nakanisaki.

Pe alobaki: “Bill, tala kuna. Tala kuna.”

Pe nalobaki: “Iyo. Ezali nini?”

Alobaki: “Nayebi te.”

Nalobaki: “Ngai pe nayebi te.”

279 Pe ekuke ezalaki kosala “Mba-mbu, mbu,” kokangama ndenge wana. Nakanisaki: “Likambo nini oyo? Likambo nini?”

280 Natalaki lisusu, *boye*. Pe nalobaki: “Tika ye, Satana! Na Nkombo na Yesu, bima kati na ye!”

281 Ntango nalobaki bongo, ezalaki lokola ngembo ya monene mpenza, ya molai *boye*, ebimaki sima na ye, ná suki milai oyo ekitaki na mapapu na yango pe na makolo na yango, *boye*. Ezalaki kosala: “Ooooh.” Ekómaki koya epai na ngai, na makasi na yango nyonso.

282 Nalobaki: “E Nkolo Nzambe, Makila na Yesu Klisto ébatela ngai na yango.”

283 Pe Wayne apumbwaki, na mbeto, atalaki. Pe ekómaki wana, lokola elilingi ya monene, ezalaki kozunguluka, kokende kuna pe kokita sima ya mbeto. Wayne alongwaki na mbeto, akimaki na eteni mosusu, na lombangu nyonso. Bongo biso. . .

284 Nazuaki Nellie pe namemaki ye epai na bango. Nazongaki, pe nakokaki lisusu te. . .

285 Mama akotaki kuna pe aningisaki bilamba ya mbeto pe biloko nyonso. Eloko moko ezalaki na mbeto yango te. Ezalaki nini? Molimo mabe ebimaki kati na ye. Likambo nini esalemaki? Atelemaki ntango moke. [Ndeko Branham abeti mbala mibale na etumbelo—N.D.E.] Esili.

286 Bótelemaka te, ata moke te. Soki Nzambe akotisi Liloba na Ye na motema na yo, kamata bobele Mopanga yango pe bandá kopapa pe kokata. Aleluya!

287 “Nazali na ntango ya kozela eloko mosusu te. Nauti kokatisa ngambo, nazali ata na ntango ya kofanda te.”

288 Alobaki: “Ee, kamata língénda na ngai pe tia yango likolo na mwana yango. Pe soki moto moko alobisi yo, kolobisa ata ye te.”

289 Soki Zabolo alobi: “He, oyebi ndenge ozali komiyoka?” Kolobisa ata ye ata moke te. Koba bobele kokende.

290 Zabolo, boyebi, Zabolo akoloba: “Kasi, oyebi? Oyebi, *Songolo*, ntango azuaki Molimo Mosantu, obosana te ete a—akómaki lokola moto ya liboma.” Kolobisa ata ye te. Koba bobele kokende. Oyebi likambo ya *Songolo* te.

291 Ezali likambo na yo ná Nzambe. Ya solo. Batela Nzambe. Apakolaka basali na Ye. Nasengeli kosala noki. Nzambe apakolaka basali na Ye. Bomoni?

292 Sikawa, nasengeli kopumbwa makambo mosusu awa, kasi nalingi koloba boye. Awa, sikawa boyoka na bokebi.

293 Elenge mwasi, yoka sikawa na bokebi. [Ndeko Branham asololi lisusu na ndeko mwasi mobeli—N.D.E.]

294 Awa tomoni mayele mabe ya Zabolo. Tokosala ndenge nini? Sikawa, nazali na biteni ebele ya Makomi awa, ya basakoli pe bamosusu, ntango ayaki epai na bango, pe bato ndenge na ndenge na Biblia mobimba, pe asalaki ndenge moko. Ezalaka ntango nyonso mayele mabe na ye, ya komeka komema bato kozanga kondima Liloba na Nzambe. Boyoka, bino basodá ya ekulusu. Soki ozangi kondima Liloba moko ekomami na Biblia ya Nzambe, ozangi bibundeli.

295 Ndimá yango, molingami? [Ndeko Branham asololi lisusu na ndeko mwasi mobeli.—N.D.E.]

296 Ozangi bibundeli. Omikabi, lokola mbisi ezangi mokuwa. Lata molato mobimba na etumba ya Nzambe. Amen. Tozali kati na etumba. Likambo Nzambe alobi ezali solo. “Maloba nyonso ya bato ezali lokuta.” Bomoni? Kasi, bobele ntango yo. . . amemi yo koyoka likambo moko, wana nde mayele mabe na ye, ozangi bibundeli.

297 Makambo boni esengelaki Ewa koyoka? Moko. Na ntango wana nde, azangaki bibundeli. Zabolo asalaki nini? Amikotisaki mbala moko na makanisi na ye, kino na molimo na ye, pe wana nde abebisamaki. Boye te? Abebisamaki bobele na ntango azangaki bibundeli, ntango azangaki kondima Liloba na Nzambe. Malamu. Awa tomoni mayele mabe na ye.

298 Esengami na basodá na Nzambe ete “Bálata molato mobimba na etumba ya Nzambe.” Boye te? [Losambo balobi: “Amen.”—N.D.E.] Sikawa, soki bolingi kokoma Likomi yango,

ezali na Baefese 6:10 pe 13. Bomoni? Touti kotanga yango kala mingi te. Yango nde liteya na biso. Malamu. Botala. “Bolata molato mobimba ya etumba ya Nzambe.” Tika biso . . . Bozali na miniti moke lisusu? [“Amen.”] Tozongela yango naino mwa moke. Tótala naino eloko nini molato mobimba na etumba ya Nzambe ezali. Malamu. Tóbanda na eteni ya 10. Bongo, boyoka na bokebi sikawa. Tótala molato mobimba na etumba ya Nzambe. “Na suka, bandeko na ngai . . .” Sikawa, nayebi nazali kokende . . . Nazali . . .

²⁹⁹ Etikali sikawa pene na miniti ntuku mibale mpo midi ébeta. Ngai—ngai na . . . Ezalaki mposa na ngai te koteya bino ntango molai mingi, lelo, kasi mbala mosusu na—natikali bobele na Liteya moko liboso ya kosala mibembo na ngai na eleko ya molunge, bomoni.

³⁰⁰ Pe boyebi nini? Boyebi mpo na nini nazali kosala boye? Nakoyebisa bino. Mokolo mosusu, nalotaki ndoto. Nalingaki koloba yango te, kasi eyeli ngai na makanisi. Nakoki pe koloba yango, lokola Nkolo apesi ngai ndimbola na yango.

³⁰¹ Nalotaki ete nazalaki komilengela mpo na kokatisa ebale moko monene, mpo na mosala ya koteya. Bongo, liboso, nazalaki wana ná mwasi na ngai . . .

³⁰² Pe bato boni bayebi George Smith, seconde-motoba Smith, awa na engumba oyo? George Smith, mwana na ye ya mobali asalaka mosala ya polisi awa. Ye, moto oyo George, akómi sikawa moto na milangwa. Kasi azalaki moko ya babundi bibotú ya malam mpenza. Ye nde alakisaki ngai kobunda bibotú, liboso na ngai kokende na Y.M.C.A. pe bisika mosusu nyonso. Ye azáláká kolakisa biso. Pe azáláká kobeta nokinoki, nokinoki mpenza. Kasi azalaki na bozito mingi mpenza te, azalaki bobele na kilo ntuku motoba na mitano pe ntuku sambo na mwambe. Pe alakisaki ngai. Pe azáláká kotelema wana, akokaki kokanga likofi na ye, *boye*, pe kobeta ngai na libumu mpenza, kotelemisa ngai na etutú, bomoni, kasi, ezalaki kotungisa ngai te. Azalaki bobele kolakisa ngai, ezalaki eloko mosusu te, bobele malakisi.

³⁰³ Boye, na—nalotaki, na butu wana, ete namonaki seconde-motoba Smith. Kasi, ezalaki emononeli te. Ezalaki ndoto. Pe namonaki seconde-motoba Smith, bilenge mibali bazalaki kotelemela ye, na bitumba. Pe ye, mobange yango, pene na, oh, nabanzi . . . Ngai nazali na mibu ntuku mitano na mibale. Ye azali na mibu pene na ntuku mitano na mwambe, ntuku motoba. Moko te kati na bilenge yango akokaki kosimba ye, ata moke te. Azalaki kopesa bango mobulu, ndenge wana, kobamba bango na mabelé pe kofina bango na loboko na ye.

³⁰⁴ Nakanisaki: “Oyo likambo ya kokamwa.” Nakanisaki ete mwasi na ngai azalaki elongo na ngai, pe nalobaki: “Oyo likambo ya kokamwa.” Nalobaki: “Meda, oyebi? Ye nde azáláká molakisi na ngai.”

Alobaki: “Na—nabosani yango te, oyebisáká ngai yango.”

³⁰⁵ Nalobaki: “Iyo, misie. Na malakisi na ye ya malamú, nalongaki bitumba ya solosolo zomi na mitano, na sima na—natikaki mosala yango; mpo na koteya Nsango Malamú.”

³⁰⁶ Na ntango yango, ebongwanaki, pe nazalaki kokatisa ma—mai. Kasi ezalaki ngai kokende, nazalaki na masuwa moke ya motéle. Nabwakaki miso, bandeko na ngai mibale bafandaki wana, kati ya bwato, komilengela kokende elongo na ngai. Nalobaki: “Bandeko, bokoki kosala bongo te. Te-te. Nasengeli kokende ngai moko.”

³⁰⁷ Pe motambwisi masuwa abelemaki, pe alobaki: “Masuwa moke na yo yango oyo,” bwato ya plastike ya pembe mpenza.

Nalobaki: “Te. Te-te. Yango te.”

³⁰⁸ Alobaki: “Ee, na yango, okoki komata kino na ngámbo oyo, kilometele ntuku mwambe na ngonga moko.”

Nalobaki: “Kasi nasengeli kokatisa na ngámbo oyo kuna.” Bomoni?

“Ee,” alobaki, “kende na bato wana elongo.”

³⁰⁹ Nalobaki: “Bango bazali batambwisi masuwa te. Bayebi makambo yango malamú mpenza te. Bazali komikosa. Bakokoka kokatisa na yango te. Bango mibale bakozinda kuna. Bakokoka na bango te.”

Pe alobaki: “Ozali . . . okoki kotia motema . . .”

³¹⁰ Nalobaki: “Yoka, ngai—ngai nayebi makambo ya masuwa koleka bango, kasi nakoki kokatisa na yango te, na bisalelo ya ndenge wana.” Nalobaki: “Esengeli kozala na masuwa ya motéle mpo na kokatisa yango.” Nalobaki: “Esengeli kozala na eloko eleki yango.”

³¹¹ Pe namonaki ye kobalola miso, kino moko na bandeko yango, pe alobaki: “Ozali motambwisi masuwa?”

Ndeko yango alobaki: “Iyo.” Bomoni?

Nalobaki: “Ezali lokuta.”

³¹² Pe motambwisi masuwa yango azongelaki ngai. Alobaki: “Yoka likambo osengeli kosala.” Alobaki: “Bango balingi yo. Bandimeli yo. Kasi,” alobaki, “soki omeki kokatisa na masuwa ya motéle, bakomeka kolanda yo na bwato wana. Bango mibale bakokufa, omoni.” Alobaki: “Bango bakoki kolanda yo te.”

Pe nalobaki: “Bongo, nasengeli kosala nini?”

³¹³ Pe motambwisi masuwa yango, na libóngo, alobaki: “Zonga kuna.” Alobaki: “Ezali na ebombelo bobele moko ya moke na mboka oyo mobimba, ebombelo moke bobele moko. Pe yo, bomba kaka bilei ebele mpenza kati na yango,” alobaki, “pe bango bakotikala awa. Bako—bakotikala awa ntango yo—na ntango

yo okozala te. Kasi,” alobaki, “esengeli na yo kobomba bilei ebele kuna.”

³¹⁴ Pe nabandaki kobengisa bilei ndenge na ndenge, bandunda, ba-carottes, ba-ngai ngai, pe bongo na bongo, nazalaki kotondisa yango kuna ndenge wana. Na sima nalamukaki.

³¹⁵ Nayebaki te soki ezalaki nini, kasi sikawa nayebi. Bomoni, tozali kobomba bilei, bandeko. Oyo ezali bomoi osengeli kotambola bobele yo moko.

³¹⁶ Leo, oyebi lisusu ndoto olotaki ntango oyaki awa mbala ya liboso? [Ndeko Leo Mercier alobi: “Amen.”—N.D.E.] Na ntina na piramíde, pe okanisaki okomata kino na kati. Nalobaki: “Leo, moto moko te amataka kino awa. Nzambe nde asengeli kokomisa moto awa. Yo omataki misanda nyonso ya bomoto oyo bakoki komata.” Nalobaki: “Okoki kokóma awa te, Leo. Omoni? Zonga na nse. Yebisa na bato ete yango euti na Nzambe.” Bomoni? Bomoni?

³¹⁷ Ezali eloko oyo—oyo okoki kotielá motema te, ata bozali bandeko mibali pe basi ya malamú, ná lingomba na ngai pe nyonso, pe ata mangomba mosusu ezali malamú, ná bandeko, bipai nyonso.

³¹⁸ Sikawa, nakoki kozala mosika na lingomba ya libanda te. Moto moko alobaki: “Ee, mpo na nini okendeke epai na bato wana, ba-trinitaire, bato *oyo, oyo kuna*, pe *oyo mosusu* nyonso, ba-unitaire, pe bato ya Nkombo na Yesu, pe baoyo mosusu nyonso wana? Mpo na nini mpenza osanganaka na bango?” Bazali ya ngai. Ata basálá nini, bazali ya ngai. Bazali eteyelo na ngai.

³¹⁹ Ntango Yisalaele basalaki mabe mingi, kino Nzambe alobelaki Mose, alobaki: “Kabwana na bango. Nakosala li—libota ya sika elongo na yo.”

³²⁰ Mose amibwakaki na nzela, alobaki: “Liboso Ókamata bango, kamata ngai.”

³²¹ Ata basaláki nini, natindámáki epai na bango. Atindaka Pole, mpo na kongenga te esika Pole ezali. Esika molili ezali, wana nde Pole esengeli kongenga. Pe bosengeli kozala elongo na bato. Bosengeli kozala elongo na bango, ata ndenge nini, esengeli na bino, ata na mabe na bango.

³²² Yisalaele basalaki mpenza mabe. Basalaki mabe mingi kino Nzambe atikaki bango. Kasi, Mose, namitunaka ntango nyonso ndenge nini likambo yango ekokaki kosalema, kasi ezalaki Molimo na Klisto kati na Mose. Bomoni?

³²³ Bomoni, biso nyonso tozali na libunga. Ye azuaki esika na biso nyonso, ntango tozalaki kati na mabe na biso.

³²⁴ Ata bazali mabe ndenge nini, tóboma bondeko te to tókabwana ata moke te. Ntango nyonso tokoki kolonga molimo moko, tósala yango, na “mayele lokola nyoka, na bopolo lokola

ebenga,” bomoni, pe tómeke kolonga milimo nyonso tokoki kolonga.

325 Bongo, likambo nazali koloba na ntongo ya lelo, ezali likambo ya kobomba Bilei. Kobomba Bilei, mpo bózala na biloko ya kolia, mpo bózala na biloko ya kosepela na yango. Bóbomba Yango na ba-bande na bino. Bófanda esika ya mpio na ndako. Mbala mosusu, ntango molai sima na ngai kokende, bokokoba komikanisela ete makambo oyo ezali solo. Bofanda na ba-ndako pe boyoka. Omoni? Pe oyo ezali Bilei, ebombami, kati na ebombelo. Nayebi te soki mobembo yango ekosuka wapi. Kasi, ata ekozala wapi, Ye ayebi esika Azali kokamba; ngai nayebi te. Nazali bobele kolanda.

326 Bongo, alobaki nini awa sikawa? Boyoka na bokebi.

Na suka, bandeko, bomikembisa kati na Nkolo, pe na makasi na nguya na ye.

. . . bomikembisa . . . na makasi na nguya na ye.

Bolata molato mobimba na etumba na Nzambe, ete boyeba kotelema liboso na mayele na zabolo.

Zambi tozali kobunda na makila pe mosuni te, . . .

Kobetana masasi pe kozokisana na mbeli, bomoni, ezali yango te.

. . . kasi na bisika na lokumu, pe na nguya, pe na mikonzi ya . . . na mokili oyo na molili, . . .

327 “Mikonzi na molili.” Nani azali koyangela mokili? Zabolo. Ya solo. Makambo nyonso oyo ezali kosalema, makambo nyonso ya mbindo oyo ezali kosalema, bipai nyonso awa, pe bakonzi ya mboka oyo, pe nyonso wana, ezali nani? Nyonso wana ezali ya Zabolo. Biblia elobi yango. Zabolo azali kokonza États-Unis. Zabolo akonzaki Allemagne. Zabolo azali kokonza bikólo nyonso na mokili. Nakókóma wana, sima na miniti moke, pe tokomona soki azali kokonza yango, to te. Soki . . . Bokonzi nyonso oyo ezáláká pe nyonso oyo ekozala, kino Nzambe akotia bokonzi na Ye, ekonzami na Zabolo.

328 Bongo, nalingi koloba te ete bato nyonso bazali na kati na yango bazali ya Zabolo. Ezali na bato ya bulee oyo bazali kosala ka—kati ya bokonzi ya mboka.

329 Moko akozala awa, na mikolo ekoya, awa mpenza, mpo na kolakisa bililingi awa, elongo na Ndeko Arganbright, awa na esika oyo. Azalaki ntoma ya ekólo na bakonzi ya mboka pene na mitano, Ndeko Rowe. Pe azali . . . Akozala awa, nakanisi ekozala na mposo ya mibale na sanza ya minei. Ndeko Neville akoyebisa likambo yango. Pe azali moto moko ya malamú.

330 Alobaki akoki koloba lokota mwambe ekeseni, nakanisi. Kasi ntango azuaki Molimo Mosantu, azangaki lokota akokaki kosolola na Nkolo, bongo Nkolo apesaki ye lokota moko, alobaki,

mpo ásolola na Ye na yango. Apesaki ye moko ya sika, oyo naino asalela te. Malamu.

. . . na milimo mabe kati na bisika na likolo.

Yango wana . . .

³³¹ Sikawa boyoka, bino nyonso basodá, liboso ya kobanda molongo ya mabondeli.

. . . bino bokamata . . . bokamata molato (m-o-b-i-m-b-a) mobimba (ndambo na yango te) . . . molato mobimna na etumba na Nzambe, ete boyeba kotelema na mokolo na mabe . . .

Wana nde mokolo tozali kobika na yango.

. . . sima na kosala nyonso, kotelema naino.

Botelema ngwi . . .

³³² Amen. Bososoli yango? Omoni, molingami? [Ndeko Branham asololi lisusu na ndeko mwasi mobeli—N.D.E.] Ntango bosali nyonso bokoki kosala, mpo na kotelema ngwi, bongo botelema ngwi. Boningana te.

Bongo botelema ngwi na loketo lokangami . . .

³³³ Boyoka likambo oyo. Boyoka awa, nini yango ezali. “Loketo na bino.” Ezali eteni ya katikati, awa, bomoni.

. . . loketo lokangami na solo . . .

³³⁴ Solo ezali nini? Liloba na Nzambe. Ya solo. “Liloba na Yo ezali Solo.” Malamu.

. . . na kolata boyengebene lokola ebolo makasi na ntolo;

³³⁵ Yango ezali: “Sala makambo ya sembo.” Ozali na Liloba na Nzambe kati na yo, ósala makambo ya sembo. “Ebolo makasi na ntolo ya boyengebene.”

Pe koselingwa na sapato na makolo lokola bantoma ya nsango malamau na kimia;

³³⁶ Bokende bisika nyonso, na esika nini, na ntango nini, bóselingwa na sapato na makolo lokola bantoma ya Nsango Malamu. Bomoni? Pe botala:

Likolo na yango nyonso, likolo na yango nyonso wana, bokamata nguba na kondima, . . .

³³⁷ Yango nde ekweisaka mbanzi, bomoni, “nguba na kondima.”

. . . na yango bokoki kozimisa mbanzi nyonso na móto na oyo mabe.

Bokamata ekoti ya lobiko, . . .

³³⁸ Yango nde bomoto ya kati. . . Makanisi—makanisi, na kati awa, motó; yango ezali kozipa motó.

. . . pe—pe mopanga na Molimo, yango Liloba na Nzambe.

339 Ekoti yango ekosunga yo na nini, esalaka nini? Ezali kobatelama. Ekoti esalemi na nini? Na motako. Motako, ekoki ata kolekisa mai te; ezali makasi, makasi koleka ebende. Ekoti ya motako, (nini?) lobiko, mayele ya koyeba likambo oyo: “Lobiko ya nzoto na ngai eutaka na Nzambe. Lobiko ya molimo na ngai euti na Nzambe. Kobikela makambo na ngai elongobani na Liloba na Ye, na makanisi ya mangomba te; Liloba!” Amen. Yango wana. Kozipama na, kobatelama, ekoti ya lobiko, lisiko. Kamata yango, na sima kende liboso. Oh, sikawa, sikawa, yango nde tosengeli kosala. Mapinga ya Satana . . .

340 Sikawa botala, sikawa, biso . . . Nasengeli kosala nokinoki, kasi na—nasengeli kokotisa likambo oyo.

341 Mapinga ya Satana epesaka malali. Yango nde Satana azali, azali mobebisi. Satana, bokonzi mobimba ya Satana, ezali malali, kufa, pe mawa, pe bipekiseli, pe mitungisi, nyonso wana eutaka na Satana.

Nzambe azali Bomoi, kondima, esengo, kimia, na ngámbo *oyo*. Bomoni?

342 Sikawa, yango nde ba-nguya minene mibale oyo ezali kobunda sikawa. Ezali kobunda. Ezali kobunda awa, kati na ndako oyo, sikawa. Ezali kobundisa yo, mokolo na mokolo, nguya yango nyonso.

343 Satana, alandaka yo bisika nyonso, engambe Goliata wana, ya bokonzi, ya nganganzambe, azali koluka kobangisa yo. Ezali wana, kasi Nzambe . . .

344 Bobatelami makasi, amen, na Nsango Malamu, na Liloba ya Solo oyo ezingi loketo na bino. Nkembo! Motei, ezali mpenza yango. Ekoti ya lobiko; nguba ya kondima; pe Mopanga, ozali koningisa Yango na loboko na yo! “Satana, naye kokutana na yo. Yo oyei kokutana na ngai na nkombo ya boyebi. Oyei kokutana na ngai na nkombo ya—ya mayele. Oyei kokutana na ngai na nkombo ya ebongiseli. Oyei kokutana na ngai na nkombo ya *oyo, oyo kuna, to oyo mosusu*. Kasi ngai naye kokutana na yo na Nkombo na Nkolo Nzambe ya Yisalaele. Naye kobundisa yo. Longwa na nzela!” Ata liwa yango moko ekoki kotelema wana te. Pasola nzela na yango mbala moko. Ya solo.

345 Mapinga ya Satana epesaka bokono, kasi mapinga ya Nzambe etindami kobengana yango. Amen. Yango mpenza. Ntango nyonso Satana abwakelaka bino yango, mapinga ya Nzambe esengeli kobengana ye. Amen. Kobengana!

346 Yango nde mayele oyo Nzambe asalelaki. Satana asalelaki mapinga ya kobebisa, mpo na kozanga kondima Liloba na Nzambe, pe amisalelaki bokonzi kitoko koleka oyo ya Mikaele, bongo Nzambe abenganaki ye.

347 Lolenge ya Nzambe kosala, ezali kobengana oyo ya mabe. Kokweisa mabanzo. Kokweisa bobangi. Kokweisa mitungisi.

Kokweisa bokono. Kokweisa masumu. Amen. Yo ozali likolo na yango, osekwi kati na Klisto Yesu, ofandi na bisika na Likolo, milimo mabe nyonso na nse na lokolo na yo. Soki ameki kotombola moto na ye kuna, eloko nini. . .

³⁴⁸ Oyebe, osili kokufa. Bomoï na yo ebombami. *Kokufa*, ezali nini? Osili kokufa na biyokeli na yo. Osili kokufa na lisosoli na yo. Mokano na yo moko ya bomoto ekoki koloba: “Iyo, nabanzi ngai. . .” Okúfá na mabanzo na yo. Okúfá na makambo nyonso wana. Pe okundámá na Nkombo na Yesu Klisto; pe osékwá elongo na Ye. Pe esika nyonso Ye azali, yo pe ozali wana.

³⁴⁹ Likambo nini esalemaki ntango bango, moko na bato ya ntembe, akómaki na Lola? Nzambe abenganaki ye. Pe Alobaki nini na basodá oyo basekwi kati na Klisto? “Soki molimo mabe ayei, bwaka ye libanda. Bengana ye.” Ntango Yesu alakisaki mapinga na Ye, pe Atindaki bango, kino na suka na mokili: “Bokende na mokili mobimba, kosakola Nsango Malamu na bikelamu nyonso. Moto nani akondima pe akobatisama akobika; kasi moto nani akoboya kondima akokweisama. Bilembo oyo ekozala na bango bakondima, basodá na Ngai. Na Nkombo na Ngai bakobengana milimo mabe; bakoloba minoko ya sika; bakolokota banyoka, to bakomela biloko na kufa, ekoyokisa bango mpasi te; soko bakotia maboko likolo na babeli, bakobika.”

Tokei, basodá Baklisto!
Tótambola kokende na etumba,
Ná ekulusu na Yesu
Kokende liboso na biso.

³⁵⁰ “Nasílá kobakama na ekulusu elongo na Ye, ata nazali na bomoi, nazali kobika na ngai moko te, kasi Ye nde azali kobika kati na ngai.” Liloba ezali kokoba, liboso na biso, Nzambe azali kopasola nzela, na Mopanga na Ye ya mopotu na ngámbo mibale.

³⁵¹ Bongo, kokamwa ezali te, ntango Grant abotolaki Richmond, pe ntango elenge mwasi ya súdi amonaki Grant kokota, mpemela eyelaki ye. Pe alobaki:

Miso na ngai emoni nkembo ya boyei na Nkolo;
Azali konyata ebombelo na mbuma, epai
miwiti na nkanda ebombami;
Afungoli mokalikali monene na mopanga na
Ye ya nsomo na lombangu;
Mapinga na Ye ezali kokoba kokende liboso.

³⁵² Amen. Grant alongaki Richmond ndenge nini? Bobele ntango akómaki wana. Amen. Ndenge wana nde alongaki Richmond.

³⁵³ Ndenge wana nde basodá na Nzambe balongaka lisumu, malali; bobele ntango bakómaka wana. Amen. Ndenge wana nde balongaka ba-ntembe na bango, nsomo na bango, pe nyonso. Soki moko na yango eteleme, babomi ye. “Longwa na

nzela!” Hólalá! Ezali bongo. Nzambe abenganaka bango, ndenge Asalaki na Lola. Kapiténí-Mokonzi monene na biso alakisi biso ndenge basalaka. Amen.

³⁵⁴ Roy Roberson ná Ndeko Funk, mingi kati na bino, basodá ya kala, oyo bozali awa, boyebi oyo kapiténí ya solosolo azali.

³⁵⁵ Mokolo moko, ngai. . . mwa kopaní ya babomi móto oyo ezali awa na Jeffersonville. Móto epelaki kuna na Pfau. Pe kompaní ya babomi móto ya Jeffersonville bazalaki wana, pe kapiténí azalaki kobaluka-baluka, alobaki: “Bóbwaka mai moke *awa*.” “Pss-pss-pss-pss,” lokola tiyo moke ya kosopa mai. Tala baoyo ya Clarksville bakómaki wana: “Bóbwaka mai moke *awa*.” “Pss-pss-pss.” Ndako monene ya Pfau ezikaki mobimba.

³⁵⁶ Babengisaki bato ya Louisville. Baoyo wana balakisama malamumu. Oh, ndenge losébá na bango ezalaki kobeta!

³⁵⁷ Pe bakapiténí mikonzi oyo bazalaki wana, ya ba-kompaní wana ya babomi móto, bazalaki koloba: “Bóbwaka mwa mai *awa*. Bóbwaka mwa mai *awa*.” Balakisamaki malamumu te.

³⁵⁸ Ndeko, bobele ntango motuka yango etelemaki, nani azalaki likolo na ebuteli? Kapiténí. Ntango bamatishi ebuteli yango, amataki elongo na yango. Ntango akómi na lininisa, akómaki naino na lininisa yango te. Akamataki epasoli na ye pe abwakaki yango mpo na kobuka lininisa, pe alobaki: “Mibali, tokei.” Pe móto ekufaki, sima na ntango moke. Kapiténí!

³⁵⁹ Ezali kapiténí te, oyo alobaka: “Bóbwaka mwa mai *awa*. Bomeka mwa moke *awa*.”

³⁶⁰ Kasi: “Mibali, tokei!” Amen. Afungolaki nzela. Alakisaki biso ndenge basalaka.

³⁶¹ Namilobelaki: “Kompaní ya babomi móto ya bato balakisama malamumu, babomaki móto yango na mwa ntango moke.” Mpo na nini? Bazalaki na kapiténí moko wana, oyo ayebaki eloko azalaki kosala.

³⁶² Ndeko, bokoki kolobela likindo na bino ndenge olingi. Bibongiseli na bino oyo esalemi na bato, mangomba na bino, bosakana na yango.

Nazali na Kapiténí-Mokonzi, oyo alakisaki ngai lolenge basalaka.

Okoloba: “Ee, soki nakoki koyoka nsolo na yango, komiyoka na yango.” Oh, bolema!

³⁶³ Tala lolenge Kapiténí-Mokonzi alobaki basalaka, na Luka mokapo ya 4. Nazali na ntango ya kotanga yango te. Bótanga yango, bino moko. Malamumu. Luka mokapo ya 4, kobanda na eteni ya 1.

³⁶⁴ Alobaki ata moke te: “Sikawa, nalobi na bino. Bókende epai *boye*, pe bósala ebongiseli moko monene. Bópona bakengeli,

basungi, pe, to bopona ba-kardinal, ba-epískopo, pe bozwa eloko *boye*.” Alobaki yamgo ata moke te.

³⁶⁵ Ntango Satana akutanaki na Ye, alobaki: “Sikawa Ozali na nzala. Bongola mabanga oyo ékoma lipa.”

Alobaki: “Ekomami . . .”

³⁶⁶ Alobaki: “Awa, tokomema Yo awa na likolo, pe tokolakisa Yo eloko moko.”

“Kasi ekomami . . .”

“Nakosala *boye*, soki Yo osali yango.”

“Ekomami . . .”

³⁶⁷ Kapitáni-Mokonzi alobaki ete esalemaka nde bongo. Basalaka ndenge nini, ndeko mwasi? “Ekomami: ‘Soki baktia maboko likolo na babeli, bakobika.’” “Ekomami: ‘Na Nkombo na Ngai bakobengana milimo mabe.’” Amen. Ezalaki nini? “Ekomami!” Yango nde mitindo ya Kapitáni. “Ekomami: ‘Ye oyo akoyoka Maloba na Ngai pe akondimela Moto oyo atindi Ngai, azali na Bomoi na Seko.’ Ekomami! Ekomami! Ekomami!” Yango nde—yango nde mitindo. Wana nde sodá. Yango nde nzela. Yango nde bibundeli tosalemaka na etumba.

³⁶⁸ Asalaki nini? Akendeki wana, liboso na Goliata. Alakisaki . . . Ndenge nini Dawidi alakisaki mapinga lolenge basalaka? Ndenge nini Dawidi alakisaki Yisalaele lolenge basalaka? Dawidi elingi koloba “molingami, mobikisi.” Bomoni? Dawidi asalaki ndenge nini? Alobaki: “Botala lolenge basalaka. Bomipesa na Liloba na Yawe.”

³⁶⁹ Pe Goliata ayaki wana, alobaki: “Oyebi nini? Nakolokota yo na nsonge ya likonga oyo, pe nakopesa yo lokola bilei na bandeke.”

³⁷⁰ Alobaki: “Yo oyei kokutana na ngai lokola ebongiseli. Oyei kokutana na ngai lokola moto na mayele ya eleko oyo. Oyei kokutana na ngai na mopanga na yo monene molai na metele minei na ntuku mibale na mitano. Oyei kokutana na ngai na ekoti ya motáko, ná nguba oyo nakoki ata kotombola te. Oyei kokutana na ngai lokola mobundi oyo ayékólá malamú. Oyei kokutana na ngai na lipolome ya philosophie, na lipolome ya mibeko, pe na lipolome mibale ya mibeko. Oyei kokutana na ngai na biloko nyonso oyo. Kasi ngai naye na Nkombo na Nkolo Nzambe ya Yisalaele, pe lelo nakokata motó na yo likolo na mapeka na yo.” Amen. Mwa moto mpamba yango ayaki kokutana na engambe wana, kasi ayebaki epai wapi atelemaki.

Yisalaele, bazalaki kolenga-lenga kuna na sima: “Oh, mwa mwana moke *boye*.”

Goliata alobaki: “Nakolakisa yo likambo nakosala.” Pe abelemaki wana.

371 Azalaki na k-o-n-d-i-m-a [Na Ngelesa: f-a-i-t-h—N.D.T.], bomoni, kati n-a Y-e-s-u [J-e-s-u-s], mabanga mitano, mabanga mike mitano. Mwa libanga moke moko, kuna, mpo na kobanda. Abalolaki yango boye, Molimo Mosantu azuaki libanga yango, pe ekendeki semba. Goliata akweaki na nse. Ezalaki bongo nde esalemaki.

372 Lolenge wana nde Yesu alobaki, oyo Alobaki. “Sikawa, soki bino, bandeko oyo bokokende na libanda na etumba, soki bolingi koyeba lolenge ya kolonga milimo mabe oyo, nakolakisa bino ndenge esalemaka.”

373 Satana alobaki: “Nakokutana na yo.” Goliata: “Nakolakisa yo eloko nakoki kosala. Ozali na nzala. Soki Ozali Mwana na Nzambe, nazali kobeta na Yo móndengé. Yo Olobi ete Ozali Mwana na Nzambe. Nakobeta na Yo móndengé. Soki Ozali Mwana na Nzambe, bongola mabanga oyo ékoma lipa. Lia; Ozali na nzala. Pe soki Ozali Mwana na Nzambe, Ozali na nguya ya kosala yango.”

374 Alobaki: “Kasi ekomami pe: ‘Moto akobika bobele na lipa te.’” Oh, ndenge wana nde Kapitáni-Mokonzi asalaki.

Amemaki Ye likolo na tempelo. Alobaki: “Soki Omibwaki na nse,” alobaki, “Oyebi ete ekomami pe . . .”

375 Alobaki: “Iyo.” Alobaki: “Ekomami lisusu: ‘Okomeka Nkolo Nzambe na yo te.’” Bomoni nkombo oyo Amibengaki? “Nkolo Nzambe na yo.” Iyo. “Okomeka Nkolo Nzambe na yo te, ekomami, lisusu, pe bongo.” Bomoni? Hólalá!

376 Asalaki nini? Alongaki ye, na Liloba na Nzambe. Mayele mabe ya Zabolo ezali ete ámema yo kozanga kondima Liloba na Nzambe. Pe Kapitáni-Mokonzi alobaki: “Kamata Liloba na Nzambe pe salela yango. Na Nkombo na Ngai bakobengana milimo mabe.”

377 Oh, Satana, kapitáni-mokonzi na bango, oh, iyo, boyebi, bibongiseli mosusu oyo elukaka kondimisa bino ete azali na makolo epasuka lokola nyama, boyebi, ná mokila epaswani, pe biloko nyonso wana. Bóndima yango te. Azali bongo te. Te misie, ndeko. Azali na mayele mabe mingi. Bóndima te ete azali na biloko wana. Basalaka bongo kaka mpo na kobangisa bino. Oyo wana ezali Zabolo te. Mpo na kobanda, Zabolo azali na makolo lokola nyama te; nandimaka yango ata moke te. Azali molimo. Zabolo azali molimo. Azali na makolo epasuka lokola nyama te pe nyonso wana, lokola bamekaka kotalisa ye. Te, te.

378 Kasi, azali na bwanya. Ndeko, azali mpenza moto na bwanya, atángá mingi mpenza, azalaka bobele bongo, na bwanya ya mokili. Oh, iyo. Azali kitoko. Abongísá mapinga na ye na bwanya ya mokili, kino, ndeko, komeka na yo ko—komeka na yo kowelana na maloba na ye te. Ekosengela na yo koyemba malamumu likambo ya koloba, soki okutani na moko na bato wana, oyo balobaka: “Ntango ya bikamwa esila koleka.” Te, azali na—

azali na makolo epasuka te. Azali, oh, a—a—auti kobima na koyekola likindo. Azali na mayele mingi, ndeko. Nalingi koloba, azali na mayele mpenza: lipolome ya philosophie, lipolome ya mibeko, Q.U.S.T, pe nyonso mosusu. Bomoni? Nyonso wana, azali na mayele mpenza na ndenge ekoki. Moto na bwanya, na ntembe te, azali nyoka, alekaki bango nyonso na mayele mabe. Suki ya petepete, ndeko, pe, nalingi koloba, ntango alati, okomona masusa te na kazaka na ye. Azali na mayele mpenza, azali na bwanya pe mayele mabe na ndenge ekoki. Ya solo.

³⁷⁹ Kosala na ye maseki te, soki oyebi malamumu te likambo ozali koloba. Ya solo. Oh, kasi toyebi mayele mabe na ye—na ye ya kala. Toyebi likambo alukaka kosala: komema biso kozanga kondima Liloba na Nzambe.

³⁸⁰ Pe azali na makolo epasuka lokola nyama te. Te, te, te. Sikawa, tomoni ete soki azali na makolo epasuka lokola nyama te, na bongo, asengeli kozala eloko mosusu. Azali na mayele mabe mingi. Azali na bwanya, atángá mingi, moto na molongo. Ndeko, akómisa pe mapinga na ye bongo.

³⁸¹ Bótala, mokolo moko, kuna na Suisse. Nazali koyeba esika ya kosukisa te, baninga. Ezali na—na. . . Kuna na Suisse, mapinga ya Allemagne bakómaki kuna, ma- . . . ná bapaya mosusu koya kokota. Kasi, ezalaki lokola etutú ya bilíki; bato nyonso bayekolaki malamumu, makonga na bango nyonso etiamaki *boye*, metele mibale na minei to metele misato liboso na bango. Pe bakendeki kuna kobundisa mboka moke oyo ya Suisse, kuna, bango bazalaki na nini? Bazalaki na bibundeli, lokola mbe—mbeli ya makwangola na bango, mangenda ná mabanga, pe bazalaki wana. Bazongisaki bango sima. Bandako na bango ezalaki na ngámbo mosusu ya ngomba. Pe wana mapinga ya Suisse eyaki mpo na kobunda na bango. Basalaki bango mabe moko te. Bamikotisaki mpo na kobotola mboka na bango.

³⁸² Mwana oyo asalaki mpenza nini, azali naino mwana? Satana, ye nde, alingi koboma ye soki ekokaka. Na ntembe te. Ezali nde ye; liboso na ntango. Bomoni?

³⁸³ Bato ya Suisse basalaki na bango eloko te. Bazalaki bato malamumu. Bazalaki komeka kobatela bandako na bango, kasi bazalaki wana mpo na komibatela. Sima na ntango moke, mobali moko na nkombo Arnold von Winkelried ayaki. Mapinga yango ezalaki koya. Bazingamaki ngámbo na ngámbo. Balobaki: “Tokosala nini?”

³⁸⁴ Bipai nyonso, ebele ya bato ya kotanga te, oyo bayekolisami malamumu. Satana asalaka nde bongo. Ayekolisami malamumu, likonga na ye atalisi yango liboso, moto nyonso kotambola na molongo; moko, mibale; moko, mibale; bazalaki koniata mwa mapinga wana. Bakobaki na bango ko—kotambola, yango nde nyonso basengelaki kosala, pe kotobola-tobola bango, bango nyonso, na mipanga. Makonga ezalaki kotobola bango ngámbo

na ngámbo. Ezalaki mpenza suka ya mapinga ya Suisse. Ezalaki mpenza suka na bango. Na ngámbo mosusu ya ngomba, bándako na bango ezalaki kuna ná balingami na bango. Basi na bango, balingaki kobotola bango pe kokamata bango na makasi, ná bilenge na bango ya basi, pe balingaki koboma bana na bango, kozikisa ba-ndako na bango, pe nyonso, kozua biloko na bango ya kolia, bibwele ná biloko mosusu, pe esili. Bakómaki esika yango.

³⁸⁵ Likambo nini esalemaki? Mpemela esimbaki moko na bango na nkombo Arnold von Winkelried. Alobaki: “Bato ya Suisse, lelo oyo nakokufa mpo na Suisse.” Amen. “Lelo oyo nakokufa mpo na Suisse.”

Balobaki: “Okosala nini?”

³⁸⁶ Alobaki: “Bólanda kaka ngai pe bóbunda na biloko nyonso bozali na yango.” Atelemaki wana; abwakaki likonga na ye, mwa língénda oyo asimlaki na loboko, *boye*. Pe agangaki, maboko likolo, *boye*, pe apoti mbangu kokende ngámbo na bango, koganga makasi: “Bópesa nzela mpo na bonsomi!” Apotaki na mbangu na ye nyonso, semba kino na mapinga wana. Pe, na sima, abotolaki makonga nyonso oyo akokaki kozua, pe amitobolaki na yango ntólo na ye *boye*, pe akufaki.

³⁸⁷ Ayebisaki bango, liboso ákende. Alobaki: “Mwa ndako moko ezali kuna, mwasi ná bana, oyo nazali kotika, ndako moke nauti kosomba.” Pe alobaki: “Na—nalingi bango, kasi, lelo oyo, nakokufa mpo na Suisse. Apesi ngai. . .” Alobaki: “Napesi bomoi na ngai mpo na kobikisa ekólo.” Pe azalaki elombe. Kobanda wana, basala lisusu etumba te. Yango, esukisaki makambo.

³⁸⁸ Mapinga wana epalanganaki, na kotalisama ya elombé wana, kino esalema te ete. . . Ma—mapinga wana ezuaki mpenza mobulu. Bato na Suisse bakweisaki mabanga likolo na bango, pe babenganaki bango na mboka; pe bazóngá lisusu te, kobanda wana. Eleki mibu nkama na nkama. Bomoni? Mpo na nini? Ezalaki likambo moko monene.

³⁸⁹ Kasi, oh, ndeko, mokolo moko, wana boínga, bonkoko, ntembe, bobangi pe kobanga, ekómisaki libota na Nzambe na suka. Moto moko azalaki, na Nkombo ya Yesu Klisto: “Lelo oyo Nakokufa mpo na bato.” Ya solo.

³⁹⁰ Alobaki nini na mapinga na ye? “Bólanda ngai pe bóbunda na biloko nyonso bozali na yango. Soki ozali na língénda, bunda na língénda. Kobanga te. Ozali na nzete, bunda na nzete. Ozali na libanga, bunda na libanga, eloko nyonso ozali na yango.”

³⁹¹ Yango nde oyo Kapitényi-Mokonzi na biso alobi lelo. “Nazuaki Liloba na Nzambe, pe Nalongaki Zabolo ná nguya na ye.” Akataki ye mikemike, amen, na Liloba yango. Sikawa, eloko nyonso ozali na yango, soki ozali bobele na Liloba moko: “Nkolo

Nzambe oyo Akobikisa yo,” kata ye mokemoke. Landá. Amen. Landá Kapiténí na biso. Iyo, misie. Akataki ye biteni biteni.

³⁹² Satana, ná bokonzi na ye ya kitoko pe ya minene, pe ya kitoko koleka, pe nyonso, na makambo ya mikolo oyo. Ezali na ntina moko te mpo na biso. Ya solo. Azali kaka oyo aleki banyama nyonso ya elanga na mayele mabe. Iyo, misie. Yesu alobaki ete bana ya mokili oyo baleki bana ya Bokonzi na Nzambe na mayele.

³⁹³ Bongo, bitumba minene mibale oyo. Toko . . . Nasengeli . . . esengeli kosilisa. Bitumba minene mibale oyo ezali kobundama sikawa. Sikawa, nde ezali ntango bokono pe nyonso ebetaki mokili, kino minganga bayebi lisusu eloko ya kosala te, pe bato bayebi te nini basala. Eloko moko te ezali, pe—pe kaka, toko . . . Pe mapinga, mapinga moke ya Nzambe, ekómi na suka pe nyonso. Ndeko, ntango ekoki mpo na Arnold von Winkelried mosusu. Ntango ekoki, ntango mpo moto na Nzambe mosusu atelema. Ntango ekoki mpo Eliya ámonana. Ntango ekoki mpo likambo moko ésalema.

³⁹⁴ Mapinga ya Nzambe, bókanga makanisi na bino. Botelema ata moke te, mpo na kokanisa makambo Zabolo azali na yango mpo na kopesa bino na nzela na biyokeli na bino. Kasi bomikaniselaka, Liloba na Nzambe ekoki kokwea ata moke te.

³⁹⁵ Mapinga minene mibale oyo! Ntango moyini akoya lokola ebale, ndenge azali koya lelo, Nzambe alobaki Akosala nini? “Molimo na Nzambe akotelemisa benbele mpo na kotelemela yango.” Yo ozali moko na bango? Iyo, misie.

³⁹⁶ Bateyaki biso na Yakobo 4:7 . . . nazali na ntango ya kotanga yango te. Yakobo 4:7, ete, “Botelemela Zabolo, pe” akokende kaka te, kasi, “akokima.” “Bótelemela Zabolo.” Batelemelaka Zabolo ndenge nini? Kaka ndenge Kapiténí-Mokonzi na biso ayebisaki biso kosala. Kamata Liloba na Nzambe. Batelemelaka Zabolo nde bongo, ezali na Liloba na Nzambe. Kapiténí-Mokonzi ayebisaki biso mpenza lolenge basalaka. Malamu.

³⁹⁷ Sikawa, mpo na kosukisa, nalingi koloba boye. Zabolo wana ya kala, boye, bokanisi ete azali na motema mabe. Bokanisi ete akoki kobundisa mwana moke? Akoki kobundisa moto nyonso. Abundisaki Yesu Klisto. Ayaki kobundisa Ye, mbala misato ya nkanda mpenza. Boyebaki yango? Satana abundisaki Ye bobele mbala moko te. Akobundisa yo na bokono, na sima akozonga lisusu kobundisa yo, akoyebisa yo: “Ntango na bikamwa esila koleka. Obiki te. Eloko moko ezali Wana te.” Boyebi ete ezali solo?

³⁹⁸ Abundisaki Yesu mbala misato. Bitumba misato ya nkanda, ayaki na lombangu epai na Yesu, ná kozanga kondima na ye na Liloba na Nzambe. Yesu azalaki Liloba. Ya solo, andimaki yango te. “Soki Ozali . . . Soki Ozali . . .” Ayaki, na bitumba ya lolenge mabe, ndenge moyini ayaka lelo, na ba-ntango mosusu.

Ayaki wana, alobaki: “Soki Ozali Mwana na Nzambe, lakisa ngai ekamwiseli. Námona yango kosalema.” Ndeko, bitumba misato ya nkanda, “Soki Ozali . . . Soki Ozali . . .”

³⁹⁹ Sikawa, Yesu asalaki nini? Yesu azalaki Liloba na Nzambe. Azalaki Liloba. Abundisaki Liloba. Nkembo! Na—nabandi mpenza . . . nakómi komiyoka malamú, mpo na koteya sikawa, nalobi solo mpenza. Ya solo. Yesu azali Liloba. “Na ebandeli Liloba azalaki, Liloba azalaki mboka na Nzambe, pe Liloba azalaki Nzambe. Pe Liloba afandaki, akómaki mosuni, pe afandaki . . .” Yesu azalaki Liloba. Asalaki nini? Akataki ye mike-mike. Hólalá! Nakosukisa. Yesu asalaki nini? Azalaki Liloba. Bongo, ná Liloba, Akataki Satana ntango abundisaki Ye na nkanda. Apumbwaki kuna lokola ba-para, basodá oyo babandaka bitumba, to eloko moko ndenge wana, apumbwelaki Yesu, Liloba, ndenge wana. Pe Yesu azuaki Liloba yango, pe Akataki ye biteni-biteni. Aleluya! Ya solo, Akataki ye biteni-biteni, alongaki ye na Liloba.

⁴⁰⁰ Bomoni kobundisa na ye? Botala, boyoka na bokebi, nakosukisa na likambo oyo. Kobundisa na ye ezali nini? Kozanga kondima Liloba na Nzambe, yango nde kobundisa na ye. Na yango, bomoni etumba monene koleka oyo ebundamá? Nguya ezali bobele mibale: Satana pe Nzambe. Bongo Satana abundisaka yo na ebundeli nini? Ézali komeka komema yo kozanga kondimela Ebundeli na yo. Abotola yo ebundeli. Toyoka—toyoka na kimia mpenza sikawa. Boyoka. Soki akoki komema yo kozanga kondimela Ebundeli na yo, elingi koloba, soki amemi yo kondima ete Ebundeli na yo ezali na nguya ekoki te, asili kobotola yo ebundeli.

⁴⁰¹ Oh, Ndeko Neville, nazali kolikia ete tokotika yango ata moke te. [Ndeko Neville alobi: “Nazali kolikia pe kobondela ésalema te.”—N.D.E.]

⁴⁰² Botala. Asili kobotola yo ebundeli, ntango amemi yo kozanga kondimela Ebundeli yango. Ntango okitisi Yango na nse, etumba na yo esuki wana. Ésili mpo na yo. Simba Ebundeli yango. Kokitisa Yango na nse te. Tomoni kozanga kondima na ye. Tika . . .

Nalingi kobakisa likambo moko sikawa, na miniti moko.

⁴⁰³ Russie. Nalingi koloba likambo oyo mpo na basodá ya kala, pe bamosusu nyonso, awa, pe mpo na bino bayekoli ya Biblia. Mpo na nini bozali koloba-loba mpo na Russie? Hum! Boyoki ngai te koloba na bino ete bótonga ekimelo na ba-bombe, boye te? Mpo na nini bozali koloba-loba mpo na Russie? Russie ezali mpamba. Bakolonga ata etumba moko te. Bakokonza pe mokili ata moke te. Kominizme ekokonza mokili te. Likambo nini na bato? Liloba na Nzambe ekoki kokwea?

⁴⁰⁴ Boyoka, likambo oyo etiami na bande sikawa. Nazali koloba na mokili, to bipai nyonso bande oyo ekoki kokende. Nazali pe

koloba na bino bozali awa, ata likambo nini ekómeli ngai, bino, bondima yango.

405 Russie, kominizme, ekokonza eloko moko te. Liloba na Nzambe ekoki kokwea te. Romanizme nde ekokonza mokili.

406 Tókamata emononeli na Danyele. Ezali Liloba na Nzambe. “E yo, Danyele. . .” “E yo, Mokonzi Nabukadanesala, nde ozali motó na wolo,” Babilone. “Bokonzi mosusu ekokitana na yo, ekozala ya ebende,” bomoni, elingi koloba ba-Mede na ba-Perse. Mosusu ezalaki ya ba-Grek, Alexandre Monene. Na sima, Roma eyaki. Eloko moko te elobamaki na ntina na kominizme. Roma nde ekonza mokili.

407 Yesu Klisto abotamaki na eleko ya bokonzi ya Roma, pe mbala ya liboso Ayaki awa, banyokolaki Ye, na bokonzi ya Roma. Pe na Komonana na Ye ya mibale, na Boyei na Ye sikawa, Nsango na Ye ezali konyokolama na bibongiseli ya Roma, oyo ezali mama na bango nyonso. Pe ntango Akozonga, Akoya lisusu mpo na kosilisa nye bokonzi ya Roma, oyo Bayuda bazelaka ntango myonso, ete Aya kosilisa nye bokonzi ya Roma.

408 Bokitani ya lingomba Katoliko ná bibongiseli nyonso ya mokili, ezali kosangana sikawa lokola ebongiseli moko, lisanga ya mangomba, bazali kosangana mpo na kokóma ebongiseli. Ezali Russie te. Ezali nde Roma. YANGO ELOBI NKOLO. Iyo. Bolakisa ngai Likomi moko esika kominizme, to eloko mosusu libanda na Roma, nde ekokonza.

409 Ba-Mede na ba-Perse bakitanaki na Nabukadanesala? Na bosolo. Ba-Grek bakitanaki na bango? Iyo. Roma azuaki bokonzi sima na bango, uta ntango wana? Ekabwanaki na bokonzi zomi ya Ottoman, kaka ndenge tozali na yango sikawa? Boye . . .

410 *Eisenhower*, oyo elingi koloba “ebende.” *Khrushchev* elingi koloba “mabelé ya ntóki.” Bakutanaki, awa? Pe *Khrushchev* alongolaki sapato na ye. [Ndeko Branham abeti likolo na eteyelo—N.D.E.] Mpo émonana malamú, likambo ya polele, abetaki likolo na mesa, *boye*, mpo na kolakisa bato. [Ndeko Branham abeti likolo na eteyelo.]

411 Kasi, likambo nini na bato lelo? Kondima ekómi wapi? Boni, bondimi te ete Liloba na Nzambe ezali Solo? [Losambo balobi: “Amen.”—N.D.E.] Pe likambo yango ezali na kati *Awa* te. Likambo nini na batei lelo? “Kominizme!” Batei nyonso awa bazali koluka kobundisa kominizme. Kominizme, eloko te!

412 Eloko yango, Zabolo azali kotonga yango na miso na bino, kasi bozali koyeba yango te; ezali nde Romanizme, bibongiseli. Pe Roma nde mama na bibongiseli. Biblia elobi: “Azali mwasi ya ndumba, pe bana na ye ya basi bazali bandumba,” kotelemela Nzambe, kotemela Liloba na Ye.

413 Basodá, bosimba Liloba makasi. Banje na mawa, bokangama na Liloba yango. Mokolo moko, nakokufa, kasi Liloba oyo ekoki

kokufa te. Pe bino bilenge, soki esalemi na ekeke na ngai te, bino bokomona yango. Likambo nde yango wana.

414 Boyokaki nsango na ntongo ya lelo? Ete Madame Kennedy akendeki komonana na pápa, pe likambo pápa alobaki. Bomoni, mangomba nyonso ya mokili! Oh! Ee, ntango mosusu tokolobela yango mwa mingi, lomingo ekoya.

415 Bomoni, bómitungisa mpo na Russie te. Russie ezali bobele mwa libanga moke na libongo. Bómitungisa mpo na kominizme te. Bónsenzela nde na Romanizme, ntango ezali kosangana na mangomba. Eloko moko te ekomami kati na Makomi ete kominizme ekokonza mokili.

416 Pe natelemaka nde na Liloba, nyonso etikali etali ngai te. Nandimaka nde Liloba. Romanizme nde ekokonza mokili. Pe Romanizme ezali mama na mangomba ebongisami. Lingomba ata moko te ebongisamaki liboso na Roma, pe bango nyonso bauti na yango. Pe Biblia elobi bongo: “Azali mama na basi ya ndumba.” Nakoki lisusu kolekisa ndambo na mokolo likolo na yango, kasi nabanzi ete ezali malamumu ete nákende liboso.

417 Soki monguna abundisi biso, na bongo: “Oh, nayebisi yo, esengelaki ókota na oyo ya biso . . .” Okosala nini, kozonga sima, kobeta ntembe? Sodá ya solosolo te, akosala yango te. Te, misie.

418 Tosengeli kosala nini kasi? Makanisi: “Tika ete makanisi oyo ezalaki na Klisto. . .” Yango nde Biblia elobaki? [Losambo balobi: “Amen.”—N.D.E.] “Makanisi oyo ezalaki na Klisto, ézala kati na bino.” Ye azalaki na makanisi ya ndenge nini? Kokangama na Liloba. Ya solo. Kangama na Liloba, Liloba ya Tata, pe Alongaki moyini ntango nyonso. Sikawa, soki moyini abundisi yo pe ameki koyebisa yo ete osengeli kosala *boye* na *boye*, okosala nini? Kangama na Liloba. Ya solo.

419 Bongo olingi kosala nini? Kamata Liloba. Liloba ezali nini? Biblia elobaki yango awa. Touti kotanga yango. Mpamba te Molimo, pe, na Nzambe, ezali Liloba. Bomoni? Bóyoka yango. “Pe bókamata ekoti ya lobiko, pe Mopanga, Mopanga ya Molimo.” Mopanga ya Molimo! Ezali nini? Molimo oyo elekaka na makanisi na yo pe ekotaka kati na yo, pe Mopanga ya Molimo yango ezali Liloba na Nzambe.

420 Molimo yango asalelaka nini mpo na kobunda? Molimo Mosantu asalelaka nini mpo na kobunda, koningana, komiyoka? [Losambo balobi: “Liloba.”—N.D.E.] Liloba; motema! Fiou! Nkembo! Asalelaka nini mpo na kobunda, komiyoka? Liloba! Liloba! Tóloba yango: Liloba! [“Liloba!”] Liloba! [“Liloba!”] Liloba na Nzambe ezali eloko Molimo asalelaka mpo na kobunda.

421 Molimo na Nzambe ekendaka mbala moko liboso na Zabolo, koloba: “Ekomami!” Amen! “Ekomami!” Pe Zabolo akokima.

422 Tósala nini? Tókamata Mopanga, yango ezali Liloba na Nzambe, tóbimisa Yango (na nini?) na loboko ya kondima, loboko makasi ya kondima, Mopanga epeli na ngámbo mibale. Biblia elobi, na Baebele 4: “Ezali—Ezali Mopanga epeli na ngámbo mibale,” Ekataka kokende liboso pe kozonga sima.

423 Ndeko, akosála nini? Kamata Liloba. Kamata Molimo, tika Molimo ákota na motema na yo. Fungola mpenza makanisi na yo, loba: “Liloba na Yo ezali solo.” Sikawa, sala boye, ndeko mwasi. [Ndeko Branham asololi lisusu na ndeko mwasi mobeli—N.D.E.] “Liloba na Yo ezali solo.”

424 “Nkolo, nakotalela ata moke te lolenge nakomiyoka, likambo moto mosusu, ngai moko nakoloba. Nakangi nzela nyonso, nazali kopetola ba-nzela na ngai nyonso, bipekiselí nyonso, pe ntembe nyonso, pe kozanga kondima nyonso nazalaki na yango. Komiyoka nyonso nazalaki na yango, malali nyonso nazalaki na yango, pe makambo nyonso mosusu nazalaki na yango, nazali kobwaka nyonso wana libanda. Nyonso wana, nakotalela yango lisusu te. Nayeri mbala moko na molimo na ngai. E Nkolo, kita. Olobaki ete Opésá ngai bonsomi ya kopona.”

“Ezali bongo, mwana na Ngai.”

425 “Malamu, nafungoli motema na ngai pe makanisi na ngai. Kota, Nkolo Yesu.”

426 Pe simba Kondima makasi, Mopanga yango ya Molimo, YANGO ELOBI NKOLO. Gángá: “Aleluya!” Amen. Na sima, kata mike mike banguna nyonso bazali liboso na yo. Amen. Yango mpenza. Kata banguna nyonso. Soki mwa—mwa molimo mabe moko ekómi kosala ete ómiyoka lokola... Kata yango biteni biteni, na Liloba na Nkolo.

Kasi nguya na biso, ezali: “Esengo na Nkolo ezali nguya na ngai.”

427 “Kende mosika na ngai.” Pa! Kata ye na Liloba. Ézala molimo mabe, ézala moyini, ézala malali, ézala bokono, ézala nini, kamata Liloba pe bimisa Yango na Mopanga. Pe soki obeti mbala ya liboso, emonani lokola eningani te, beta yango lisusu, pe beta yango lisusu, pe beta yango lisusu. Pe beta yango kino ótobola lidusu, lokola mwana ya soso azali kobima na líki; to mpongo, yango nde ozali. Koba kobeta mpo óbima na mposo yango ya malali. Pasola nzela na yo ya kobima, pe loba: “Aleluya! Wapi mosusu?” Amen. Etumba yango wana. Wana nde sodá. Wana nde sodá na ekulusu. Iyo, mísie. Boma banguna nyonso.

428 Mpo na nini? Mpo na nini? Bisó, Momboto na bokonzi ya Abalayama, oyo ebongisámá liboso. Ntango Abalayama aboyaki nyonso oyo ekesanaki na Liloba na Nzambe, azalaki nde komipasolela nzela na bipekiseló nyonso oyo ezalaki koya liboso na ye. Balobaki: “Mwasi na yo akómi mobangé mingi.” Akataki yango mbala moko pe alongolaki yango na nzela. Zabolo alobaki: “Okoki kosala boye te. Okoki kosala bongo te.” Abalayama

akataki yango pe alongolaki yango na nzela. Abetaki yango makasi, abetaki yango lisusu, kino amipasolelaki nzela kati na yango.

“Wapi mosusu, Nkolo?”

429 “Yaka kotonga hema na yo *awa*.” Amataki pe atongelaki Ye etumbelo kuna.

430 Amataki kuna, pe Satana ayaki, alobaki: “Sikawa, nakoyebisa yo, esika oyo elongobani te.”

“Nakozala kaka *awa*. Longwa na mabelé na ngai.” Alobaki: “Aleluya!”

431 Lota alobaki: “Ekozala malamumu ete ókita *awa*. Tozali kosepela malamumu *awa*. Biso nyonso tozali na bibongiseli na biso *awa*. Pe, mwasi na ngai azali mokonzi ya likita ya mayele pe nyonso mosusu, kati na engumba. Nalobi na yo solo, esengelaki na yo kokita *awa*.”

Sala alobaki: “Abalayama . . .”

432 “Kanga monoko, Sala.” Aleluya! “Tikalala bobele *awa*. Oyo nde esika Nzambe atiaki ngai. Nakotikalala bobele *awa*.”

433 Oyo nde esika Nzambe atiaki ngai.

Nkembo na Nkombo na nguya ya Yesu!
Tika ete Banje báfukama;
Boya na motole ya bokonzi,
Pe tólatisa Ye motole ya Nkolo na nyonso.

Natelemi likolo na Klisto, Libanga makasi;
Nyonso mosusu ezali zelo ya kozinda,
Nyonso mosusu ezali zelo ya kozinda.

434 Ata liwa yango moko, makambo nyonso mosusu, ezali zelo ya kozinda. Natelemi likolo ya Klisto, Libanga makasi.

435 “Momboto mokonzi ya Abalayama.” Momboto mokonzi! Boyeba yango, basodá ya solo ya Angletere bazali libota bokonzi ya Angleterre, makila ya bokonzi, nyonso. Pe Momboto mokonzi ya Klisto ezali Lingomba oyo etondisami na Molimo Mosantu, etondisami na Molimo Mosantu. Ezali nini? Momboto mokonzi, na nzela ya elaka, na nzela ya komiyoka te. Kasi, na nzela ya elaka ya Nzambe, batelemi na Liloba na Nzambe, pe bazali komipasolela nzela, na koganga: “Aleluya!”

Ata liwa eyei koloba: “Azali koya kozua yo.”

436 Loba: “Pesa nzela, Yolodani. Nazali kokatisa na ngámbo.” Koba kopasola nzela na yo, kino na Mboka na elaka. Amen.

437 Likambo nini esalemaka ntango etumba esili nye? Nalingi kosilisa sikawa, na bosolo. Ntango etumba ekosila nye, pe basantu bakozonga na Ndako na lífilí, nalingi kotuna bino likambo moko, likambo nini esalemaki?

438 Likambo nini esalemaki ntango Hitler akotaki na France? Bongo, balobaki ete, na ntango moko, bokokaki lisusu komona ata mapata te, mpo na ba-mpepo. Bato ya Allemagne, batambolaki libata ya mai. [Ndeko Branham abwaki makolo mibale na eteyelolokola libata ya mai—N.D.E.] Bomoni, batelemaki, kotambola na lífilí, kosepela elonga.

439 Ntango Staline akómaki na Russie, na ntaka ya ba-kilometre ebele, makálo ezalaki kolandana moko sima na mosusu, pe ezalaki kobwaka ba-bombe na Berlin kino eloko moko etikalaki te. Esili. Pe ntango bakendeki, pe bato ya Allemagne oyo. . . Basodá ya Russie yango bazalaki kosepela, bakotaki na yango, boyebi, mwa makambo na bango basalaka. Namonaki yango na bililingi, mokolo moko na Londres, ndenge bakotaki, likambo ya motuya na bililingi yango, likambo esalemaki, ntango bakotaki, bazalaki kosepela. Hólalá!

440 Ntango toyokaki ete etumba esili, togangaki, tobetaki piólóló. Ntango bilombe bazongaki, tokendeki kokutana na bango kuna. Bazalaki koganga. Bazalaki kobelela. Ndeko na ngai moko azalaki kuna, alobaki, ntango azongaki, mibangé nyonso. . . Basodá ya kala, oyo bazokáká makasi na masasi, bakokaki kolongwa na ba-mbeto te, bamatisaki bango likolo na masuwa ntango bakómaki, mpo bámona Ekeko ya Bonsomi kotelema wana. Alobaki: “Bingambe mibali oyo bazalaki wana, bazalaki kaka kolela, pe komibamba na nse *boye*, ntango bamonaki Ekeko yango ya Bonsomi.” Bazalaki mosika na mboka na bango mibu minei, kobunda, bitumba ná makambo mosusu epasolaki bango mitema. Kasi bayebaki ete basi na bango, balingami, ba-mama, ba-papa, ná bana na bango, ná bato nyonso bango balingaki, bazalaki sima ya Ekeko wana ya Bonsomi. Ezalaki kotalisa ntina oyo bango babundelaki. Oh, bapiólóló ebetamaki, pe New York mobimba bagangaki makasi, esili, ntango bilombe na bango bakotaki na lífilí. Oyo wana ekozala moke.

441 Mokolo moko, ntango Kaisala, sima na etumba monene, alobaki: “Nalingi ete elombe mobundi makasi na ngai ámata na mpunda pe átambola pembeni na ngai, na molulu monene oyo ya kosepela elonga likolo na monguna na biso.” Pe basodá bakonzi nyonso babongisaki nsálá ya monzele ya bikoti na bango pe bangengisaki nguba na bango, pe basalaki lífilí, boyebi, ndenge wana, lokola—lokola basodá ya solo, ndenge wana. Sima na ntango moke, mwa mobangé moko alekaki wana, na bampota ebele. Hólalá! Atombolaki motó mwa moke, pe akobaki kotambola, ndenge *wana*. Kaisala alobaki: “Zela moke. Zela moke. Yo,” alataki ata bilamba ya—ya sodá mokonzi te, alobaki, “yaka awa.” Alobaki: “Bilembo ya mpota oyo, ozui yango wapi?”

Alobaki: “Na libanda na etumba.”

442 Alobaki: “Mata awa. Moto nalingi kofandisa pembeni na ngai ezali nde yo.” Mpo na nini? Amonisamaki polele ete autaki na etumba.

443 E Nzambe, yokela mawa moto oyo akomizokisa loboko na linzanza ya saladíni, pe akozua elembo ya mpota. Ngai nalingi kozala na bilembo ya bitumba. Ndenge Polo alobaki: “Nazali na bilembo ya mpota ya Yesu Klisto na nzoto na ngai.” Yango wana nalingi kobunda na libanda na etumba.

444 Mokolo moko, ntango Kapiténí-Mokonzi na biso monene akoya, Oyo apesi biso molato na etumba, Molimo Mosantu, Apesi biso Liloba na Ye mpo tóbunda na Yango, akotelema wana; ntango Kapiténí-Mokonzi na biso monene akoya likolo na mpunda, nalingi komata na likalo pe kozonga na Ndako elongo na Ye. Boye te? [Losambo balobi: “Amen.”—N.D.E.] Bongo, ntango nakosimba mwasi na ngai ya mpiko na loboko, nakobalola miso awa, pe nakomona bandeko na ngai ná basi na bango, ná bana na bango, ntango tokobanda kotambola na ba-paradiso wana ya Nzambe, pe mipepe ekotonda na ba-nzembo ya Banje, na likolo ndenge wana, yango nde mpenza molulu!

445 Pe ntango etumba ekosila, tokolata motole. Hólalá! Oh, basodá ya ekulusu, na ntongo oyo, bosembola loboko yango ya kondima, pe bosimba malamú Mopanga oyo.

446 Olobi nini mpo na yango, ndeko mwasi, obelemi? [Ndeko Branham asololi lisusu na ndeko mwasi mobeli—N.D.E.] Bimisa Mopanga yango, loba: “E Nzambe, nazali na ntina—na ntina te na makambo Zabolo alobelaki ngai, na nyonso moto mosusu alobaki. Na ntongo oyo, nandimi.” [Ndeko mwasi alobi: “Ngai pe nandimi.”] “Nandimi.”

447 Ndenge nalobaki mokolo wana, mwa . . . Nakanisi eleki balomingo, mobali moko alotaki ndoto. Alotaki ete Zabolo azali mwa moto moko moke, ayaki noko epai na ye. Alobaki: “Bouh!” Pe ye azongaki mbala moko sima, pe Zabolo akómaki monene. “Bouh!” Azongaki sima, pe Zabolo akómi lisusu monene. Na suka, Zabolo akómaki monene lokola ye, alingaki kolonga ye. Ayebaki ete asengelaki kobunda na ye na eloko moko, bongo atalaki zonga zonga. Amonaki eloko akokaki kobundisa ye na yango te. Akamataki Biblia. Pe Zabolo alobaki: “Bouh!” Ye pe alobaki na ye: “Bouh!” pe Zabolo akómaki moke, moke, moke. Pe, na suka, abetaki ye pene na liwa, na Liloba.

448 Ozali sodá, boye te, ndeko mwasi? [Ndeko Branham asololi lisusu na ndeko mwasi mobeli—N.D.E.] Kamata Liloba yango pe loba: “Ekomami.” Amen. “Nakokufa te. Nakozala na bomoi. Nakofanda mpenza na losambo oyo pe nakokumisa Nzambe mpo na bolamu na Ye, elongo na bamosusu.”

449 Bino basantu, bondimi yango? [Losambo balobi: “Amen.”—N.D.E.] Amen.

Togumba motó.

450 E Nkolo Nzambe, Mozalisi ya likolo pe nse, éyebana lelo ete Ozali kaka Nzambe. Ata natei ndenge nini, ata nalobi makambo boni, Nkolo, Liloba moko kouta na Yo, ekokata likambo.

451 Misuále oyo ezali awa, ezali kotalisa babeli. Nabondeli, Tata na Likolo, ete mapamboli pe nguya na Yo ézala likolo na moko moko na yango, wana natii maboko na ngai likolo na yango. E Nzambe, na Nkombo na Yesu Klisto, nabondeli ete Ópakola misuále oyo na Bozali na Yo ya bulee, mpo yango ekomami na Liloba. Ezali likambo oyo etelemeli Liloba te. Kasi elobami kati na Liloba, ete: “Bazalaki kozua misuále pe bilamba oyo esimbaki nzoto na Polo. Milimo mabe ezalaki kobima kati na bato, pe bazalaki kobika na bokono ndenge na ndenge.” Sikawa, biso tozali Santu Polo te, kasi Yo ozali bobele Nzambe, pe Ozali bobele Molimo Mosantu yango moko. Natii maboko na ngai likolo na misuále oyo, na Nkombo na Nkolo Yesu, pe nasengi ete Ópambola pe Óbikisa moko na moko na bango.

452 Pe, Nzambe, oyo alali awa na mbeto, aumeli kolala awa, azali bobele mwana, bobele elenge mwasi kitoko. Akoki kobika te, Nkolo. Satana asaleli ye mabe. Pe balingami minganga ya mokili oyo, bamekaki nyonso bakokaki kosala, na ntembe te, mpo na kobikisa mwana oyo. Bakoki na bango kosala eloko te. Bakómi na suka ya mayele na bango. Bayebi lisusu eloko ya kosala te. Kasi, Nkolo, nazali na esengo mingi mpo ezali na mokapo mosusu oyo ekomami. Tokoki kobalola lokasa mosusu, pe na lokasa yango, tomoni Monganga Monene kokota. Tosengeli na lisalisi na Ye na ntongo oyo.

453 Sikawa, Nkolo, ekomami te awa na Liloba na Yo, ete: “Bilembo oyo ekozala na bango bakondima”? Nkolo, soki nazali mondimi te, kómisa ngai yango sikawa. Soki elenge mwasi oyo azali mondimi te, kómisa ye yango sikawa. “Bilembo oyo ekozala na bango bakondima; soki batii maboko likolo na bato na malali, bakobika.” Ekomami lisusu: “Na Nkombo na Ngai bakobengana milimo mabe.” Nkolo, oyo—oyo ezali Maloba na Yo. Ezali ya Yo. Ezali Liloba na Yo. Pe sikawa, lokola mosali na Yo. . .

454 Ndenge Olobaki: “Soki bato mibale to misato kati na bino basangani, Ngai nakozala kati na bino; soki boyokani, mpo na likambo moko, pe bosengi, bokozua yango.”

455 E Nzambe, mwana oyo akoki kozala mobeli oyo azali na mpasi koleka kati na ndako oyo, na ntongo oyo, mpo ete soki Yo te, akoki lisusu kozala na bomoi ntango molai te, pe ye nde azali na malali koleka. Na bongo, biso nyonso, tozali na boyokani, basodá nyonso oyo tozali awa. Pe kati na etonga oyo, Momboto mokonzi ya Abalayama ezali.

456 Tozali kokende kokutana na Satana sikawa. Ekozala malamú omilengela mpo na kobima, Satana, mpo ete molato na biso ya etumba ezali kongenga, bendele ezali kopepa na mopepe; mibali pe basi basimbi Mipanga, bazali sikawa koya kokutana na

yo, na ntina na elenge mwasi oyo. Satana, bima kati na ye. Tika mwana wana. Lokola mapinga ya Nzambe na bomoi, tobeti na yo mondéngé. Tika ye, na Nkombo na Yesu Klisto.

⁴⁵⁷ Nakei kotiela ye maboko. Pe, Satana, yo oyo okangi mwana oyo, yo oyo osali mabe oyo. Nayebi ete ozali na makasi mingi mpo na kobunda na moto, kasi ozali na makasi mingi te kobunda na Nkolo na ngai, yango wana naye na Nkombo na Ye. Tika ye, yo molimo ya Zabolo. Yo molimo mabe ya bokono, bima na mwana oyo, pe akóma nsomi, kobanda lelo. Nalobi yango, na Nkombo na Yesu Klisto.

⁴⁵⁸ Sikawa, Nkolo Nzambe, Yo oyo Osekwisaki bakufi pe Otalisaki ete Ozalaki Nzambe, zongisela elenge mwasi oyo bokolongonu ya nzoto pe makasi, ete átelema awa kati na ndako oyo. Zabolo abimi kati na ye! . . . ? . . . akopesa ye nzoto kolongonu. Tika ete ázala na bomoi mpo na nkembo pe lokumu na Nzambe.

Yango—Yango elobami, sikawa tika ete ésalema.

⁴⁵⁹ Bato mosusu bazali awa, oyo balingi kotombola maboko pe koloba: “Nalingi bábondela mpo na ngai. Nazali kobela. Nasengeli na Nzambe”? Nayebi te soki totikali na ntango boni. Tozali na ntango ekoki mpo bato oyo báleka awa. Nazali komiyoka mpenza makasi, na ntango oyo. Iyo. Iyo. Nalingi ete oya awa, Billy, pe ozua, ntango mosusu, ndambo oyo bazali awa, na ngámbo *oyo*, bobele bango. Bobele ndambo oyo wana báyá liboso, na sima, tokozua ndambo oyo bazali na sima, sima na bango, kino na molongo *wana* kuna. Na sima, tokozua bango ndenge wana, na bongo bako . . .

⁴⁶⁰ Pe sikawa nalingi ete Ndeko Neville ná bandeko na ngai mosusu batei batelema awa pembeni na ngai, awa, mpo bokoka kolekisa bato bakita na nzela oyo lisusu. Malamu. Malamu. Sikawa ngai . . .

⁴⁶¹ Bato boni kati na bino balati molato na bango ya etumba? [Losambo balobi: “Amen.”—N.D.E.]

⁴⁶² [Ndeko Branham apesi mokongo na eteyelo pe asololi na ndeko mwasi oyo auti kobondela mpo na ye—N.D.E.] Makambo ekobongwana sikawa. Zonga na ndako, makambo nyonso ekokóma malamau sikawa, okobika.

⁴⁶³ Amen. Hólalá! Basodá, bino nyonso, bóbimisa Mopanga. Bóbimisa Mopanga, basodá ya ekulusu, bókoba kokende liboso, bókoba kokende liboso.

Natelemi likolo na Klisto, Libanga makasi.

Nyonso mosusu ezali zelo ya kozinda.

⁴⁶⁴ Malamu, boya boye, bokita mbala moko na ngámbo *oyo*. Moto nyonso ázala kati na mabondeli sikawa, wana bazali koleka.

Na Nkombo na Yesu, bikisa mwasi oyo. Amen.

Bóbimisa Mopanga na bino sikawa. Bófanda kaka na bisika na bino, wana bozali kosepela.

⁴⁶⁵ [Ndeko Branham ná batei babondeli mpo na babeli, mosika na mikró, sekónde ntuku minei na mitano—N.D.E.]

Tokei, basodá Baklisto!
Tótambola lokola na etumba,
Ná ekulusu na Yesu
Liboso na biso.

⁴⁶⁶ “Longwa, Satana!” Likambo nini, bino basodá? Bondimi te ete tokoki kolonga? [Losambo basepeli pe balobi: “Amen.”—N.D.E.] Asili kolongama. Bisó tozali balongi koleka kati na Yesu Klisto. Milimo mabe nyonso tobengani yango, pe nyonso mosusu. Amen.

Boya awa, bandeko na ngai! . . . ? . . .

Nabondeli ete bobika! . . . ? . . .

Bikisa ndeko na ngai ya mobali, Doc; bikisa ye, Tata, na Nkombo na Yesu.

Na Nkombo na Yesu Klisto, bikisa mwasi oyo. Yaka . . . ? . . .

⁴⁶⁷ Sikawa, akamataki . . . Nasengelaki kotuna bandeko na suka kuna. Bipai nyonso, Nkolo . . . ? . . .

⁴⁶⁸ E Nkolo Nzambe, Mozalisi ya likolo pe nse! E Nzambe, Oyebi nini ezali na motema ya mwasi oyo. Oyebi yango na mobimba. Nabondeli mpo na bango mibale, mama pe papa. Na Nkombo na Yesu Klisto, natiki . . . ? . . .

Na Nkombo na Yesu Klisto, na . . . ? . . .

Na Nkombo na Yesu Klisto, na . . . ? . . .

⁴⁶⁹ E Nzambe, zalá na ndeko na ngai ya mwasi. Toyebi ete mibu ezali kopusana, pe esali ete liwa elingi kokanga nzoto ya mwasi oyo. Sikawa, na Nkombo na Yesu . . . ? . . .

⁴⁷⁰ Na Nkombo na Yesu Klisto, pambola elenge mwasi oyo, Nkolo. Bitumba na biso na eteyelo kuna, nayebi makambo azali koleka na yango. Nabondeli ete Ópambola. Tika ete ábimisa Mopanga yango, na ntongo oyo, pe ákende liboso! . . . ? . . . Pambola elenge mobali oyo, Nkolo; azali koya, azali kobelela Nkombo na Yo, na ntongo oyo; nabondeli ete Ókende elongo na . . . ? . . .

⁴⁷¹ E Nzambe, pambola ndeko na ngai ya mobali, Ópesa ye bosenga na ye. Nalobi yango na Nkombo na Nkolo na biso Yesu, ! . . . ? . . .

Na Nkombo na Yesu Klisto, tobondeli.

Na Nkombo na Yesu Klisto, tobondeli.

Na Nkombo na Yesu Klisto, tobondeli.

Na Nkombo na Yesu Klisto, to . . . ? . . .

Na Nkombo na Yesu Klisto, tobondeli.

Na Nkombo na Yesu Klisto . . . ? . . .

Na Nkombo na Yesu Klisto . . . ? . . .

Na Nkombo na Yesu Klisto, bikisa ndeko na ngai ya mobali.

Na Nkombo na Yesu Klisto . . . ? . . .

Na Nkombo na Yesu Klisto!

Na Nkombo na Yesu Klisto!

Na Nkombo na Yesu Klisto!

Na Nkombo na Yesu Klisto!

Na Nkombo na Yesu Klisto!

⁴⁷² [Moto moko alobi: “Tata akufaki.”—N.D.E.] E Nzambe, sunga ye, na Nkombo na Yesu.

E Nzambe, na Nkombo na Yesu Klisto, to . . . ? . . .

E Nzambe, na Nkombo na Yesu!

Na Nkombo na Yesu Klisto . . . ? . . .

Na Nkombo na Yesu Klisto, bikisa ndeko na ngai ya mobali.

Na Nkombo na Yesu . . . ? . . .

Bososoli sikawa?

E Nzambe, tika ete elongwa na . . . ? . . .

⁴⁷³ Na Nkombo na Yesu Klisto, tobondeli! . . . ? . . . Pesa ndeko mwasi . . . ? . . .

⁴⁷⁴ E Nzambe, koyeba ete mama moke ya motuya oyo, azali koleka na mikakatano nyonso oyo, nabondeli Yo, e Nzambe, ete Yo . . . ? . . . likolo na ye.

Bimisa Mopanga yango, Ed, pe kende liboso, na Nkombo na Yesu.

⁴⁷⁵ E Nzambe, Bikisa mwasi oyo. Pesa ye bosenga na ye. Tika ete atia Mopanga yango liboso na ye, na ntango ya mpasi.

E Nzambe . . . ? . . . na ntongo oyo. Nabondeli Yo ete . . . ? . . .

⁴⁷⁶ Tata, Nzambe, nabondeli ete Óbikisa ndeko na biso ya mobali pe Ópesa ye nzoto kolongonu. Pe na Nkombo na Yesu Klisto . . . ? . . .

⁴⁷⁷ E Nzambe, nabondeli ete Óbikisa ndeko na biso ya mwasi, Ópesa ye nzoto kolongonu, na Nkombo na Yesu Klisto.

⁴⁷⁸ Tata, Nzambe, nabondeli ete Ó—Óbikisa ndeko na biso ya mobali.

Bikisa ndeko na biso ya mwasi, Nkolo! . . . ? . . .

Tata, na Nkombo na Yesu, bikisa ndeko na biso ya mwasi oyo, Tata.

⁴⁷⁹ Tata, . . . ? . . . tobondeli na Nkombo na Yesu. E Nzambe, bikisa mwasi oyo.

E Nzambe, nabondeli Yo ete . . . ? . . .

⁴⁸⁰ E Nzambe, pambola ye, Tata! . . . ? . . . Tolingi mibange oyo mingi, Nkolo. Pe nabondeli ete Ópesa ye bosenga na ye! . . . ? . . .

⁴⁸¹ Tata na biso na Likolo, nabondeli ete ndeko na ngai ya mobali . . . ? . . . E Nzambe, . . . ? . . . ye, E Nzambe . . . ? . . . sodá ya ekululu. Pe akobimisa Mopanga yango, na ntongo oyo, pe akokende liboso.

E Nzambe, biso . . . ? . . . Pesa ye, e Nkolo, bosenga na ye.

⁴⁸² E Nzambe, pambola ndeko mobali . . . ? . . . Nabondeli ete Óbikisa ye, Nkolo! . . . ? . . . Pesa ye mposa ya motema na ye, na Nkombo na Yesu Klisto.

⁴⁸³ E Tata na Likolo, elenge oyo, motei ya Nsango Malamu, mongongo na ye . . . ? . . . Wana asukolaki yango na nzungu . . . ? . . . E Nzambe, nabondeli Yo ete . . . ? . . . Pe na ntango mapinga monene ya Nzambe ezali kokende liboso, sikawa, ná Mipanga batomboli likolo, pesa ye elonga, Nkolo. Mobali na ye oyo, Nkolo, oyo alongolami na mbeto ya bato na kanser, epai alalaki, azalaki kobunda na liwa ya kanser, minganga balobaki akokufa, azalaki kokende. Pe ye oyo, na ntongo oyo, sodá moke ya ekululu. Pesa ye makasi, Nkolo, mpo na mosala na Yo, tobondeli na Nkombo na Yesu.

⁴⁸⁴ Nalingi ete elenge mwasi wana . . . Likambo mosusu ezali na ntina na elenge motei oyo. Yaka awa, Ndeko Kidd. Mobali oyo lopitalo ezongisaki ye na ndako, eumeli te, azalaki kobunda na liwa, kanser eliaki ye. [Ndeko mwasi Kidd alobi: “Eleki mobu moko.”—N.D.E.] Eleki mobu moko. [“Mibale.”] Eleki mibu mibale, na malali ya prostate. Monganga na ye apesaki ye mikolo moke na bomoi. Pe mokolo moko na ntongo, tokendeiki kuna, na ntongo makasi, tobondelaki mpo na ye, kaka ndenge touti kosala mpo na yo, pe bazali lisusu komona ata elembo na yango te. [Losambo basepeli.] Abikaki. Amen. Ye—ye . . . [Ndeko mwasi Kidd alobi: “Basengeli kondima yango.”] Azali sikawa na kiló koleka oyo azaláká na yango. Ye ná mwasi na ye, bazalaki kati na elanga ya Nsango Malamu, ntango mosusu liboso ngai nábotama. Ye oyo sikawa . . . [Ndeko mobali Kidd alobi: “Mibu ntuku mitano na mitano.”] Mibu ntuku mitano na mitano. Liboso na ngai koya na mokili, bango bazalaki koteya Nsango Malamu. Pe ye oyo, abiki, na mibu ntuku nsambo na mitano to . . . [“Ntuku mwambe na moko.”] Ntuku mwambe na moko. [Ndeko mobali Kidd alobi: “Tozalaki kosala mayangani ya kolamuka, ya póso mibale, koteya mpokwa moko na moko.”] Mayangani ya kolamuka ya póso mibale, auti kosala mayangani ya kolamuka ya póso mibale, pe ateyaki mpokwa moko na moko. Mibu ntuku mwambe na moko, abiki, na kanser, na mobangé na ye.

⁴⁸⁵ Malamu, ndeko mwasi, ekómi ngala na yo sikawa. Ondimi? [Losambo basepeli pe balobi: “Amen.”—N.D.E.] *Tokei, basodá Baklisto.* Malamu, ndeko mwasi. Bino, moko na moko na

bino, tokosala nini? YANGO ELOBI NKOLO. Tósala nini, tóumela awa?

⁴⁸⁶ Satana, okwei. Tozali koya kuna sikawa. Tozali kokoba kotambola kino na Mboka na elaka. Ezali nini? “Ngomba oyo ezali nini, liboso na Zorobabel? Nani yango atelemei wana? Okolalisama na nse.” Mpo na nini? Na Mopanga oyo epeli bipai mibale, tokokata-kata ye kino na nse. Ezali solo. Malamu.

Tokei, basodá Baklisto!
Tótambola lokola na etumba,
Ná ekulusu na Yesu
Liboso na biso;
Klisto, Nkolo na bokonzi,
Azali kokende kobunda na moyini; (na Liloba
na Ye)

Azali kakamba biso na etumba,
Botala, bendele na Ye!

Tokei, basodá Baklisto!
Tótambola lokola na etumba,
Ná ekulusu na Yesu
Liboso na biso.

⁴⁸⁷ Aleluya! Bazalaki kosala nini? Likambo ya liboso ezalaki kosalema, na etumba, mpo na Yisalaele, likambo ya liboso ezalaki nini? Bayembi nde bazalaki kokende liboso. Eloko nini ezalaki kolanda? Sanduku na mibeko. Na sima nde etumba. Malamu. Bondimi yango sikawa? [Losambo balobi: “Amen.”—N.D.E.] Tóyemba *Tokei, basodá Baklisto*. Ntembe nyonso, tozali kolongola yango. Tótelema sikawa, tokei na etumba.

Tótelema sikawa, biso nyonso.

Tokei, basodá Baklisto!
Tótambola lokola na etumba,
Ná ekulusu na Yesu
Liboso na biso;
Klisto, Nkolo na bokonzi,
Azali kokende kobunda na moyini;

Tokolonga ye ndenge nini? Na Liloba.

Azali kakamba biso na etumba,
Botala, bendele na Ye!

Tokei, basodá Baklisto!
Tótambola lokola na etumba,
Ná ekulusu na Yesu
Liboso na biso.

Biso, tokabwani te,
Tozali biso nyonso nzoto moko;
Moko na elikia pe na malakisi,
Moko na bolingo.

488 Moto nyonso oyo andimi, sikawa, áloba: “Amen.” [Losambo balobi: “Amen.”—N.D.E.] Aleluya! Bondimi yango? [“Amen.”] Tozali balongi. Banguna nyonso bazali wapi? Na nse na makolo na biso. Tokómi banani lelo oyo? Tosekwi kati na Klisto!

489 Sikawa, esili, ndeko mwasi. [Ndeko Branham asololi lisusu na ndeko mwasi oyo azalaki kobela—N.D.E.] Ondimi yango? Zonga na ndako sikawa. Okómi komiyoka malamumu? Alobi ete akómi komiyoka malamumu sikawa. Nyonso ezali malamumu.

490 Bato boni kati na bino bakómi komiyoka malamumu? [Losambo basepeli makasi pe balobi: “Amen.”—N.D.E.] Pe ntango bagangaki, etutu ekweaki, amen, pe babotolaki yango. Amen. Babotolaki engumba yango. Amen! Amen! Bondimeli Ye? [“Amen.”]

491 Sikawa, bobosana liyangani ya mpokwa ya lelo te. Ndeko Neville akozala awa na mpokwa ya lelo, pe akoteya biso liteya malamumu. Pe mokolo ya lomingo, lomingo ekoya, soki Nkolo alingi, nakozala awa.

492 Sikawa, tóyemba, wana tozali kobima. Pe sikawa, ntango tokobima libanda, tokende wana tozali koyemba *Tokei, basodá Baklisto*. Pe kobanda lelo, bozongisa lisusu Mopanga yango na ebombelo na yango te. Bobimisa yango. Tólonga. “Babimaki na kolonga pe mpo na kolonga lisusu.” Malamumu, tozongela eteni ya liboso.

Tokei, basodá Baklisto!
Tótambola lokola na etumba,
Ná ekulusu na Yesu
Liboso na biso.



ETUMBA MONENE KOLEKA OYO EBUNDÁMÁ LIN62-0311
(The Greatest Battle Ever Fought)

Liteya oyo ya Ndeko William Marrion Branham, eteyamaki liboso na Ngelesa na lomingo na ntongo, mokolo mwa 11, sanza ya misato, na mobu 1962, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotيامa na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org